

**Bádha Ngali  
gba Yesu Kilisito maka li  
Matié  
aye lie ko  
Eli na kalanu**

Bádha Ngali inde li Matié aye e ngakpokpo me Yesu ne Mækobho inde li Ebhe abhú nani e-o. A ko kpála inde li Ebhe amene li pápá gba e ongu inde ani apa nani bhú Gandja na Didili-e me ni améne e pi okpála gba ni-o. Bádha Ngali angoo bha bini pi opiga gba omaYuda ade inde u azu Yesu bhú e di ne bhe ani abhele bhú e-o. Engú bini, a la di pi ndu okpála na píla doto hana.

Bádha Ngali angoo ngasuno Yesu maka 'ngbé mäsuno inde ne angu nambamba 'ta líli gba Ebhe, inde la di ngasuno píndji Nau gba Ebhe-o . Ongú na ngbengbengbe inde bhú nasuno gba ani-e a bhuluvue: (1) Nasuno a pí 'ta (alo 5-7). (2) Olíli pi omækpata ndjikpa ne ká bhisi (alo 10). (3) Ogbitaku píndji Nau na abhúlá (alo 13). (4) Nadu mækpata gba Yesu (alo 18). (5) Ekpí na soso (oalo 24-25).

**Ongbengbe ongú inde bhú bhuku inde-e ngae inde:**

Onguo ogbi Yesu Kilisito di ne nazu lie ka ani  
1:1 - 2:23  
Kulu gba Djaa bhulú nabatisa okpála 3:1-12  
Batisimo di ne nale inde li Djabulú ale Yesu ne  
e-o 3:13 - 4:11

Kulu inde li Yesu amene e bhú ká okpála na  
Galilaya 4:12 – 8:34  
Dhuku gba Yesu nayie bhú Galilaya ngú nanu  
abhú Yelusalema 9 – 20:34  
Oekpi na soso gba Yesu abhú Yelusalema 21:1  
– 27:66  
Nakpi ne nazuku gba Yesu di ne nakoto ka ani  
li okpála 28:1-20

*Onguo ogbi Yesu Kilisito*  
(*Tsia bhú Luk. 3:23-38.*)

<sup>1</sup> A inde-e 'li onguo ogbi Yesu Kilisito , inde u  
azu e bhú piga gba 'ngbé ngámá Davidi, di ne  
bhú piga gba Abalahama-o.

<sup>2</sup> Abalahama azu Isaka,  
Isaka azu Yakobho,  
Yakobho azu Yuda di ne ondaise e,

<sup>3</sup> Yuda azu Peledje ne Djala li Tamala,  
Peledje azu Esilome,  
Esilome azu Lama,

<sup>4</sup> Lama azu Aminadaba,  
Aminadaba azu Nasone,  
Nasone azu Salimona,

<sup>5</sup> Salimona azu Boadja li Laaba,  
Boadja azu Obede li Luta,  
Obede azu Yese,

<sup>6</sup> Yese azu 'ngbé ngámá Davidi.  
Davidi azu Salomo li olo gba Ulia,

<sup>7</sup> Salomo azu Loboama,  
Loboama azu Abia,  
Abia azu Asa,

<sup>8</sup> Asa azu Djodjafata,  
Djodjafata azu Djolama,  
Djolama azu Odjiasi,

9 Odjiasi azu Djoatama,  
Djoatama azu Akadji,  
Akadji azu Edjekia,

10 Edjekia azu Manasi,  
Manasi azu Amosi,  
Amosi azu Djodjiasi,

11 Djodjiasi azu Djekonia di ne ondaise e.  
Abhomu-o, u atsia abha omaɓsalaele bhú  
bali abhú kuti na Babilona.†

12 Pita nabha uo bhú bali bhú Babilona-a,  
Djekonia azu Salatiele,  
Salatiele azu Djolobabele,

13 Djolobabele azu Abiuda,  
Abiuda azu Eliakime,  
Eliakime azu Adjole,

14 Adjole azu Sadoka,  
Sadoka azu Akime,  
Akime azu Eliude,

15 Eliude azu Eleadjali,  
Eleadjali azu Matana,  
Matana azu Yakobho,

16 Yakobho atsia azu Djodjefu 'ko Malia inde  
azu Yesu, u a'i e me Masiya-o .

17 Nako ndu opiga bhomu-o hana-a, nayie li  
Abalahama nakolo li Davidi-e, a ko opiga ndjikpa  
ne ka badha, nayie li Davidi nakolo li namba  
omaɓsalaele bhú bali na Babilona-a, a ko opiga  
ndjikpa ne ka badha, nayie li nanu bhú bali abhú  
Babilona-a nakolo li nazu Masiya-a, a ko di opiga  
ndjikpa ne ka badha.

---

† 1:11 1:11 Tsia bhú 2 Ong. 24:12-16.

*Malia azu Yesu  
(Tsia bhú Luk. 2:1-7.)*

<sup>18</sup> A inde-e lele maka u azu Yesu Kilisito lie ko. Malia, 'hi ani-e adu adjeke kuva gba o ne Djodjefu-o. Engú bini, kala me u mbila lio na òlò ne bhoko-o, ani abi ebhi bhú angu gba Bu Bhobua. <sup>19</sup> Abhomu-o, 'ko ani Djodjefu inde adu nani kpála namanga Ebhe-e, du akunda naha numu pi ani bhú ká djila okpála de. Ani atsia au ndjindji me ni tse ani bhú pepe. <sup>20</sup> Nedhinga ani adu abhundja lie mo-o, andjelu bini gba Ngámá akoto li ani bhú loto. Ani atsia apa pi ani me: «Djodjefu, ndili gba Davidi, mo okpé naha wala mu Malia de, anga ebhi inde ani nde ne e ayie ka Bu Bhobua. <sup>21</sup> Ani azú ndili na bhobhoko inde mo ogísila 'li e me Yesu,\* anga ani akóbho omaha e bhú osisiti 'ngú gba o-o.» <sup>22</sup> Ndu 'ngú bhomu-o hana amene lie ngubula me engú li Ebhe Ngámá apa nani e bhú 'li polofeta mene lie. Engú inde ani apa nani e me:

<sup>23</sup> «Tsia nga, òlò inde i mbila nga 'ngú na bhoko de-e abí 'bhi,

ani tsia zú ndili na bhobhoko inde u agísila 'li e me Imanuéli.†»

(A akunda napa me: Ebhe bhú dabili bini ne ní.) <sup>24</sup> Li Djodjefu azuku lie, ani amene maka li andjelu gba Ngámá apa pi ani lie-o. Ani atsia aha Malia maka wala e. <sup>25</sup> Engú bini, u si ne ani pí polo bini maka òlò ne bhoko de nakolo li 'kpí

---

\* **1:21** 1:21 Yesu: 'hi inde me Yesu-o, a akunda napa me Ebhe ne makobho gba okpála. † **1:23** 1:23 Tsia bhú isa. 7:14.

li Malia azu ndili na bhobhoko inde li Djodjefu agisila 'li e me Yesu-o lie-o.

## 2

*Obhulu imbilangu ago ngu nadhogø Yesu  
(Tsia bhú Luk. 2:8-20.)*

<sup>1</sup> U azu nani Yesu bhú Beteleme.\* Kutí bini na ndu doto na Yudaya, bhú nedhinga gba 'ngbé ngámá Elode† me-e, obhulu imbilangu ayie ne andjongu, u akolo bhú Yelusalema. <sup>2</sup> U atsia ayi me: «'Ngbé ngámá gba omaYuda inde u azu e mbia inde-e su? Padhá de, anga ya au ikupala inde asuno me u azu ani-e akoto ne andjongu, abhomu-o, ya atsia ago ngu nadhogø ani.»

<sup>3</sup> Li Elode adje lie mo-o, mabhundja gba ani di ne bhe gba ndu okpála na Yelusalema hana angbingi. <sup>4</sup> Abhomu-o, ani apo bhúla ongbengbe odimandø gba Ebhe , di ne omusuno na líli gba Moidje-o . Ani atsia ayi uo me: «Bili inde a ayo me u zu Masiya li e ngae dho?» <sup>5</sup> U agie pi ani me: «Abhú Beteleme, bhú ndu doto na Yudaya, anga polofeta aye nani me:

<sup>6</sup> <Ngamu, Beteleme inde bhú ndu doto na Yudaya,

mu mbomboye ane okuti koko na Yudaya mane ade.

Padhá de, anga ngámá inde alila okpála gba ma na Isalaele, akóto bhú mu.†>»

---

\* **2:1** 2:1 Beteleme: A ko kuti inde u azu nani 'ngbé ngámá Davidi bhú e-o. † **2:1** 2:1 Tsia bhú Mik. 5:1. † **2:6** 2:6 Tsia bhú Mik. 5:1.

<sup>7</sup> Abhomu-o, Elode a'i obhulu imbilangu-o bhú pepe. Ani ayi uo li kukulú nedhinga inde li ikupala ango-o akoto lie-o. <sup>8</sup> U agie 'ngú lie pi ani tété-e, ani atsia atima uo bhú Beteleme ne napa pi uo me: «Yi nunu, yi gili 'ngú pindji ndili-e na paká paká. Li yi u ani-e, yi de go pa muma, amba ngama di-e, ma nu dhøge ani.»

<sup>9</sup> Pita u adje engú li 'ngbé ngamá Elode apa e lie, u atsia aholo 'nú. Me-e, ikupala u au e andjongu-o adu adholo kala uo, a atsia anu alu pí bili inde li ndili-e adu li e-o. <sup>10</sup> U au matá ikupala-a lie me-e, u abedhe ne djali bedhe. <sup>11</sup> U ali abhú 'ti-o, u atsia au ndili-e ne 'hi e Malia . Abhomu-o, u akikita lipuku o kuto, u atsia adhøge ani. U abhulu okíli gba o-o. U atsia aha apepe pi ani li olo, ne mungotsi, la di ne mungotsi koko na mase naali inde 'li e me mila . <sup>12</sup> Pipita-a, Ebhe atsia apa pi uo bhú loto me u agie matá lio agba Elode de. Abhomu-o, u atsia agie lio agba o li kpadji koko.

### *Malia ne Djodjefu akpe kpata bhú Edjipeto*

<sup>13</sup> Pita li obhulu imbilangu-o agbida lie, andjelu bini gba Ngámá-a akoto li Djodjefu bhú loto, ani atsia apa pi ani me: «Yie bhúlá, ha ndili-e ne 'hi e, amba mu kpe ne uo bhú Edjipeto. Du oo akólo li nedhinga inde ma agáma 'ngú pi mu lie-o. Padhá de, anga Elode agili ndili-e ngú nabhøle ani.» <sup>14</sup> Sukpe-e, Djodjefu ayie bhúlá, ani aha ndili-e ne 'hi e, ani atsia akpe ne uo bhú Edjipeto. <sup>15</sup> Ani adu oo akolo li 'kpí li Elode akpi lie, ngubula me engú inde li Ebhe Ngámá apa nani e pi polofeta-a, amene lie. Ngámá apa nani

pi opolofeta me: «Ma a'i ndili gba ma me ani koto bhú Edjipeto kokoto.†»

*Elode abhili ongisi na djedjedje*

<sup>16</sup> Li Elode au lie me obhulú imbilangu-o apite ni-e, ani abi 'gú naali. Abhomu-o, ani atsia aha líli me u nu bhú Beteleme di ne bhú ndu doto gba ni-e hana, amba u bhili ndu ongisi na djedjedje hana nayie bhú kalanga bhisi akø ne kuto. Ani aha líli bhomu-o nakpata lele kalanga inde li obhulú imbilangu-o aha e pi ani-o. <sup>17</sup> Abhomu-o, engú inde li polofeta Djelemi apa nani e, atsia amene lie. Djelemi apa nani me:

<sup>18</sup> «U adje eli bini bhú kuti na Lama,  
oegbá di ne omulopolo.

A ngaku 'gbá ongisi gba e bhomu-o Lasele.  
Ani kunda de me u yoko ni-e de,  
anga ndu ongisi gba ani-e hana amu.†»

*Djodjefu, ne Malia di ne Yesu agie lio bhú Nadjaleta*

*(Tsia bhú Luk. 2:39-40.)*

<sup>19</sup> Pita li Elode akpi lie-e, andjelu bini gba Ebhe Ngámá-a akoto li Djodjefu bhú loto bhú Edjipeto.

<sup>20</sup> Ani atsia apa pi ani me: «Yie bhúlá, ha ndili-e ne 'hi e, yi holo kpadji, amba yi gie liyi ne uo bhú doto na Isalaele. Padhá de, anga okpála inde adu nako nakunda nabhøle ndili-e amu.»

<sup>21</sup> Djodjefu ayie bhúlá, ani aha ndili-e ne 'hi e, ani atsia agie lie bhú doto na Isalaele. <sup>22</sup> Engú bini, ani adje la lie me Alikilausi ne 'ngbé ngámá bhú ndu doto na Yudaya bhú da 'dyi e Elode-e,

† **2:15** 2:15 Tsia bhú Oz. 11:1. † **2:18** 2:18 Tsia bhú Djlm. 31:15.

ani atsia adje tsulɔ ngú nanɔ oo. Ebhe agbele matá 'dje ani bhú loto, ani atsia agie lie bhú ndu doto na Galilaya. <sup>23</sup> Ani anɔ asi kuti bhú gudɔ na Nadjaleta, ngubula me engú inde li opolofeta apa nani e, amene lie. Opolofeta apa nani me: «U adú a'í ani me Kpála na Nadjaleta.»

### 3

*Djaa bhulɔ nabatisa okpála apa pi okpála me u dji bua o*

*(Tsia bhú Mlk. 1:2-6; ne bhú Luk. 3:1-6; di ne bhú Dja. 1:19-23.)*

<sup>1</sup> Bhú oekpí bhomɔ-o, Djaa bhulɔ nabatisa okpála akoto nani abhú mili bili na ndu doto na Yudaya. Ani adɔ atotobhila me: <sup>2</sup> «Yi dji bua yi, anga Nau na abhúlá akolo masikpe!» <sup>3</sup> Djaa nani ne kpála inde li polofeta Isaya akpokpo 'ngú gba e me:

«Kpála bini ngatotobhila bhú mili bili me:  
<Yi leke kpadji gba Ngámá-o.

Yi leke bua yi ngú nago ka ani-o.†»

<sup>4</sup> Djaa adɔ adyi bongo inde u adɔ e li su enɔ, ani adɔ agbite ekpú na kó 'nɔ ludu e. Ani atsia adɔ azɔ omakindolo di ne nadha eú. <sup>5</sup> Abhomɔ-o, okpála na Yelusalema di ne okpála na Yudaya libhomu ne obhende na ndu doto inde lingo ngade 'ngu na Djulɔdani libhomu adɔ ago nadje engú inde ani adɔ akpokpo e-o. <sup>6</sup> U adɔ ambamba ta osisiti 'ngú gba o-o kala ndɔ okpála hana. Djaa atsia adɔ abatisa uo bhú ngade 'ngu na Djulɔdani.

† 3:3 3:3 Tsia bhú Isa. 40:3.



<sup>7</sup> Bhiti omuFalisai di ne oSadukai adu ago ngu nasia batisimo. Li Djaa au lie mo-o, ani atsia ayi uo me: «Ngayi opiga kpulu inde-e, a asuno pi yi da me yi kpe egu gba Ebhe inde ngago-o? <sup>8</sup> La-a, yi suno bhu okulu gba yi-e me yi adji bua yi adji, <sup>9</sup> amba yi 'o nabhundja li bhobua yi makpe me: <Engu li ya ade anga Abalahama ne ogbi ya.> Padha de, anga ma ngapa pi yi me, Ebhe ti da nagbe ongisi pi Abalahama bhu ka oteme yi ngau e inde-e mada yi. <sup>10</sup> 'E-e! Mbia inde-e, ngbakpa a'o lie bhu li 'dhu ondula-a ngubula nadodolo. Ndu ndula hana inde i li lili na babadha de-e, u ade, u tsia bhike bhu djua. <sup>11</sup> Ngama-a, ma ngabatisa yi bhu engu ngu nasuno me yi adji bua yi adji. Engu bini, kpala bhende i ngago pita ma-a, ane ma ne angu. Ma la ne mangua tetele kpala dho me ma gbe malokoh bhu 'dhu ani-e! Ngaani-e, ani abatisa yi ne Bu Bhobua di ne djua. <sup>12</sup> Ani aholo kakpa gba e sa 'kpa e ngu nape fufukudha bhu nguwa gba e amba ni bu nguwa bhu ngbokopi. Engu bini, fufukudha-a, ani atsulu bhu djua inde na duduma ne duduma.»

*Yesu asia batisimo  
(Tsia bhu Mlk. 1:9-11; ne bhu Luk. 3:21-22; di ne bhu Dja. 1:29-34.)*

<sup>13</sup> Abhomu-o, Yesu ayie bhu Galilaya, ani anu abhaka Djaa bhu ngade 'ngu na Djuludani ngu nasia batisimo ka ani. <sup>14</sup> Djaa di me yala. Ani atsia adu apa me: «Ma sia mangbo batisimo ka mu ngama. Mu ngago mata abhaka ma ngamu!» <sup>15</sup> Engu bini, Yesu atsia agie pi ani me: «Ziba me

amene lie moko mbia inde. Padhá de, anga a ayo me ní mene ndu 'ngú hana inde li Ebhe ayo e ka ní-o.» Abhomu-o, Djaa atsia aziba me amene lie moko. <sup>16</sup> Li Yesu asia batisimo lie, ani atsia akoto bhú 'ngu-o. Me-e, kokpí abhulu lie. Ani atsia au Bu Bhobua gba Ebhe-e ngakø maka pidjo, a nde ngago pí ani. <sup>17</sup> Abhomu-o, eli bini atsia ayie abhúlá ne napa me: «A inde-e ndili gba ma na mukunda-o. A ko kpúkprú na bua ma.»

## 4

### *Djabulu ale Yesu*

*(Tsia bhú Mlk. 1:12-13; di ne bhú Luk. 4:1-13.)*

<sup>1</sup> Abhomu-o, Bu Bhobua atsia amba bhúla Yesu abhú mili bili ngubula me djabulu le ani.

<sup>2</sup> Pita namene ngbikpi ndjikpa badha ne sukpe ndjikpa badha mandí nazu 'he-e, ani adje gumu.

<sup>3</sup> Djabulu, kpála inde adji ale ani-e atuto lie de ani. Ani atsia apa pí ani me: «Í du me mu nde ne Ndili gba Ebhe-e, ha líli pí oteme inde-e me akolo mapa.» <sup>4</sup> Engú bini, Yesu agie me: «U aye bhú Bhuku me:

«Kpála kóbho bha bini ka ezu de,

engú bini, ani akóbho ka ndu oeli hana inde i ngakoto bhú 'bhø Ebhe-o.†»

<sup>5</sup> Abhomu-o, Djabulu aha ani, anu ne ani bhú Yelusalema, gudhu na bubu-o. Ani atsia a'o ani pí tulundji 'ngbé 'ti Ebhe gba omaYuda-o. <sup>6</sup> Do ani pí Yesu de me: «Í du me mu nde ne ndili gba Ebhe-e, 'ulu mu kø kuto! Padhá de, anga u aye bhú Bhuku me:

† 4:4 4:4 Tsia bhú Det. 8:3.

«Ebhe ahá líli pí oandjelu gba e ngú mụ.

U tsia bí mụ sa 'kpa o

ngubula me mo otú 'dhu mụ li teme bini de.†»

<sup>7</sup> Yesu apa pí ani me: «U aye di bhú Bhuku gba Ebhe-e me: «Mo olé Ebhe, Ngámá gba mụ-o de.†»» <sup>8</sup> Djabulụ anụ a'o matá ani pí 'ndjá eta na ndjándjá nane mane. Ani atsia apana pí ani ndụ naụ na doto hana bhú dabilí bini ne sangu gba o-o. <sup>9</sup> Ani atsia apa pí ani me: «Ndụ 'he inde-e hana, ma ahá pí mụ i dụ me mụ nde akikita lipụkụ mụ kuto kala ma ngú nadhөгө ma-o.»

<sup>10</sup> Abhomụ-o, Yesu atsia apa pí ani me: «Yie oo ko, Satana ! Padhá de, anga u aye bhú Bhuku me:

«Dhөгө Ebhe 'ngbé Ngámá gba mụ-o, amba mụ yo la bhadi ani kpi e kpi.†»»

<sup>11</sup> Abhomụ-o, Djabulụ a'o ka ani. Me-e, oandjelu ago de ani, u atsia aholo nateteke ani.

### *Yesu asuno bhú Galilaya*

*(Tsia bhú Mlk. 1:14-15; ne bhú Luk. 4:14-15; di ne bhú Dja. 4:1-3, 43-46.)*

<sup>12</sup> Lí Yesu adje lie me u aholo Djaa-a,\* ani atsia agbe lie ne abhú ndu doto na Galilaya. <sup>13</sup> La-a, ani nụ bhú kuti na Nadjaleta de, ani anụ mangbo bhú Kapitalanauma, dengo ekpө na Galilaya, bhú kuti gba okpála na Djabulona ne Nefitali. <sup>14</sup> Ani amene mo-o ngubula me engú nani lí polofeta Isaya apa e amene lie. Engú nani ani apa e me:

† **4:6** 4:6 Tsia bhú Ets. 91:11-12. † **4:7** 4:7 Tsia bhú Det. 6:16.

† **4:10** 4:10 Tsia bhú Det. 6:13. \* **4:12** 4:12 Djaa: A ko Djaa bhende Bhulụ nabatisa okpála-o.

15 «Ngayi okpála na doto na Djabulona ne Nefitali,  
 ne yi okpála na kpadji na ekpø,  
 ne yi okpála na kuti inde ayi 'ngu na Djuludani,  
 inde akolo mbia inde-e okpála na Galilaya  
 inde li ogandji okpála ngadulu bhú e-e,  
 yi dje nga engú inde!

16 Ngayi okpála inde adúdu bhú biti má  
 ndundulundu-o,  
 yi aú zì 'kpí na ngbéngbé na kuo kuo.  
 A akunda napa me zì 'kpí ang-o akóto pí yi  
 okpála inde abedhe ndu 'kpí hana ne tsulu  
 kuo-o.†»

17 Nayie li nedhinga bhomu-o, Yesu aholo  
 akpokpo mbámbá me: «Yi dji bua yi. Padhá de,  
 anga Nau na abhúlá akolo masakpe.»

*Yesu a'í omukpata na gigena*

*(Tsia bhú Mlk. 1:16-20; ne bhú Luk. 5:1-11; di  
 ne bhú Dja. 1:35-51.)*

18 Li Yesu adu adhuku lie lingo ekpø na  
 Galilaya-a, ani au obhosi bhisi me u nde ngagbe  
 sungu. A adu ondaise. A adu Simo inde u agisila  
 'li e me Piele ne ndai e Andili. 19 Ani atsia apa pí  
 uo me: «Yi go kpata ma, amba ma mene me yi  
 du ibili nagili okpála pí Ebhe maka yi agbegbe  
 osungu lie-o.» 20 Ma gala kolo me-e, u abala  
 'kpa li onado gba o-o, u atsia anu ne uo. 21 Yesu  
 adyudyo matá lie ne kalanu, ani au obhosi koko  
 bhisi, a adu Djaki ne uo ne ndai e Dja , ongisi  
 gba Djebedayo-o. U adu bhú zabu gba o bhú  
 dabili bini ne 'dyi o me u nde ngaleke onado gba

† 4:16 4:15-16 Tsia bhú Isa. 8:23 - 9:1.

o-o. Aní a'i uo me u go kpata ni. <sup>22</sup> Ma gala me-e, u a'o ka 'dyi o ne zabu gba o-o. U atsia anu ne uo.

*Yesu asuno pi okpála, ani atsia akobho di obhulu kuo*

*(Tsia bhú Mlk. 1:39; di ne bhú Luk. 4:44, 6:17-18.)*

<sup>23</sup> Abhomu-o, Yesu adhuku bhú Galilaya libhomu. Aní adu asuno bhú oeti nadje líli gba Moidje inde na ndu doto bhomu-o. Aní adu di akpokpo Bádha Ngali Nau na abhúlá-o. Aní atsia adu di akobho ndu okuo hana di ne ndu eze hana li okpála adu ne e-o. <sup>24</sup> Abhomu-o, ngali gba aní ayangba bhú ndu doto na Silia libhomu. U atsia ago pi aní ne okpála inde adu ne okuo ngangá-a hana: obhende li ositi bua adu ato mbolo li o, obhende li kuo nagbulu magbulu adu amene o, ne obhende na eze. Aní atsia akobho uo. <sup>25</sup> Abhomu-o, okpála bhelé inde ayie bhú Galilaya, ne bhú ogudhu Ndjikpa, ne bhú Yelusalema, ne bhú Yudaya la di ne ayi 'ngu na Djuludani atsia akpata aní.

## 5

*Djali na kukulu*

*(Tsia bhú Mlk. 3:13; di ne bhú Luk. 6:12-13, 20-23.)*

<sup>1</sup> Li Yesu au bhiti okpála lie-e, aní a'ch apí 'ta. Aní adu kuto, omukpata gba aní-e atsia adyudyo lio de aní. <sup>2</sup> Abhomu-o, aní aholo nasuno pi uo me:

<sup>3</sup> «A ko djali pi okpála inde ngau lio padhá kala Ebhe,

- anga ngauo-o, Naɯ na abhúlá-a pi uo.
- 4 A ko djali pi obhende ngaku 'gbá,  
anga ngauo-o, Ebhe akúo ngula sala uo ngae.
- 5 A ko djali pi obhende na bhukɯ bua,  
anga ngauo-o, u agbógbo bhɯsɯ o li doto inde  
li Ebhe apana e pi uo-o.
- 6 A ko djali pi obhende akunda bha ndjɯ namene  
ngbili 'ngú ,  
anga ngauo-o, Ebhe améne me u dɯ bedhe  
ngú namemene.
- 7 A ko djali pi obhende ngadje ndjinga okpála  
koko,  
anga ngauo-o, Ebhe adjé ndjinga uo.
- 8 A ko djali pi obhende bubu li bua o,  
anga ngauo-o, u aú Ebhe.
- 9 A ko djali pi obhende ngato guo 'ngú sɯnda  
okpála,  
anga ngauo-o, u a'í uo me ongisi gba Ebhe.
- 10 A ko djali pi obhende u ngato mbolo li o ka  
anga u ngamene ngbili 'ngú,  
anga ngauo-o, Naɯ na abhúlá-a pi uo.
- 11 A ko djali pi yi i dɯ me okpála nde ngasobho yi,  
u nde ngato mbolo li yi, u nde di ngapa ndɯ sisiti  
'ngú li yi hana ne eu ka yi abhuka ma lie-o. <sup>12</sup> Yi  
mbila me, u ato bhadi nani mbolo li opolofeta na  
kalanɯ-o moko. Kaka-a, yi dɯ bhú djali, amba yi  
dɯ di bhú ndjili, anga makalá gba yi inde abhúlá-  
a adú ngbéngbé.»

*Yi ne ngɯtɯ di ne zi 'ke na píla doto  
(Tsia bhú Mlk. 9:50; di ne bhú Luk. 14:34-35.)*

13 «Ngayi-e, yi ne ngutu na píla doto. I du la me ngutu nde andapa-a, a akólo matá dédé lele pí? A matá li kulu ade. A ayo bha ibili nababala kilidjo, li okpála tsia dédele ne 'dhu o.

14 Ngayi-e, yi ne zi 'ke na píla doto. Gudhu inde ayiki lie pí eta-a, a awó lie belegu de bini. 15 U dhedhe eke-e, a ko ngú na'o'o asa lusa de. Engú bini, a ko ngú na'o'o apí misa ngubula me aziga ndu okpála inde abhú 'ti-e hana. 16 A bhadi pí yi moko. A ayo me zi yi suno lie bhú djila ndu okpála hana ngubula me u u babadha kulu gba yi-e, u de dhøø 'Dyi yi inde abhúlá-o.»

*Yesu go ngú nabhøø líli gba Moidje-e de*

17 «Yi abhúndja de me ma ago ngú nabhøø líli gba Moidje di ne me ma ago nabhøø nasuno gba opolofeta-a\* de. Ma go ngú nabhøø de. Engú bini, ma ago mangbo ngubula nambamba tata hana. 18 Ma apa pí yi na paká me: abana li kokpí ne doto bhue bha pí-ie, ndu 'ngú hana inde bhú líli gba Moidje-e, améne lie. U búlu belegu mboye 'dhu balua, i du di-e mboye 'kpú balua bini bhúbhú de, nakolo bha li sokpí. 19 Kaka-a, kpála bhende i gumu mboye 'ngú bhú ká olíli gba Moidje-e, ani suno la di pí okpála koko namene mo-o, ani adú kpála na yeye bhú Nau na abhúlá. Engú bini, kpála bhende i lila-a, ani nde di ngasusuno pí okpála koko-o, ani adú kpála na ngbéngbé bhú Nau na abhúlá. 20 Ma pa pí yi mo-o padhá de, anga li ngbili 'ngú gba yi-e du

\* 5:17 5:17 Líli gba Moidje di ne ongú inde li opolofeta aye e, a ko Gandja na Didili-e libhomu.

ngbéngbé nane bhende gba omusuno na líli gba Moidje ne omuFalisai-e mane de-e, yi ti da nali bhú Nau na abhúlá-a de.»

*Yesu asuno pindji nake 'ngú lio*

*(Tsia bhú Mlk. 11:25; di ne bhú Luk. 12:57-59.)*

<sup>21</sup> «Yi adje me u apa nani pi onguo ogbi yi me: <Mo obhólè kpála de. Kpála bhende i bhólè kpála bhú gandji-e, a ayo me u gbe ani kala Libi okpála natsia 'kpí li 'ngú gba omaYuda .>† <sup>22</sup> Engú bini, ngama-a, ma ngapa pi yi me: kpála bhende i bi 'gú ne ndai e, a ayo me u gbe ani bhú tilibinale. Kpála bhende i pa pi ndai e me: <Mu ne ngingi>, a ayo nagbe ani kala Libi okpála natsia 'kpí li 'ngú gba omaYuda-o. Kpála bhende i sobho ndai e me: <Mu ne bhulú pele>, a ayo me u bhike ani bhú dé djua na dudu-ma-o. <sup>23</sup> I du me mu nde adji naha makiso pi Ebhe li bili natsulu enu pi ani-e, i du la me mu nde abhundja me ni amene siti 'ngú li pabili gba ndai ni-e, <sup>24</sup> mu de 'o ka makiso gba mu-o kala bili natsulu enu-o oo, amba mu gie ngaiza limu nato guo 'ngú sunda yi ne ndai mu. Pipita la-a, mu go ha makiso gba mu-o pi Ebhe.

<sup>25</sup> I du di me kpála nde akunda nagbe mu kala odjudji-e, yi de dje kolo liyi ne ani me yi nde nga bha li kpadji, ngubula nalila me kpála yi nde ne e bhú 'ngú-o agbe mu bhú tilibinale de, amba djudji a'í polisi de me ani to mu bhú tikpu-o de. <sup>26</sup> Ma apa pi mu na paká me, mu ti da nakoto oo padhá de i du me mu nde di mangimbo bhomu-o nakolo li senge na soso-o de ko.»

† 5:21 5:21 Tsia bhú Eki. 20:13; di ne bhú Det. 5:17.



*Nasuno pɪndji nakunda bhoko, i dɜ di-e ɔlɔ koko*

*(Tsia bhú Mat. 18:8-9; di ne bhú Mlk. 9:43, 47-48.)*

<sup>27</sup> «Yi adje me u apa nani me: <Mo okúnda bhoko, i dɜ di-e ɔlɔ koko de.†> <sup>28</sup> Engú bini, ngama-a, ma apa pi yi me: kpála bhende i tsia ɔlɔ koko ne gumu ani-e, kpála ango-o akunda ɔlɔ ango-o li bhobua e akunda.

<sup>29</sup> I dɜ me lí djila mu na kokpa nde ngato mu bhú siti 'ngú-o, mu de gbe, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na dɜdɜma. <sup>30</sup> I dɜ la di me 'kpa mu na kokpa nde ngato mu bhú siti 'ngú-o, mu de kodho, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na dɜdɜma.»

*Nasuno pɪndji nagbo bhɜsɜ o bhú kɜva*

*(Tsia bhú Mat. 19:7-9; ne bhú Mlk. 10:4-5; di ne bhú Luk. 16:18.)*

<sup>31</sup> «U apa di nani me: <I dɜ me kpála bini nde agie wala e-e, a ayo me ani ye balua inde li ongámási adéle 'kpa o bhú e pi ani. Balua ango-o asúno ngae me ani atse ani atse.†> <sup>32</sup> Engú bini, ngama-a, ma apa pi yi me, kpála bhende i 'e wala e me ani nde holo ani ne bhoko koko de-e, ani ngakata ani bhú nakunda bhoko koko. A akunda napa me, kpála bhende i ha ɔlɔ inde li

---

† **5:27** 5:27 Tsia bhú Eki. 20:14; di ne bhú Det. 5:18. † **5:31** 5:31 Tsia bhú Det. 24:1.

bhoko koko agie e, ani akunda bhomu-o eḷe gba kpála koko.»

*Nasuno pindji natu silika*

<sup>33</sup> «Yi adje matá nani me u apa pi onguo ogbi ní me: <Mo ogúlu silika mo otu e de. Engú bini, mene engú mo otu silika li e kala Ngámá-o.> <sup>34</sup> La ngama-a, ma apa pi yi me, yi atu silika belegu de bini: yi atú silika ne 'li kokpí de, anga a bhomu-o bili li Ebhe ngadu li e-o. <sup>35</sup> Yi atú silika ne 'li doto de, anga a ko bili inde ani nga'o 'dhu e li e ko. Yi atú silika ne 'li Yelusalema de, anga a ko gudhu gba Ebhe, 'Ngbé Ngámá. <sup>36</sup> Mo otú la di silika ne 'li 'ndji mu de, anga mu ti da nadjí lí sundjo mu bini de me akolo bubu, i du di-e bibili-e de. <sup>37</sup> I du me yi nde ngagama 'ngú-o, yi de pa bha me: <A moko>, di ne me <A mo-o ade.> Padhá de, anga ndu ongu bhe pépé-e hana ayie ka Djabulu.»

*Nasuno pindji nagie siti pi siti*

*(Tsia bhú Luk. 6:29-30.)*

<sup>38</sup> «Yi adje nani me u apa me: <Li kpála du djila mu-o, mu de du di djila ani>, u apa di me: <Li kpála gumu 'te mu-o, mu de gumu di 'te ani.>† <sup>39</sup> La ngama-a, ma apa pi yi me, i du me kpála nde amene siti 'ngú li yi-e, yi agísila de. Engú bini, i du me kpála bini nde asu pabhø mu na kokpa-a, mu de dji di pabhø mu na gali-e pi ani, amba ani su di. <sup>40</sup> I du me kpála bini nde akunda nagbe mu bhú ngbanga ngubula simisi gba mu-o, mu de 'o di ká koti gba mu-o pi ani. <sup>41</sup> I du me

† 5:38 5:38 Tsia bhú Eki. 21:24; ne bhú Lev. 24:20; di ne bhú Det. 19:21.

kpála nde aholo mụ ne kpéke me mụ bi 'he gba ni-e ngụbula kilometele bini-e, mụ de bi bha ibili pi ani ngú kilometele bhisi. <sup>42</sup> I dū me kpála nde ayo 'he ka mụ-o, mụ de ha pi ani. I dū me kpála nde ayo bopulu ka mụ-o, mụ de ha pi ani. Mo oyála naha bopulu pi kpála inde akunda nayoyo ka mụ-o de.»

*Nasuno pindji nakunda bhulụ yala gba o  
(Tsia bhú Luk. 6:27-28, 32-36.)*

<sup>43</sup> «Yi adje me u apa nani me: <Kunda kilí mụ, amba mụ yala bhulụ yala gba mụ-o.†> <sup>44</sup> Engú bini, ngama-a, ma apa pi yi me, yi kunda obhulụ yala gba yi ko. Yi yo Ebhe pi obhende ngato mbolo li yi-o. <sup>45</sup> Yi mene mo-o, yi dú ne kukulụ ongisi gba 'Dyi yi inde abhúlá-o. Padhá de, anga ani ngagbe zindjila gba e pí osisiti okpála di ne pí obabadha okpála. Ani ngatuko ebha pí okpála na ngbingbili di ne pí obhende na ngbingbili ade ko. <sup>46</sup> Ma pa mo-o padhá de, anga i dū me yi nde ngakunda bha obhende ngakunda yi-e, yi asía tété mangua makalá dho? Ondombi na mandjandja bhadi ngamemene moko! <sup>47</sup> I dū la di me yi nde ngayi bha bini ondaise yi-e, yi ngamene bhomụ-o mangua ngamba 'ngú dho? Omupagano bhadi ngamemene moko. <sup>48</sup> La ngayi-e, yi dū ngbingbili bhú ndū 'ngú hana maka li 'Dyi yi inde abhúlá-a nde lie ngbingbili ko.»

## 6

*Nasuno pindji napụ 'he pi obhulụ ndibhili*

† 5:43 5:43 Tsia bhú Lev. 19:18.

<sup>1</sup> «Yi lila liyi me yi améne bádha 'ngú gba yi-e kala okpála de me u u yi mau-o de. I dū mo-o de-e, yi sía makalá ka 'Dyi yi inde abhúlá-a de. <sup>2</sup> Nedhinga inde mü ngapü 'he lie pi bhulü ndibhili-e, mo oméne de me ni bhi tété makpø maka li obhulü kali amemene lie bhú oti nadje líli gba Moidje di ne li ohi kpadji-e de. U memene mo-o ngubula me okpála dhøgø o. Ma apa pi yi na paká me u asia makalá gba o asia. <sup>3</sup> La pi mü-o, nedhinga mü ngapü 'he lie pi bhulü ndibhili-e, a ayo de me 'kpa mü na gali-e mbila ehe inde li 'kpa mü na kokpa ngamene e de. <sup>4</sup> A moko, a ayo me napü 'he gba mü-o tigala bhú pepe, amba 'Dyi mü inde ngau 'kpí bhú pepe-e gie pi mü ngae.»

*Nasuno pindji nayo Ebhe*  
(*Tsia bhú Luk. 11:2-4.*)

<sup>5</sup> «Nedhinga yi ngayo Ebhe lie, yi adú maka obhulü kali de. Padhá de, anga u kukunda nayo Ebhe me u nde alü malü bhú oti nadje líli gba Moidje di ne li odi-kpadji, amba okpála dū au o mau. Ma apa pi yi na paká me u asia makalá gba o asia. <sup>6</sup> La pi mü-o, nedhinga mü ngayo Ebhe lie, a ayo me li bhú tina 'ti gba mü-o. Dho bhøbhø nganda mü madho, amba mü yo 'Dyi mü inde li bíli na pepe bhomü-o. Abhomü-o, 'Dyi mü inde a uu 'kpí bhú pepe hana-a, tsia há makalá pi mü ngae. <sup>7</sup> Nedhinga yi ngayo Ebhe lie, yi agíe liyi pí oeli bini bhutsibhutsi maka omupagano de. Padhá de, anga u ngabhundja me Ebhe adjé o i dū me o nde ngakpokpo kambí oeli. <sup>8</sup> Yi améne maka uo de, anga 'Dyi yi mbila ehe yi nde ne

gumɔ e hana kala me yi yo ka ani-o. <sup>9</sup> Ngayi-e, yi yoyo Ebhe me:

<'Dyi ya inde abhúlá,

a ayo me kpála ne kpála mbila me,  
mɔ ne Ebhe inde bubu.

<sup>10</sup> A ayo me mɔ go ɔ ngámá píla doto.

A ayo me kpála ne kpála píla doto mene  
mukúnda

gba mɔ-o maka i ngamene lie lie abhúlá ko.

<sup>11</sup> Ha ezɔ inde ati ne ya li 'kpí na naki-e pi ya.

<sup>12</sup> 'E siti 'ngú gba ya inde ya amene e li pabíli gba  
mɔ-o.

Padhá de, anga ngaya makpe ya ngambu di  
li obhende ngamene osisiti 'ngú li pabíli  
gba ya-o.

<sup>13</sup> I dɔ me ya nde ali bhú nale-e,

mo o'ó de me ya mene siti 'ngú-o de.

Engú bini, lila ya sakpa Djabulɔ malila.

[Padhá de, anga Naɔ ne angu la di ne sangu ,

a ko naamɔ 'he, dɔdɔma ne dɔdɔma. A adɔ  
moko.]>

<sup>14</sup> I dɔ me yi nde ngambu li osisiti 'ngú gba  
okpála-a, 'Dyi yi inde abhúlá-a a'é bhadi osisiti  
'ngú gba yi-e moko. <sup>15</sup> Engú bini, i dɔ me yi nde  
mbu li osisiti 'ngú gba okpála de-e, 'Dyi yi 'é di  
osisiti 'ngú gba yi-e de.»

### *Nasuno pindji natse 'zɔ ngú nayo Ebhe*

<sup>16</sup> «Nedhinga yi ngatse 'zɔ lie ngú nayo Ebhe-  
e, yi aná bhúla yi maka obhulɔ kali amemene  
lie de. U memene mo-o ngú nasuno pi okpála  
me o ngatse 'zɔ ngú nayo Ebhe. Ma apa pi yi na

paká me u asia makalá gba o asia. <sup>17</sup> La pi mụ-o, nedhinga mụ ngatse 'zụ lie ngú nayo Ebhe-e, vùlụ bhúla mụ, amba mụ pulu ne emụ ndjindji, <sup>18</sup> amba okpála ambíla de me mụ ngatse 'zụ-o de. 'Dyi mụ inde ne ndụ bili hana, abana bhú bili na pepe-e, mbíla bha ngae kpi e kpi. Abhomụ-o, 'Dyi mụ inde a uu 'kpí bhú pepe hana-a, tsia há makalá pi mụ ngae.»

*Yesu apa me yi po bhúla tia gba yi-e abhúlá  
(Tsia bhú Luk. 12:33-34.)*

<sup>19</sup> «Yi apó bhúla tia pi yi píla doto inde-e de. Padhá de, anga yi po bhúla tia pi yi ei-e, opálanga ne mbelende síti, lí obhùlụ 'zi dúdụ pabu 'tí-e, u tsia zí. <sup>20</sup> Engú bini, yi po mangbo bhúla tia pi yi abhúlá. Padhá de, anga oo, opálanga ne mbelende ngú nasisiti ade, obhùlụ 'zi di ngú nadùdù pabu 'tí-e me u zi-e ade. <sup>21</sup> Padhá de, anga bili inde lí tia gba mụ nde lie, bua mụ dú bhadi oko.»

*Djila kpála ne zi 'ké na kute ani  
(Tsia bhú Luk. 11:34-36.)*

<sup>22</sup> «Djila kpála ne zi 'ké na kute ani. I dụ me djila mụ nde ndjindji-e, kute mụ libhomu dú lí zi 'kpí. <sup>23</sup> Engú bini, i dụ lí djila mụ ne kuo-o, kute mụ libhomu dú bhú biti. I dụ me zi 'kpí inde mụ ngabhundja me a bhú ni-e nde biti-e, biti ango-o né la matá dada mane.»

*Yi 'o bha nabhuka gba yi-e bhú Ebhe, yi a'ó bhú  
tia de  
(Tsia bhú Luk. 16:13.)*

24 «Kpála bini ti da namene kulu pi ongámási bhisi de. A akúnda napa me, ani ú bhe bini-e padhá, ani tsia tsé ani, ani kúnda bhe koko-o, ani tsia dhíka li ani. Yi ti da nadu bali pi Ebhe ne pi tia\* bhú nedhinga bini de.

25 Kaka-a, ma apa pi yi me, yi a'ó bua yi abhúlá ngubula mukobho gba yi-e de. Yi adú akina liyi de me ya azú si ni, di ne me ya andjí si ni-ie de. Mukobho gba kpála ane ezú mane adi? Yi akina di liyi de me ya adyí si ni-ie de. Kute kpála ane bongo mane adi? 26 Yi tsia nga maka li odhu nde lie abhúlá: u lulu 'dyi de, u gbegbe di nguwa abhiye de, u 'o'o la di 'he bhú ngbokopi de. Engú bini, 'Dyi yi inde abhúlá-a ngaku uo! La ngayi-e, yi ane uo ne tata. 27 A ko da bhú ka yi ka nakina lie i ti da na'o mbo ekpí koko pí mukobho gba e?

28 Ka ni la yi ngabhelo bua yi lie li 'ngú na bongo-o? Yi tsia nga maka li ofelele ngabhele lie abhiye: u memene kulu de, u dudu di bongo de. 29 Ma apa la pi yi me, abana 'ngbé ngámá Salomo bhú ká tia gba e hana-a, ani dyi belegu nani bongo maka suka uo de. 30 I du me Ebhe nde ngato bongo li ulu inde abhiye mo-o, ulu inde naki oo-o, inde u abhíke la mambi e bhú djua-a, ani méne pi yi ane mane di? Nabhuka gba yi-e yeye mo-o ka ni? 31 Ka 'ngú ango-o, yi akina liyi de me: <Ya azú ni? Ya andjí ni? Ya adyí li ya mangua bongo dho?> 32 Ndu ongú bhomu-o hana, omupagano ngagigili ngao. U gili ne ndala de. La-a, 'Dyi yi inde abhúlá-a, mbila ndjindji

---

\* 6:24 6:24 Tia: Bhú eli na Giliki-e, u aye me «Mamo», a akunda napa me na'o tia maka ebhe.

me yi ne gumu ndu 'he bhomu-o hana. <sup>33</sup> Yi gili ngaiza Nau gba Ebhe-e bhú dabili bini ne namene ngbili 'ngú inde ani akunda e-o. Pipita-a, li Ebhe tsia há di ndu oehe koko bhomu-o hana pi yi. <sup>34</sup> Kaka-a, bua yi angamba li 'ngú na mambi de. Mambi abhúndja 'ngú gba e ngae. A li ekpí bini ne bini ne likabhu inde ati ne e.»

## 7

### *Yi akódho 'ngú gba okpála koko de (Tsia bhú Luk. 6:37-38, 41-42.)*

<sup>1</sup> «Yi akódho 'ngú gba okpála koko de, amba Ebhe akódho di engu gba yi-e de. <sup>2</sup> Padhá de, anga lele maka yi ngakodho 'ngú gba okpála koko lie, Ebhe akódho bhadi engu gba yi-e moko. La di-e, ani améne bhadi pi yi maka yi ngamemene lie pi okpála koko-o. <sup>3</sup> Ka ni mu ngau mboye ku musoli inde bhú djila ndai mu-o lie, mu nde u la pála ndula inde bhú djila mu-o de? <sup>4</sup> Lele pi mu ti da napa pi ndai mu lie me: <Djedjeke, ma go gbe ku musoli inde bhú djila mu bhomu-o>, me a nde bhú djila mu ne pála ndula-a? <sup>5</sup> Bhułu kali, gbe ngaiza pála ndula inde bhú djila mu-o, amba pipita-a, mu tsia ú la 'kpí ndjindji ngú nagbe mboye ku musoli inde bhú djila ndai mu ko.

<sup>6</sup> Yi ahá ehe na bubu gba Ebhe-e pi obułu de, anga i du mo-o de-e, u gó sisidha yi má tsue tsue! Yi abála omayaka gba yi na tia bhelé-e pi opame de, ngú nakpe me u anú adedele ne 'dhu o de.»



*Nazi 'ndji o bhú mayo  
(Tsia bhú Luk. 11:9-13.)*

<sup>7</sup> «Yi yo 'he, amba u ha pi yi. Yi gili 'he, amba yi sia. Yi bhi bhoti, amba u 'u pi yi. <sup>8</sup> Padhá de, anga kpála bhende ngayo 'he ngasisia. Kpála bhende ngagili 'he ngauu. Kpála bhende ngabhi bhoti-e, u nga'ú'ú pi ani. <sup>9</sup> Bhú ká yi-e, a ko da inde i du me ndili gba ani-e nde ayo mapa ka ani-e, ani tsia há pi ani teme? <sup>10</sup> I du di-e me ndili nde ayo sungu ka 'dyi e, ani tsia há pi ani kpálu? <sup>11</sup> I du la me, ngayi okpála-kuti inde sisiti-e, yi nde ambila naha ohe na babadha pi ongisi gba yi-e, lele pi li 'Dyi yi inde abhúlá-a há ohe na babadha lie pi obhende ngayoyo ka ani-e de-e?»

*Líli na kúkulu  
(Tsia bhú Luk. 13:24.)*

<sup>12</sup> «Ndu 'ngú hana inde yi ngakunda me okpála mene e pi yi-e, yi mene di engú ango-o pi uo. A bhomu-o engú inde li líli gba Moidje apa e, la di ne ongu inde li opolofeta aye e-o.»

*Nasuno pindji okpadji bhisi kpikpikpi  
(Tsia bhú Luk. 13:25-27.)*

<sup>13-14</sup> «Yi li li bhoti bhende na mbomboye ko! Padhá de, anga a ngato kpála bhú mukobho ngae. La-a, kpadji ango-o dada kpekpeke. Kaka-a, okpála ngali li kpadji ango-o bhelé ade. Yi alí li bhoti bhende na ngebéngbé-e de. Padhá de, anga a ngato kpála bhú ngita ngae. La-a, dada kpekpeke ade. Kaka-a, okpála bhelé ngagbida li kpadji ango-o.»

*Opolofeta na eu*  
(*Tsia bhú Luk. 6:43-44.*)

<sup>15</sup> «Yi lila liyi ka opolofeta na eu-o malila. Padhá de, anga u ngago agba yi me u nde adyi kó kandelø, engú bini, abhú uo-o, a ko onate. <sup>16</sup> Yi ambíla uo li okulu gba o-o. U koko manga li ondula na eti de. U koko la di malibhombi li kobe de. <sup>17</sup> A moko, ndula na babadha ngali bhadi olíí na babadha. Engú bini, ndula na sisiti ngali bhadi olíí na sisiti. <sup>18</sup> Ndula na babadha ti da nali olíí na sisiti de, la di-e, ndula na sisiti ti da nali olíí na babadha de. <sup>19</sup> Ndú ndula hana inde i li líí na babadha de-e, u adé, u tsia bhíke bhú djua. <sup>20</sup> A moko, yi ambíla opolofeta na eu li okulu gba o-o.»

*Omukpata na kúkulu*  
(*Tsia bhú Luk. 13:25-27.*)

<sup>21</sup> «A ko de me okpála bhende ngapa muma me <Ngámá, Ngámá-a!> alí ndú o hana bhú Nau na abhúlá-a de. Engú bini, a alí bha bini ne obhende ngamene engú inde li 'Dyi ma inde abhúlá-a ngakunda e ko. <sup>22</sup> Li 'kpí nakodho 'ngú-o, okpála bhelé apá muma me: <Ngámá, Ngámá, ya mene nani kulu na polofeta ne 'li mụ di? Ya pandja nani osisiti bua bhú okpála ne 'li mụ di? Ya mene nani ongamba 'ngú bhelé ne 'li mụ di?> <sup>23</sup> La-a, ma tsia gie pi uo me: <Ngayi obhulú namene siti 'ngú inde-e, ma mbila nani yi belegu de bini. Yi gbe liyi de ma tsutsu!>»

*Oeti bhisi*  
(*Tsia bhú Luk. 6:47-49.*)

24 «A moko, ndu kpála hana inde adje eli inde ma apa e, ani atsia amene maka li eli ango-o apa lie, ani maka kpála na imbilangu inde a'o 'dhu 'ti gba e pí teme. 25 Ebha adhi, engu asi, anvi ago ne engu-o, a atsia atu lie li kute eti-o. La-a, eti-e ti de, anga odhudhu adu me a nde pí teme. 26 Engú bini, ndu kpála hana inde adje eli inde ma apa e, ani tsia mene maka li eli ango-o apa lie de-e, ani maka kpála bini na ngingi inde ayiki eti gba e pí sike. 27 Ebha adhi, engu asi, anvi ago ne engu-o, a atu lie li kute eti bhomu-o. Eti ango-o atuko kuto, a atsia atsambala hana!»

28 Li Yesu andjia nakpo ongu bhomu-o lie, ndu okpála hana atsia angamba li nasuno gba ani-e naali. 29 Padhá de, anga ani du nasuno pi uo maka omusuno na líli gba uo-o de. Engú bini, ani adu asuno pi uo maka ngámá.

## 8

*Yesu akobho bhulu kába bini*

*(Tsia bhú Mlk. 1:40-45; di ne bhú Luk. 5:12-16.)*

1 Li Yesu akø eta-a lie, okpála bhelé atsia akpata ani. 2 Abhomu-o, bhulu kába bini adyudyo lie, ani atutu lipuku e kuto kala ani. Ani atsia apa me: «Ngámá, i du me mu nde akunda-a, mu ti da nakobho ma.» 3 Yesu ato 'kpa e, ani 'o li kute ani ne napa me: «Ma akunda moko, kokobho!» Ma 'li ma me-e, kába agulu bha kolo li ani hana. 4 Abhomu-o, Yesu atsia apa pi ani me: «Gbo dje mu, mo opá 'ngú inde-e pi kpála bini de. Engú bini, nu suno bha limu pi dimandø gba Ebhe ,

amba m̄ ha makiso maka li líli gba Moidje apa lie ngubula nasuno pí okpála me mo okobho.\* »

*Yesu akobho kpála na kulu  
gba ngámá gba osudha na Loma*

*(Tsia bhú Luk. 7:1-10; di ne bhú Dja. 4:43-54.)*

<sup>5</sup> Abhom̄-o, Yesu ali bhú kuti na Kapalanauma. Aní adu ali lie oo, ngámá bini gba osudha na Loma† adyudyo lie de aní. Aní atsia akikiliki lie pí aní <sup>6</sup> me: «Ngámá, kpála na kulu gba ma-a asì kuto abhú 'ti. Aní agugum̄ kuto, aní ngadje líkabhu na kuo kuo.» <sup>7</sup> Yesu apa pí aní me: «Ngama-a, ma adjí akobho aní.» <sup>8</sup> Engú bini, ngámá gba osudha-a atsia agie me: «Ngámá, ma ne tetele kpála‡ ade, ngubula me m̄ li bhú 'ti gba ma-o. La-a, m̄ pa bha koli eli bini-e, li kpála na kulu gba ma-a kóbho. <sup>9</sup> Padhá de, anga ngama makpe-e, ma sa líli gba ngámá, ma la di ngaha líli pí osudha. Ma pa pí bhe bini-e me: <Nun̄!> Aní nú. Ma pa pí bhe koko-o me: <Gogo!> Aní gó. Ma pa pí bali gba ma-a me: <Mene 'he inde!> Aní méne.»

<sup>10</sup> Lí Yesu adje engú bhom̄-o lie, aní angamba naali. Aní atsia apa pí okpála inde adu akpata aní-e me: «Ma apa pí yí na paká me, ma bhaka nga ngua nabhuka inde-e bhú kpála bini bhú

---

\* **8:4** 8:4 Nasuno pí okpála me mo okobho: A ko nasuno me ní akpata líli gba Moidje ndjindji. Tsia bhú Lev. 14:2-32. † **8:5** 8:5 Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adu nani maYuda de. ‡ **8:8** 8:8 Ngámá bhom̄-o ambila nani ndjindji me líli gba omaYuda ziba de me maYuda bini li bhú 'ti gba kpála inde ne maYuda ade-e de.

ká omaɪsalaele de! <sup>11</sup> Ma atsia apa la di pi yi me: okpála bhelé ayíe ne andjongu di ne akati, u tsía dúlɔ pí dabili na anokomia bhú dabili bini ne Abalahama, ne Isaka, la di ne Yakobho bhú Naɯ na abhúlá ko. <sup>12</sup> Engú la bini, obhende ayo nani me u sia dabili bhomɔ-o, u abála uo bhú biti akilidjo. Oo, u adɔ naku 'gbá di ne nazɔ tate o.» <sup>13</sup> Abhomɔ-o, Yesu atsia apa pi ngámá gba osudha-a me: «Gie limɔ agba mɔ! Maka mo obhuka lie, a ayo me amene lie pi mɔ moko.» Kpála na kulu-o atsia akobho bha bini li nedhinga ango-o ko.

*Yesu akobho 'hi wala Piele*  
(*Tsia bhú Mlk. 1:29-34; di ne bhú Luk. 4:38-41.*)

<sup>14</sup> Pipita-a, Yesu ali bhú 'ti gba Piele. Aní abhaka me 'hi wala aní nde así kuto, kute aní nde kpákpá. <sup>15</sup> Yesu a'o 'kpa e li 'kpa aní, kute aní atsia aguo. Aní ayie bhúlá, aní atsia aholo nalɔ 'zɔ pi aní.

*Yesu akobho okpála bhelé*

<sup>16</sup> A akolo lie tagolo-o, u ago pi Yesu ne okpála bhelé inde li osisiti bua adɔ nadɔ bhú o-o. Aní apandja osisiti bua ango-o ne 'li e, aní atsia akobho di ndɔ okpála na kuo hana. <sup>17</sup> Aní amene mo-o ngubula me eli inde li polofeta Isaya apa nani e amene lie. Engú inde aní apa nani e me: «Aní abha ndɔ olikabhu gba ya hana, aní atsia abi ndɔ okuo gba ya hana li kute e.†»

† 8:17 8:17 Tsia bhú Isa. 53:4.

*Líli pí okpála inde akúnda nakpata Yesu  
(Tsia bhú Luk. 9:57-62.)*

<sup>18</sup> Lí Yesu au kambì okpála lie lingo e, anì atsia aha líli pí omùkpata gba e me o kodho 'kpí ne ayi ekpè na Galilaya. <sup>19</sup> Abhomù-o, m̀suno bini na líli gba Moidje adyudyo lie, anì atsia apa pí Yesu me: «M̀suno, ma akpáta m̀ li ndu bìli mo onú li e hana.» <sup>20</sup> Yesu apa pí anì me: «A ka onekpè ne gudho u asisi bhú e, a di ka odhu ne 'tì o. Engú la bini, ngama Ndìli gba kpála-a, dabilì ka ma ngú nasi tété ngú nago ade.» <sup>21</sup> Kpála koko inde adu di sùka omùkpata gba anì-e apa pí anì me: «Ngámá, ha kpadji m̀ma, amba ma nu zì ngaiza 'dyi ma.» <sup>22</sup> Engú bini, Yesu apa pí anì me: «'O okpála koko u zì anì ngao. § La ngamù-o, go kpata ma.»

*Yesu ayoko anvi na kpekpeke*

*(Tsia bhú Mlk. 4:35-41; di ne bhú Luk. 8:22-25.)*

<sup>23</sup> Pipita-a, Yesu a'ù bhú zabù, omùkpata gba anì-e atsia a'ù'ù nganda anì. <sup>24</sup> Ma gala kolo me-e, anvi bini na kpekpeke aholo nape pí ekpè-o masikpe de me zabù-o linda ka ngbo 'ngu-o. La ngaani Yesu-o, anì adu tila. <sup>25</sup> Abhomù-o, omùkpata-a adyudyo lio de anì masikpe, u atsia azukù anì ne napa me: «Yaka! Ngámá, kobho ní, ní adjì amú!» <sup>26</sup> Yesu atsia agie pí uo me: «Yi

---

§ 8:22 8:22 'O okpála koko u zì anì ngao: Bhú eli inde u aye nani Gandja na Mbia bhú e-e (eli gba oGiliki), u aye me: «'O okpála bhende amu-o, u zì okuo gba o-o.» A akúnda napa me: «'O okpála bhende i bhuka nga de-e me u zì okpála bhende amu-o.»

ne tsulɔ mo-o ka ni? Nabhuka gba yi-e nga bha yeye!» Aní ayie bhúlá, aní ambe bhú 'ndji anvi di ne engu-o. Abhomɔ-o, ndundɔ hana atsia akolo guguo! <sup>27</sup> Okpála angamba, u atsia adɔ apa me: «Kpála inde-e, a ko mangua kpála dho ngɔbula me belegɔ anvi di ne engu dɔ namanga ani-e!»

*Yesu akobho okpála bhisi li osisiti bua adɔ nadɔ bhú o-o*

*(Tsia bhú Mlk. 5:1-20; di ne bhú Luk. 8:26-39.)*

<sup>28</sup> Li Yesu akolo lie ayi 'ngu, bhú doto gba okpála na Gadala-a, \* okpála bhisi ayie bhú ká olata, u atsia ago abhaka ani. A adɔ bhú okpála ang-o ne osisiti bua, u atsia adɔ azi 'gú naali. Kaka-a, okpála dɔ apɔ li kpadji li pápá bhomɔ-o de. <sup>29</sup> Abhomɔ-o, u aholo nasusula me: «Mo okunda namene ngú ya pi, Ndili gba Ebhe? Mo ogo ei ngú nato mbolo li ya kalanɔ me nedhinga nakodho 'ngú-o nde kolo nga di?» <sup>30</sup> A abhaka me de bili ang-o, 'ngbé piga opame† nde oo, u nde ngazɔ 'he. <sup>31</sup> Osisiti bua adɔ nakikiliki lio pi Yesu me: «Í dɔ me mɔ nde akunda napandja ya-a, mba ya bhú piga opame inde.» <sup>32</sup> Aní apa pi uo me: «Yi nɔnɔ.» U aze bhú okpála bhomɔ, u atsia anɔ alili bhú opame-o. Me-e, ndɔ opame ang-o hana akɔ eta ne holo, u anɔ atuko bhú 'ngu má dhululu, ne namu ka o.

<sup>33</sup> Omulila gba uo atsi ne holo, u agbida bhú gɔdhɔ, u atsia akpokpo ndɔ 'ngú hana di ne

---

\* **8:28** 8:28 Gadala: A ko nani gɔdhɔ ka omaYuda de. † **8:30** 8:30 Opame: Pi omaYuda-a, pame nani ne enɔ na sisiti. Kaka-a, u 'o nani uo de. A dɔ bha nani na'o opame ne okpála inde naao ne omaYuda ade ko. Tsia bhú Mlk. 5:11.

engú inde akodho 'kpí li okpála bhisi inde adu ne osisiti bua bhú o-o. <sup>34</sup> Me-e, ndu okpála hana na gudhu angoo anu ngu nabhaka Yesu. U au ani lie, u atsia akikiliki lio pi ani me ani yie bhú kuti gba o mayie.

## 9

*Yesu akobho kpála inde agugumu kuto  
(Tsia bhú Mlk. 2:1-12; di ne bhú Luk. 5:17-26.)*

<sup>1</sup> Pipita-a, Yesu a'u bhú zabu, ani agulu matá ekpo-o, ani atsia akolo bhú Kapalanauma, gudhu ani adu nadu bhú e-o. <sup>2</sup> Me-e, okpála ago pi ani ne bhoko bini inde agugumu kuto. U ago ne ani pí kalagba. Li Yesu au nabhuka gba uo lie, ani atsia apa pi kpála inde gugumu e bhomu-o me: «Atou, ndika ma, u a'e osisiti 'ngú gba mu-o a'e.» <sup>3</sup> Abhomu-o, omusuno koko na líli gba Moidje atsia apa li bua o me: «Kpála inde-e ngasobho Ebhe!»

<sup>4</sup> Li Yesu ambila mabhundja gba uo lie, ani atsia apa pi uo me: «Ka ni yi ngabhundja lie li bua yi sisiti mo-o? <sup>5</sup> Padhá de, anga ane ne bhuku ne bhedho? Ne napa me: <U a'e osisiti 'ngú gba mu a'e>, ne napa me: <yie bhúlá, dhudhuku?> <sup>6</sup> Ngú nasuno me ngama, Ndili gba kpála, ma ne angu píla doto ngu na'e osisiti 'ngú-o, a ayo me ma kobho bhoko inde.» Abhomu-o, ani atsia apa pi kpála inde agugumu-o me: «Yie bhúlá, ha kalagba gba mu, amba mu gie limu agba mu!» <sup>7</sup> Kpála angoo ayie bhúlá, ani atsia atapa agba e. <sup>8</sup> Li okpála au 'ngú angoo lie, a'o tsalu li uo naali,



u adhogø Ebhe inde aha ngua angu bhomu-o pi okpála-kuti-o.

*Yesu a'i Matié*  
(*Tsia bhú Mlk. 2:13-17; di ne bhú Luk. 5:27-32.*)

<sup>9</sup> Pipita-a, Yesu ayie oo. Aní adu akodho 'kpí lie, aní au kpála bini, a adu 'li aní me Matié. Aní adu me aní nde adu kuto bhú bilo inde u adu akala mandjandja bhú e-o. Aní apa pí aní me: «Kpata ma!» Matié ayie bhúlá, aní atsia akpata aní. <sup>10</sup> Pipita-a, Yesu anu nazu 'he abhú 'ti gba aní. Abhomu-o, bhiti ondombi na mandjandja di ne okpála koko na sisiti ago adulu nazu 'he bhú dabili bini ne Yesu di ne omakpata gba e-o. <sup>11</sup> Li omuFalisai au lie mo-o, u atsia ayi omakpata gba aní-e me: «Ka ni li musuno gba yi-e ngazu 'he lie bhú dabili bini ne ondombi na mandjandja di ne okpála na sisiti-e?» <sup>12</sup> La-a, Yesu adje engú angu-o, aní atsia apa me: «Okpála bhende ne kuo ade-e, u ne gumu mutia ade. Engú bini, okpála bhende ne kuo mangbo ne gumu mutia ngao. <sup>13</sup> Kaka-a, yi nu gili ta 'ngú inde li Bhuku gba Ebhe-e apa e me: «Engú inde anga li ma naali-e, a ko nadjé ndjinga okpála koko, a ko naha makiso de.» Padhá de, anga ma go na'i okpála bhende apa me o ngbingbili-e de. Engú bini, ma ago mangbo na'i okpála bhende au lio me o ne osisiti okpála-o.†»

---

† 9:13 9:13 Tsia bhú Oz. 6:6.

*Yesu apa me u amáta nasuno gba ni-e ne nasuno koko de*  
(*Tsia bhú Mlk. 2:18-22; di ne bhú Luk. 5:33-39.*)

<sup>14</sup> Ekprí bini, omukpata gba Djaa bhulɔ nabatisa okpála adyudyo lio de Yesu, u atsia ayi aní me: «Ka ni li ngaya ne omuFalisai, ya ngatse 'zu lie gəmø ngú nayo Ebhe-e, la-a, omukpata gba mu-o ngamemene mo-o ade-e?» <sup>15</sup> Yesu atsia agie pi uo me: «Okpála bhende u a'i o bhú anokomia na kɔva ti da nayala nazɔ 'he uu me 'ko ølø-ø nde ngabha bhú dabilí bini ne uo-o? Engú bini, oekprí akólo makolo, ekprí inde u a'é 'ko ølø-ø lie bhú ká uo-o, li oekprí bhomu-o, u tsia tsé 'zu.

<sup>16</sup> Kpála bini ti da nadu pála bongo na mbia li bhe na didili de. Padhá de, anga pápála bhende u a'o e pépé-e sídha bongo-o, li kaka-a tsia dú la matá sisiti naali.

<sup>17</sup> U 'o'o pandi na mbia bhú odidili dhudhu na kó 'nu de. I du mo-o, li odhudhu-o úpa, li pandi-e túko, li odhudhu-o tsia síti di. U 'o'o mangbo pandi na mbia bhú odhudhu na mbia. Abhomu-o, ndundɔ hana tsia líla lie ndjindji.»

*Yesu akobho ølø bini, aní atsia azuku di ndili na ølø gba Yailo*  
(*Tsia bhú Mlk. 5:21-43; di ne bhú Luk. 8:40-56.*)

<sup>18</sup> Li Yesu adu agie 'ngú pi omukpata gba Djaa lie, ngámá bini adyudyo lie de aní masikpe, aní atutu lipuku e kuto kala aní. Aní atsia apa pi aní me: «Ndili gba ma na ølø-ø andjili mbia inde. Engú bini, go 'o 'kpa mu pí aní, amba aní zuku.»

19 Abhomu-o Yesu ayie bhúlá, aní atsia akpata aní bhú dabili bini ne omakpata gba e-o.

20 Bha lí nedhinga bhomu-o, elee bini inde lí ngute adu natuko lie ngubula kalanga ndjikpa ne ká bhisi-e ago de Yesu ne akele aní, aní atsia abu 'kpa e lí 'so bongo gba aní-o. 21 Padhá de, anga aní adu apa lí bua e me: «Í du bha me ma nde abu 'kpa ma lí bongo gba aní-e, ma kóbho.»

22 Engú bini, Yesu adji lie, aní au aní, aní atsia apa me: «Atou, ndika ma! Nabhuka gba mu-o akobho mu akobho.» Bha lí nedhinga bhomu-o, elee ang-o atsia akobho.

23 Yesu akolo agba ngámá-o. Aní abhaka me okpála nde má dja dja dja ngú nanu azi kuo-o, omavulu mbálá-a nde nga'u mbálá. 24 Abhomu-o, aní atsia apa me: «Yi gbe liyi ne sidi, anga ndili na elee inde-e kpi de, engú bini, aní ngala.» Abhomu-o, u aholo namu aní. 25 Lí u apandja ndu okpála hana lie kilidjo-o, Yesu alí abhú 'ti. Aní aha 'kpa ndili-o. Abhomu-o, ndili-e atsia ayie bhúlá. 26 Ngali na engú ang-o atsia ayangba bhú ndu doto bhomu-o libhому.

*Yesu akobho okpála bhisi inde i u 'kpí de*

27 Lí Yesu aholo 'nú lie, okpála bhisi inde i u 'kpí de-e, aholo akpata aní ne nasusula me: «Ndili gba Davidi, dje ndjinga ya!» 28 Aní alí lie abhú 'ti-e, okpála bhisi inde i u 'kpí de bhomu-o adyudyo lio de aní. Yesu atsia ayi uo me: «Yi abhuka me ma ti da nateteke yi?» U agie pi aní me: «Hení, Ngámá.» 29 Abhomu-o, aní abu 'kpa e lí djila uo ne napa me: «A ayo me amene lie pi yi maka nabhuka gba yi-e nde lie ko.»

<sup>30</sup> Abhomu-o, djila uo abhulu, Yesu atsia agbele 'dje uo kpekpeke me: «Yi gbo 'dje yi! A ayo de me kpála bini mbila engú inde-e de!» <sup>31</sup> Engú bini, bha naze ka uo me-e, u apandjala ngali gba ani-e bhú ndu doto ango-o libhomu.

*Yesu akobho kpála bini inde i bhú 'ngú de*

<sup>32</sup> Nedhinga li okpála bhisi inde li Yesu akobho o bhomu-o adu nanu lie, bha li nedhinga bhomu-o, okpála ago pi Yesu ne kpála bini inde i bhú 'ngú de ka siti bua inde adu nadu bhú ani-o.

<sup>33</sup> Li Yesu agbe siti bua ango-o lie bhú ani-e, kpála ango-o atsia aholo nagama 'ngú. Abhomu-o, kambì okpála angamba, u atsia adu napa me: «Nguwa 'ngú inde-e u nga lie bhú ká omafalaele belegu de bini!» <sup>34</sup> La-a, omuFalisai adu napa me: «Ngámá gba osisiti bua ngaha angu pi ani ngú napandja osisiti bua ngae bha-a!»

*Yesu adje ndjinga kambì okpála*

<sup>35</sup> Abhomu-o, Yesu adu adholo bhú ndu ogudhu di ne bhú ndu okuti hana. Ani adu nasuno bhú oeti nadjè líli gba Moidje . Ani adu akpokpo Bádha Ngali Naú gba Ebhe , ani atsia adu nakobho ndu kuo hana di ne ndu oeze hana.

<sup>36</sup> Li ani au kambì okpála lie, ani adje ndjinga uo naali, anga u adu me u nde andala, angu uo nde la di andjia maka piga okandèlè inde li málila nde ka o ade. <sup>37</sup> Abhomu-o, ani atsia apa pi omakpata gba e me: «Nguwa abhiye-e bhelé, engú la bini, okpála na kulu-o bhelé ade. <sup>38</sup> Yi yo ka bhulu 'dyi-e me ani tima okpála na kulu bhú edyi gba e ngú na'e nguwa-o.»

# 10

*Yesu atima omukpata ndjikpa ne ká bhisi gba e-o*  
*(Tsia bhú Mlk. 3:13-19; di ne bhú Luk. 6:12-16.)*

<sup>1</sup> Pipita-a, Yesu a'i omukpata ndjikpa ne ká bhisi gba e-o. Aní aha angu pi uo ngú napandja osisiti bua bhú okpála, di ne nakobho ndu okuo hana, la di ne ndu oeze hana. <sup>2</sup> A inde-e 'li obhulú titima ndjikpa ne ká bhisi-o: kpála na kalanu-o, a ko Simo inde li Yesu agisila 'li e me Piele, ne uo ne ndai e Andili, a la di-e ongisi bhisi gba Djebedayo-o. A adu nani Djaki ne uo ne ndai e Djaá, <sup>3</sup> a la di-e Filipo ne uo ne Batelemi; a la di-e Tuma ne uo ne Matié, ndombi na mandjandja-o; a la di-e Tade ne uo ne Djaki, ndili gba Alafayo-o; <sup>4</sup> a la di-e Simo kpála na Kanana ngauo ne Yuda Isikaliote. Simo nani ne suka omaYuda inde adu agili ne kpéke me o ze bhú bali sa kpa okpála na Loma zeze-o. Yuda Isikaliote nani ne kpála inde apú ngbángá Yesu pi obhulú yala-o.

<sup>5</sup> Abhomu-o, Yesu atima obhulú titima ndjikpa ne ká bhisi bhomu-o. Aní atsia aha olili inde-e pi uo me: «Yi adjí-e, yi anú agba okpála inde ne omaYuda ade-e de. Yi alí di bhú ogudhu gba okpála na Samalia de. <sup>6</sup> Engú bini, yi nu mangbo agba omafsalaele. Padhá de, anga uo maka okandele inde angita. <sup>7</sup> Li kpadji-e, yi kpokpo Bádha Ngali gba Ebhe-o. Yi pa pi okpála me: <Naú na abhúlá akolo masakpe!> <sup>8</sup> Yi kobho okpála na kuo, yi zuku okpála inde amu, yi kobho obhulú kába, yi pandja osisiti bua bhú okpála. Yi asia padhá, yi ha bhadi pi okpála koko

padhá.\* <sup>9</sup> Yi ahá belegu ku li falanga de bini. <sup>10</sup> Yi ahá gonia ngú enú-o de. Yi ahá bongo na mbulu bhisi de, yi nu bha ne koli maløkø inde bhú 'dhu yi ko, yi ahá ndula de. Padhá de, anga okpála inde yi adji amene kulu bhú ká o-o abí mukobho gba yi-e ngao.

<sup>11</sup> Yi li bhú gudhu bini, i du di-e bhú kuti bini-e, yi de gili kpála inde bedhe ngú nasia yi, amba yi du gba kpála ang-o akólo bhú nayie ka yi ko.

<sup>12</sup> Yi li bhú eti bini-e, yi de yi okpála inde bhú 'ti ang-o mayi. <sup>13</sup> I du me okpála na eti ang-o nde asia yi-e, guo 'ngú yi adhuku ne e de du ne uo. Engú bini, i du la me okpála ang-o nde sia yi de-e, guo 'ngú gba yi-e de gie lie pi yi. <sup>14</sup> I du me u nde sia yi de-e, u dje la di 'li yi de-e, nedhinga inde yi ngakoto lie bhú 'ti ang-o, i du di-e bhú gudhu ang-o, yi de dyiki ndju doto na 'dhu yi ngú nasuno pi uo me yi atse uo atse. <sup>15</sup> Ma apa pi yi na paká me, li 'kpí nakodho 'ngú-o, okpála na gudhu ang-o asia likabhu kpekpeke ané okpála na Sodomu ne Gomolo mane.»

*Okpekpeke da 'ngú inde akólo li omakpata gba Yesu*

*(Tsia bhú Mlk. 13:9-13; di ne bhú Luk. 21:12-17.)*

<sup>16</sup> «Yi gbo nga 'dje yi! Ngama-a, ma ngatima yi maka okandøø bhú ká onute. 'E-e! Yi alá-a de, amba yi du di ne bhuku bua maka opidjo.

<sup>17</sup> Yi lila liyi ka okpála ndjindji. Padhá de, anga u

---

\* **10:8** 10:8 Li bili inde-e, Yesu ngakpokpo 'ngú bhomu-o pindji angu inde aní aha e pi obhulu titima gba e ngubula nateteke okpála-o.

ambá yi bhú otilibinali, u tsia bhí yi ne fimbo bhú oti gba o nadje líli gba Moidje-o . <sup>18</sup> U anú ne yi kala ongámási na ndu doto di ne kala ongbengbe ongámási anga yi abhuka ma. A améne lie mo-o ngubula me yi kpokpo 'ngú gba ma-a kala uo di ne kala okpála inde ne omaYuda ade-o. <sup>19</sup> Nedhinga u anú ne yi lie kala okpála ang-o-o, yi akína liyi li 'ngú inde yi apá e de, di ne lele maka yi ayípa 'ngú li 'ngú ang-o-o lie de. Ongú inde a ayo me yi pa e, a ahá bha lie pí yi li nedhinga ang-o-o. <sup>20</sup> Padhá de, anga engú inde yi agáma e yíe ka yi de. Engú bini, Bua gba 'Dyi yi-e agáma 'ngú bhú yi ngae.

<sup>21</sup> Okpála apú ondaise o me u bhili uo. 'Dyi ndili apú ndili gba e me u bhøø ani. Ongisi akólo ne kpekpeke 'ndji pí okpála inde azu o, u tsia pú okpála azu o me u bhili uo. <sup>22</sup> Ndú okpála hana ayála yi ka 'li ma. Engú bini, kpála bhende akíbila nakolo bha bini makolo ali soso-o, ani tsia kóbho. <sup>23</sup> U mene yi sisiti bhú gudhu bini-e, yi de kpe bhú gudhu koko. Ma apa la pí yi na paká me yi ndjía nadhuku bhú ogudhu na Isalaele hana de me Ndili gba kpála nde go de-e de.

<sup>24</sup> Yi mbila ndjindji me mukpata ne musuno gba e ne engbé de, kpála na kulu ne di ngámá na kulu gba e ne engbé de. <sup>25</sup> A ayo me mukpata kolo maka musuno gba e-o. A ayo di me kpála na kulu kolo maka ngámá na kulu gba e-o. I du me u nde nga'i bhulu eti-e me Baladjebula-a,† u a'í la ibili okpála na eti gba ani-e pí!

---

† **10:25** 10:25 Baladjebula: A bhomu-o suka 'ili gba Djabulu.

26-27 Kaka-a, yi akpé okpála inde améne yi sisiti-e de! Engú inde ma apa e pi yi bhú bitie, yi pa ibili ne ngbikpi. Engú inde u apa e pi yi bhú tupele-e, yi totobhila ibili ne di apí ongbuti. Padhá de, anga ndu 'he inde awo lie mawo-o hana akóto bhú mbasu, la di-e, ndu 'he inde na pepe hana ambíla lie mambíla. <sup>28</sup> Yi akpé obhende ngabhөлө kute yi, inde i ti da nabhөлө bua yi de-e de. Yi kpe mangbo Ebhe inde i ti da nabhөлө bua yi, la di ne kute yi libhomu bhú djua na dudu ma ko. <sup>29</sup> Li mu tsindji oindjilindjili bhisi-e, mo osía tété mangua tetele tia dho? La-a, saka uo bini kpí padhá de me 'Dyi yi Ebhe nde ziba de-e de. <sup>30</sup> La pi yi-e, Ebhe atanga belegu osundjo yi hana. <sup>31</sup> Kaka-a, yi akpé ehe bini de. Ngayi-e, abana u po bha bhúla oindjilindjili bhelé-e, yi ane uo ne tata.

<sup>32</sup> Li kpála bini pa bhú ká djila okpála me ni ne kpála ka ma-a, ngama-a, ma apá bhadi bhú djila 'Dyi ma inde abhúlá-a me a ko naama kpála. <sup>33</sup> Engú bini, li kpála bini pa bhú ká djila okpála me ni ne kpála ka ma ade-e, ngama-a, ma apá bhadi bhú djila 'Dyi ma inde abhúlá me a ko naama kpála de.»

*Yesu ago nato egú sunda okpála  
(Tsia bhú Luk. 12:51-53, 14:26-27.)*

<sup>34</sup> «Yi abhúndja de me ma ago ngú na'o guo 'ngú píla doto de. Ma go ngú na'o guo 'ngú de, engú bini, ma ago mangbo ngú nagbogbo bhusu okpála. <sup>35</sup> A moko, ma ago nagbogbo bhusu kpála ne 'dyi e.



Ma ago nagbogbo bhɔsɔ ndili na ɔɔlɔ ne 'hi e.

Ma ago nagbogbo bhɔsɔ ɔlɔ gba ndili-e ne ogbi e na ɔɔlɔ.

<sup>36</sup> Kaka-a, obhɔlɔ yala gba kpála adú bha okpála na abhú 'tí gba ani ko.†

<sup>37</sup> Kpála bhende ngakunda 'dyi e, i dɔ di-e 'hi e ane ma mane-e, kpála ango-o tí ne ma de. La di-e, kpála bhende ngakunda ndili na bhobhoko gba e, i dɔ di-e ndili na ɔɔlɔ gba e ane ma mane-e, kpála ango-o tí ne ma de. <sup>38</sup> Kpála bhende i bi kulusi gba e‡ de, i tsia kpata ma de-e, kpála ango-o tí ne ma de. <sup>39</sup> Kpála bhende alíla mukobho gba e-e, ani kpí. Engú bini, kpála bhende atsé la mukobho gba e ngɔbula ma-a, ani sía mukobho na kukulɔ.»

*Makalá gba kpála inde asía omɔkpata gba Yesu*

*(Tsia bhú Mlk. 9:41.)*

<sup>40</sup> «Kpála bhende asia yi-e, ani asia bhomɔ-o ma. La di-e, kpála bhende asia ma-a, ani asia bhomɔ-o kpála bhende atima ma ko. <sup>41</sup> Kpála bhende asia polofeta anga a ko polofeta-a, ani asía makalá inde atí ne opolofeta. La di-e, kpála bhende asia kpála na ngbingbili anga a ko kpála na ngbingbili-e, ani asía makalá inde atí ne okpála na ngbingbili-o. <sup>42</sup> Ma apa pí yi na paká me kpála bhende ahá ngabha kópo kpina 'ngu bini pí saka okpála inde lí okpála ngau o padhá

† **10:36** 10:35-36 Tsia bhú Mlk. 7:6. ‡ **10:38** 10:38 Nabi kulusi gba e: A ko naziba nazɔ likabhu dí ne nakpi kabula Yesu.

inde-e anga a ko mukpata gba ma-a, kpála ango-o asía makalá gba e masia.»

## 11

<sup>1</sup> Li Yesu andjia naha olíli bhomu-o lie pi omukpata gba e ndjikpa ne ká bhisi-e, ani ayie oo. Ani atsia anu ngú nasuno di ne nakpokpo eli gba Ebhe-e bhú ogudhu na ndu doto na Galilaya.

*Djaa bhulu nabatisa okpála atima okpála nayi 'ngú pindji Yesu*

<sup>2</sup> Li Djaa bhulu nabatisa okpála adu lie bhú tikpu-o, ani adje ngali okulu li Kilisito adu amene e-o. Abhomu-o, ani atsia atima omukpata gba e <sup>3</sup> me u nu yi ani me: «Mu ne Masiya inde ayo me Ebhe tima e? Ne me ayo me ya adjeke kpála koko?» <sup>4</sup> Yesu agie pi uo me: «Yi nu kpokpo engú inde yi ngadje e ne bhende yi ngau e pi Djaa: <sup>5</sup> okpála i u 'kpí de-e ngau 'kpí, obhende ne eze li 'dhu o-o ngadhuku ndjindji, obhulu kába ngakobho, obhende i dje 'kpí de-e, la di ngadje 'kpí, obhende amu-o ngazuku, okpála bhende ngau lio padhá kala Ebhe-e la di ngadje Bádha Ngali . <sup>6</sup> A ko djali pi kpála inde li engú gba ma-a bhóle nabhuka gba e mabhóle de ko.»

*Yesu akpokpo 'ngú pindji Djaa bhulu nabatisa okpála*

*(Tsia bhú Luk. 7:18-35.)*

<sup>7</sup> Li omukpata gba Djaa aholo 'nú lie, Yesu atsia aholo nakpokpo 'ngú li 'ngú gba Djaa pi kambí okpála inde adu oo me: «Yi anu igini natsia abhú

mili bili-e ni? Yi anu igini natsia mbamba inde li anvi ngadyiki e? A mo-o ade. <sup>8</sup> I du mo-o de-e, yi anu nga igini natsia ni? Yi anu igini natsia kpála inde adyi babadha bongo-o ? La-a, okpála bhende adyidiyi obabadha bongo-o, u dudu bhú oeti gba ongbengbe ongámási. <sup>9</sup> Yi anu nga la igini natsia ni? Yi anu igini natsia polofeta ? A moko. Ma apa pi yi me, yi anu igini natsia kpála inde ane belegu polofeta mane. <sup>10</sup> Padhá de, anga a ko kpála inde li Bhuku gba Ebhe-e apa nani li 'ngú gba e me:

◁Ebhe apa me, ma ngatima bhulu titima gba ma-  
a pi mu kalanu  
ngú naleke kpadji pi mu.†>

<sup>11</sup> Ngama-a, ma apa pi yi na paká me, bhú ká okpála-kuti-e, kpála bini inde akoto, inde ngbéngbé ane Djaa bhulu nabatisa okpála belegu ade bini. La-a, ndu okpála hana inde aziba Nau na abhúlá-a , abana ani du bha mbomboye pi-ie, ani ane Djaa ne engbé.

<sup>12-14</sup> Padhá de, anga ndu opolofeta hana di ne líli gba Moidje akpokpo ngali Nau na abhúlá nakolo makolo li nedhinga gba Djaa-o. I du me yi nde akunda naziba engú ma apa e, Djaa ne Eliya inde a ayo nani me ani go-o ngae. Nayie bhú nedhinga gba Djaa bhulu nabatisa okpála akolo pi mbia inde-e, Nau na abhúlá bhú gbene. La di-e, omangopu ngamene ne kpéke hana me o siti masiti. <sup>15</sup> A ayo me kpála inde li e ne djedje ngú nadje 'kpí-e djedje!

† **11:10** 11:10 Tsia bhú Mal. 3:1.

16 Ma tí da nasuno okpála na naki inde-e li da?  
Uo maka ongisi inde aduḷu bhú mbadhasu.

17 Okoko nga'u mbálá na ebi pi obi o,  
engú bini, obhe u a'u mbálá ango-o pi o ayala  
nadho 'bi!

U ali matá etsi na da kuo pi uo,  
engú bini, u ayala naku 'gbá!

18 Yi maka ongisi inde ayala nadho 'bi di ne naku  
'gbá bhomu. Padhá de, anga a maka li Djaa ago  
nani lie-o. Ani ago maka kpála inde bhú dá kuo.  
Ani zu 'he de, ani ndji di vino de, yi atsia apa me:  
<A bhú ani ne siti bua !> 19 Ndili gba kpála ago  
di. Ani ago maka kpála inde bhú dá 'bi. Ani azu  
'he, ani andji di vino, do yi de me: <Yi tsia nga  
kpála inde. Ani bha bini ngabhundja nazu 'he ne  
nandji vino! A ko olia ondombi na mandjandja,  
di ne okpála na sisiti!> Engú bini, bhú natsia  
nganda okulu gba Ebhe-e, a ngasuno pi yi me  
imbilangu gba ani-e ngbingbili.»

*Okpála na ogudhu gba omaYuda inde ayala  
nadji bua o*

*(Tsia bhú Luk. 10:13-15.)*

20 Abhomu-o, Yesu aholo nagama 'ngú ne ndje  
djila pi okpála na ogudhu inde ani amene nani  
ongamba 'ngú gba e bhelé bhú e-o. Padhá de,  
anga okpála ango-o dji nani bua o de. 21 Ani  
adu apa me: «A ko likabhu pi yi, okpála na  
gudhu na Koladjina! A ko likabhu pi yi, okpála  
na gudhu na Betesaida! Padhá de, anga ma  
amene ongamba 'ngú bhelé bhú ogudhu gba yi-  
o. Engú bini, yi dji bua yi de. La-a, ma méne nani  
ongamba 'ngú bhomu-o bhú ogudhu na Tile ne

Sidona-a,\* okpála na ogudhu angoo de adyi nani gonia, u túko embi bhú 'ndji o didili naali, u tsia dji bua o. <sup>22</sup> A moko. Ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane.

<sup>23</sup> Ne yi di, okpála na gudhu na Kapalanauma, yi abhundja naayi me u a'é'e yi akolo abhúla-a? A mo-o ade. U aké yi ne kuto, akólo bha bini li bili gba okpála inde amu. Padhá de, anga ma amene ongamba 'ngú bhelé bhú gudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o bhú gudhu na Sodomu-o, gudhu angoo de nga bha bhúka, nakolo pi naki. <sup>24</sup> Kaka-a, ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Sodomu mane.»

*Ako djali pi okpála inde ngau lio padhá kala Ebhe*

*(Tsia bhú Luk. 10:21-22.)*

<sup>25</sup> Bhú nedhinga bhomu-o, Yesu atsia apa me: «Ma ngadhogè mu, 'Dyi ma, Ngámá na abhúla ne Ngámá na doto. Padhá de, anga engú inde mo owo e pi okpála inde ngabhundja me a bhú 'ndji o ne imbilangu-o, mo ombamba tata pi obhende ngau lio me o ne okpála na padhá kala mu! <sup>26</sup> A moko, 'Dyi ma, anga bhú bádha bhú 'bu gba mu-o, mo okunda bha nani me a adu moko.

<sup>27</sup> Yi mbila ndjindji me 'Dyi ma asuno ndu 'ngú hana mu ma. Kpála bini mbila Ndili-e de, bha

---

\* **11:21** 11:21 Tile ne Sidona nani ne ogudhu ka omaYuda ade. Tsia bhú Isa. 23, ne bhú Edj. 26-28, di ne bhú Ams. 1:9-19.

bini 'Dyi Ndili-o. Kpála bini mbila la di 'Dyi Ndili-e de, bha bini Ndili gba ani-o, a la di-e kpála bhende li Ndili-e akúnda nasuno ani pi e ko.

<sup>28</sup> Yi andala ka okpekpeke líli di ne okpekpeke da 'ngú inde u ngabu e pí yi-o. Mbia inde-e, yi go bhaka ma, ma 'e pí yi ma'e, amba ma ha naguo pi yi. <sup>29</sup> Yi mene olíli gba ma-o, amba yi 'o me ma suno engú pi yi. Padhá de, anga ma súnó pi yi ne bhákú bua di ne na'o lima ne kuto. Yi mene mo-o, yi tsia sía naguo pi yi makpe. <sup>30</sup> A moko, da namene ongú inde ma akúnda e di ne olíli gba ma-a kpekpeke ade.»

## 12

*Yesu ne ngámá pí 'ndji ekpí naguo gba omaYuda*

*(Tsia bhú Mlk. 2:23-28; di ne bhú Luk. 6:1-5.)*

<sup>1</sup> Bhú oekpí bhomu-o, Yesu ne omukpata gba e adu akodho 'kpí bhú ngu 'zú inde u a'i e me ngano. A adu ekpí naguo gba omaYuda-o . Omukpata gba ani adu ne gumu. Abhomu-o, u aholo nakodho 'ndji 'ndji, u atsia adu nazuzu.

<sup>2</sup> Li omuFalisai au lie mo-o, u atsia apa pi Yesu me: «Ka ni li omukpata gba mu-o ngamene kulu lie bhú 'kpí naguo me líli gba ní-e nde ziba mo-o de-e?» <sup>3</sup> Yesu agie pi uo me: «Yi tanga nga engú inde li Davidi amene nani e di, nedhinga inde li ngaani makpe ne okpála gba e, u adu lie ne gumu-o? <sup>4</sup> Ani ali nani bhú 'ti Ebhe, ngaani ne okpála gba e, u atsia azu mapa inde u aha e pi Ebhe-o. A ayo la nani pi saka uo bini nazuzu de.

Engú bini, a ayo bha nani me azu mapa ango-o ne odimandø gba Ebhe .

<sup>5</sup> Ne me engú inde bhú líli gba Moidje-e , yi tanga nga di? Líli gba Moidje apa me, li 'kpí nago gba omaYuda-a, odimandø inde ngamene kulu bhú 'ngbé 'ti Ebhe-e ngagumu bhomu-o líli na ekpí nago-o. La-a, u 'ó 'ngú pí uo kaka de! <sup>6</sup> Engú bini, ma apa la pí yi me kpála bini bhú ká yi sí, ani ane 'ngbé 'ti Ebhe mane. <sup>7</sup> I dú me yi mbíla engú inde li Bhuku gba Ebhe-e apa e uu-o, yi de 'ó engú pí okpála bhomu-o de. Padhá de, anga Bhuku gba Ebhe apa me: «Engú inde a nga li ma naali-e, a ko nadje ndjinga okpála koko, a ko naha makiso de.†» <sup>8</sup> Yesu atsia abu tata-a me: «Ngama, Ndili gba kpála-a, ma ne ngámá pí 'ndji ekpí nago.»

<sup>9</sup> Pipita-a, Yesu ayie oo, ani atsia anu ali bhú eti gba uo nadje líli gba Moidje-o . <sup>10</sup> Bhú 'ti oo, kpála bini inde li 'kpa e andia adu oo. Omufalisai adu akunda na'o 'ngú pí Yesu. Kaka-a, u ayi ani me: «Líli gba ní-e aziba me u kobho kpála bhú 'kpí nago uu?» <sup>11</sup> Yesu agie pí uo me: «A ko da bhú ká yi inde i du ka e ne koli kandøle bini-e, li kandøle ango-o ti bhú 'dú li 'kpí nago, ani nú nagbe ani de-e? <sup>12</sup> La-a, kpála-kuti ane kandøle bhutsibhutsi! Kaka-a, líli aziba namene bádha 'ngú bhú 'kpí nago.» <sup>13</sup> Abhomu-o, ani atsia apa pí kpála ango-o me: «Gbele 'kpa mu.» Kpála ango-o agbele 'kpa e, 'kpa ani atsia akolo ndjindji maka 'kpa ani bhe koko-o. <sup>14</sup> Pipita-a,

† 12:7 12:7 Tsia bhú Oz. 6:6.

omɔFalisai aze kilidjo. U apo bhúla o ngú nagili kpadji me o bhøle Yesu.

*Yesu ne kpála inde li Ebhe abhɔ e ngú kulu gba e-o*

<sup>15</sup> Li Yesu ambila lie me omɔFalisai ngagili nabhøle ni-e, ani ayie li bili ang-o-o. Bhiti okpála akpata ani, ani atsia akobho ndɔ obhende adɔ ne kuo hana. <sup>16</sup> Engú bini, ani agbele 'dje uo kpekpeke me u apá pi kpála bini de me ni ne da-ie de, <sup>17</sup> ngubula me engú inde li polofeta Isaya apa nani e amene lie. Polofeta Isaya apa nani me:

<sup>18</sup> «Ebhe apa me:

<Tsia nga bali gba ma inde ma abhɔ nani e-o,  
ma kɔnda ani naali, engú gba ani-e nga li ma naali.

Ma a'ó Bu Bhobua gba ma-a pí ani,  
ani tsia kpókpo ngbili 'ngú pi ndɔ opiga hana.

<sup>19</sup> Ani bí bhaiki ne kpála bini de, ani gáma kpéke 'ngú de.

U djé 'li ani li okpadji de.

<sup>20</sup> Ani bú dú mbamba inde agumɔ-o de,  
ani búlu dhegɔ eke inde ngatsi-e de.

Ani améne mo-o akólo li 'kpí inde  
ani a'ó lie me ngbili 'ngú kolo angu e píla doto ko.

<sup>21</sup> Abhomɔ-o, li ndɔ opiga hana tsia 'ó nabhuka gba o-o bhú ani.†»

† **12:21** 12:18-21 Tsia bhú Isa. 42:1-4.



*Omufalisai apa me Yesu ngamene kulu ne angu gba Baladjebula*

*(Tsia bhú Mlk. 3:22-30; di ne bhú Luk. 11:14-23.)*

<sup>22</sup> Abhomu-o, u ago pi Yesu ne kpála bini inde i u 'kpí de, i bhú di 'ngú de, anga adu bhú kpála ang-o ne siti bua . Yesu akobho kpála ang-o, ani atsia aholo nagama 'ngú di ne nau 'kpí. <sup>23</sup> Bhiti okpála hana angamba, u atsia aholo napa me: «A inde-e Ndili gba Davidi-e di?» <sup>24</sup> Li omufalisai adje engú bhomu-o lie, u atsia apa me: «Kpála bhomu-o ngapandja osisiti bua padhá ade, Baladjebula, ngámá gba osisiti bua-a, ngaha angu pi ani ngae!»

<sup>25</sup> Engú bini, Yesu adu ambila mabhundja gba uo hana. Abhomu-o, ani atsia apa pi uo me: «Ndu kuti hana, i du me okpála kpála nde dje lio de-e, kuti ang-o pípi me a nde akpèdhòlò. Okpála na gudhu bini, i du di-e piga bini, i du me u nde dje lio de-e, gudhu ang-o, i du di-e piga ang-o lú-u de. <sup>26</sup> I du me Satana nde ngabhike Satana-a, amba ani agbogbo bhomu-o bhusu e ngae makpe. I du la mo-o, kuti gba ani-e lú lele pi? <sup>27</sup> I du me ngama-a, ma nde ngapandja osisiti bua ka angu gba Beledjebula-a, omukpata gba yi-e ngapandja naao uo ka angu gba da? Kaka-a, omukpata gba yi-e akódho galikpe 'ngú gba yi-e ngao makpe. <sup>28</sup> Engú bini, i du la me ma nde ngapandja osisiti bua ka angu gba Bua gba Ebhe-e, bhobhomu-o asuno me Nau gba Ebhe-e akolo li yi akolo.

<sup>29</sup> Kpála bini ti da nali bhú 'ti gba kpéke kpála, ani tsia bhá ohe gba ani-e de. Ani kunda nali bhú 'ti gba ani ngú nabha ohe gba ani-e hana-a, ani gbíte ngaíza ani kalanu. Pipita-a, ani tsia lí bhú 'ti gba ani ngú nabha ohe gba ani-o. <sup>30</sup> Kpála bhende ne ma bhú dabili bini ade-e, a ko bhulu yala gba ma. Kpála bhende ngapo la di bhúla okpála bhú dabili bini ne ma ade-e, ani ngatsambala uo matsambala.

<sup>31</sup> Kaka-a, ma apa pi yi me, okpála asía mambu li ndu osisiti 'ngú di ne li ndu osobho inde li okpála ngasobho Ebhe ne e hana. Engú la bini, li kpála sobho Bu Bhobua-a, ani sía mambu de. <sup>32</sup> I du me kpála nde apa siti 'ngú li kute ma, ngama Ndili gba kpála-a, Ebhe mbu li ani tété. Engú la bini, i du me kpála nde asobho Bu Bhobua-a, Ebhe mbú li ani tété bhú nedhinga na naki inde-e de, ani mbú di li ani tété bhú nedhinga inde ngago-o de.»

*U mbimbila ndula li lí e  
(Tsia bhú Luk. 6:43-45.)*

<sup>33</sup> «I du me ndula nde ndjindji-e, lílí-e dú bhadi ndjindji. I du me a nde bhú ndula ne kuo-o, lílí-e dú sisiti. U mbimbila ndula li lí e.

<sup>34</sup> Ngayi opiga mbuma inde-e, yi ti da napa ongu na babadha lele pi, me yi nde ne okpála na sisiti-e? Padhá de, anga ebhe ngapa engú inde abedhe li bhobua mabedhe ko. <sup>35</sup> Kpála na babadha-a, ka bádha 'ngú inde li bhobua ani-e, ani apá bhadi bádha 'ngú. Engú bini, kpála na sisiti-e, ka siti 'ngú inde li bhobua ani-e, ani apá bhadi engú na sisiti. <sup>36</sup> Kaka-a, ma apa pi yi

me, bhú nedhinga nakodho 'ngú gba okpála-a, okpála apá ta oeli na padhá padhá inde li u apa e hana. <sup>37</sup> Padhá de, anga Ebhe akódho 'ngú gba mụ-o li nakpata 'li mụ. I dụ me mụ nde apa oeli na babadha-a, anì 'ó mangimbo pí mụ de, i dụ me mụ nde apa oeli na sisiti-e, anì 'ó mangimbo pí mụ.»

*Omụsuno na líli gba Moidje ne omụFalisai ayo ngamba 'ngú ka Yesu*

*(Tsia bhú Mlk. 8:11-12; di ne bhú Luk. 11:29-32.)*

<sup>38</sup> Abhomụ-o, omụsuno koko na líli gba Moidje di ne omụFalisai koko apa pí Yesu me: «Mụsuno, ya akunda me mene ehe bini pí ya inde asuno me mo oyie bha ndjụ agba Ebhe.» <sup>39</sup> Do anì pí uo me: «Okpála na naki inde-e sisiti, u bhuka la di Ebhe ne bua o bini de, u ngayo ngamba 'ngú. Engú bini, Ebhe méne ngamba 'ngú pí uo bini de, bha bini bhende anì amene nani e lí polofeta Djonasi ko. <sup>40</sup> Padhá de, anga maka li Djonasi asi nani lie ekpí bata, di ne sukpe bata bhú 'bu 'ngbé sungu-o, ngama Ndili gba kpála-a, ma así bhadi bhú lata ekpí bata di ne sukpe bata moko. <sup>41</sup> Li 'kpí li Ebhe akódho 'ngú gba okpála lie, okpála na Ninive akóto kala Ebhe bhú dabili bini ne okpála na naki inde, li okpála na Ninive tsia 'ó 'ngú pí okpála na naki-o. Padhá de, anga u adjì nani bua o li nedhinga u adje ngali gba Ebhe inde li Djonasi adụ akpokpo e-o. Yi mbila la ndjindjì me, kpála bini sị, anì ngbéngbé ane Djonasi mane!

<sup>42</sup> Matá di-e, li 'kpí li Ebhe akódho 'ngú gba okpála lie, 'ngbé ngámá na ọlọ inde adụ nani

atsia 'kpí li ndu doto na Saba-a, akóto kala Ebhe bhú dabili bini ne okpála na naki inde. Aní tsia 'ó 'ngú pí uo, anga aní ayie nani tsutsu ngú nanu nadje eli na imbilangu gba Salomo-o. Yi mbila la ndjindji me, kpála bini si, aní ngebéngbé ane Salomo mane! Engú bini, ngayi-e, yi dje aní de.»

*Gbitaku pindji nagie matá lie ka siti bua bhú kpála*

*(Tsia bhú Luk. 11:24-26.)*

<sup>43</sup> Abhomu-o, Yesu atsia apa matá gbitaku pi kambí okpála me: «Adu nani bhú kpála bini ne siti bua. Nedhinga li siti bua akoto lie bhú aní-e, siti bua ango-o anu ne djakadha abhú obili inde li engu nde li e ade\* ngú nagili bili nago ka e tété. Engú bini, aní u de. <sup>44</sup> Aní atsia apa li bua e me: <Ma gie nga lima bhú 'ti gba ma inde ma akoto nako bhú e-o.> Aní akolo oo, aní abhaka me a nde padhá, u nde apo mapo, u nde aleke ndjindji.

<sup>45</sup> Abhomu-o, aní anu, aní abha osisiti bua koko mananika inde ane aní ne siti. U agie lio, u ali bhú 'ti-o, u atsia dudu oo. Mukobho gba kpála ango-o atsia akolo la matá pipita-a sisiti naali ane bhende na kalanu-o mane. A adú bhadi pi osisiti okpála na naki inde-e moko.»

*'Hi Yesu ne ondaise Yesu ngao dho?*

*(Tsia bhú Mlk. 3:31; di ne bhú Luk. 8:19-21.)*

<sup>46</sup> Yesu adu ngabha nagama 'ngú pi kambí okpála-o. Me-e, 'hi aní di ne ondaise aní akolo.

\* **12:43** 12:43 Bili li engu nde lie ade-e, a ko bili inde li kpála ti da nasi kuti li e de ka ndibhili engu. La pi omaYuda-a, a ko bili inde li osisiti bua ngadudu li e ko.

U alulɔ akilidjo, u adɔ agili me o gama 'ngú ne anɔ. [ 47 †] 48 Yesu agie pɔ kpála inde apa 'ngú pɔ anɔ-e me: «'Hi ma ngae dho, ondaise ma la di ngao dho?» 49 Pipita-a, anɔ a'e 'kpa e, anɔ asuno omɔkpata gba e-o. Anɔ atsia apa me: «Yi tsitsia, 'hi ma ne ondaise ma ngao inde. 50 Padhá de, anga kpála inde ngamene engú li 'Dyi ma inde abhúlá-a ngakúnda e, kpála ango-o, a ko ndai ma na bhobhoko, a ko ndai ma na øøø, a ko la di 'hi ma-a ngae.»

## 13

### *Gbitaku gba kpála nalu nguwa*

*(Tsia bhú Mlk. 4:1-9; di ne bhú Luk. 8:4-8.)*

1 Bha li 'kpí ango-o, Yesu akoto kilidjo. Anɔ atsia anɔ adɔ kuto lingo ekpø. 2 Abhomɔ-o, bhiti okpála na bhibhiti ago apo bhúla o de anɔ. Kaka-a, anɔ anɔ a'ɔ bhú zabu bini, anɔ atsia adɔ bhúbhú ngú nasuno pɔ uo. Bhiti okpála bhomɔ-o atsia alulɔ naao lingo 'ngu-o.

3 Anɔ atsia aholo nakpokpo 'ngú pɔ uo bhelé bhú ogbitaku. Anɔ adɔ apa pɔ uo me: «Ekpí bini, kpála bini nalu nguwa anɔ abhiye gba e ngú nabala nguwa. 4 Nedhinga anɔ adɔ ababala lie, té nguwa koko abala lingo 'hi kpadji. Odhu ago, u atsia ahopo nguwa ango-o hana má kpøkøbhø! 5 Olí nguwa koko abala li bilí na teme, inde li doto dɔ li e bhelé de. I nde lie me doto dɔ sasa bhelé

† 12:47 12:47 Lukuluku inde-e, a bhú obhuku koko na didili u aye e bhú eli na giliki ade. [Kpála bini apa pɔ anɔ me: «Tsia nga 'hi mɔ ne ondaise mɔ alulɔ akilidjo aoo. U ngagili nagama 'ngú ne mɔ.»]

de-e, ezu-o akè má gala ka li doto akpa sasa lie-o. <sup>6</sup> Li ela akolo la lie kpekpeke-e, a atsulu ezu-o, ezu atsia a'ulu ka ndibhili sisie-o. <sup>7</sup> Olí nguwa koko abala li bili li lí oulu na eti adu lie. Oeti abhele, a atsia anguvo bhobhomu-o hana. <sup>8</sup> Olí nguwa koko abala bhú doto na dobho, a atsia ali lílí: bhe bini-e ali lílí kámá bini, koko-o ali lílí ndjikpa madhia, koko-o ali lílí ndjikpa bata.» <sup>9</sup> Yesu atsia apa matá me: «Yi dje ndjindji, i du me a nde li yi ne djedje ko!»

*Yesu adu akpo 'ngú pi okpála bhú ogbitaku ka ni?*

*(Tsia bhú Mlk. 4:10-12; di ne bhú Luk. 8:9-10.)*

<sup>10</sup> Abhomu-o, omukpata gba Yesu adyudyo lio de ani, u atsia ayi ani me: «Mu ngakpokpo 'ngú pi okpála bhú ogbitaku ka ni?» <sup>11</sup> Do ani de-e: «Ma ngakpo 'ngú pi uo bhú ogbitaku anga Ebhe ha nambila ngbadhu 'ngú na Nau na abhúlá-a pi uo de. Ani aha mangbo pi yi. <sup>12</sup> Padhá de, anga kpála inde ani aha ngbadhu 'ngú ang-o pi e-e, ani a'ó matá koko pi ani pépé. Kpála ang-o tsia dú ne di bhelé. Engú bini, kpála bhende ani ha pi e de-e, ani adhépe belegu dhegu bhende ka ani-o. <sup>13</sup> Ka 'ngú ang-o, ma ngakpo 'ngú pi uo bhú ogbitaku.

Padhá de, anga u ngatsia 'kpí, u u la 'kpí de,

u ngagbo 'dje o, u dje la 'kpí de, u kə la di mboli 'ngú bini de.

<sup>14</sup> Abhomu-o, engú inde li polofeta Isaya apa e, a atsia amene lie pi uo, engú inde me:

«Ebhe apa me: Yi adú adje 'kpí, yi kó la mboli engú ang-o de.

Yi adú atsia 'kpí, yi ú la 'kpí de.»

<sup>15</sup> <Padhá de, anga Ebhe apa me: okpála inde-e agbite bua o, ngubula me o kó matá mboli 'ngú de.

U anini djila o,

amba o oú matá 'kpí de,

u anini 'dje o,

amba o odjé matá 'kpí de.

U kunda nani nadi bua o de,

abhomu-o, ma tsia ti nani da nakobho uo de.†>

<sup>16</sup> La pi yi-e, a ko djali pi yi anga djila yi ngau 'kpí, 'dje yi la di ngadje 'kpí. <sup>17</sup> Ma apa pi yi na paká me opolofeta bhelé, di ne okpála na ngbingbili bhelé adu nani ne gumu nau ongu yi ngau e inde, la-a, u tsia u de. U adu nani ne gumu nadije ongu yi ngadje e inde, la-a, u tsia dje de.»

*Yesu ambamba ta gbitaku gba kpála nalu nguwa*

*(Tsia bhú Mlk. 4:13-20; di ne bhú Luk. 8:11-15.)*

<sup>18</sup> Abhomu-o, Yesu atsia apa matá pi omukpata gba e me: «Ngayi-e, yi dje nga la ta gbitaku gba kpála nalu nguwa-o. <sup>19</sup> Obhende ngadje ngali na Nau gba Ebhe-e, i ko mbolimboli de-e, uo maka ngo 'hi kpadji inde li nguwa ati li e-o. Djabulu ngago, ani tsia dhépe 'li Ebhe inde u asia e li bua o-o. <sup>20</sup> Okpála koko maka bili na teme inde li nguwa ati li e-o. U ngadje eli-o, u tsia sía kolo ne djali. <sup>21</sup> Engú bini, u 'o de me eli-e toto sie e abhú o-o de. U ngaha lio ngánga bha ngubula

† **13:15** 13:14-15 Tsia bhú Isa. 6:9-10.

nedhinga bedi. Abhomu-o, i du me likabhu, i du di-e mbolo nde ago kabula eli gba Ebhe-e , u ngabala 'kpa li nabhuka má gala!

<sup>22</sup> Okpála koko maka bili li lí oulu na eti adu lie-o. U adje eli-o, engú bini, gamu 'he na doto inde bhú dabili bini ne eu li tia na doto inde-e ngapite uo ne e, nganguvo eli gba Ebhe-e bhú uo. Kaka-a, a tsia lí lí belegu de bini. <sup>23</sup> Engú bini, okpála koko maka doto na dobho. U ngadje eli-o, u la di ngakø mbolimboli. Kaka-a, kulu gba uo ngazu nguwa. Kulu gba okpála koko ngazu nguwa kámá bini, bhe gba okoko ndjikpa madhia, bhe gba okoko ndjikpa bata.»

### *Gbitaku pindji siti ulu*

<sup>24</sup> Yesu atsia apa matá gbitaku koko pi okpála adu adje ani-e me: «Nau na abhúla-a mana lie ne engú inde: bhoko bini alu nani bádha nguwa abhiye gba e. <sup>25</sup> Sukpe bini, nedhinga li ndu okpála hana adu lie tila-a, bhulu yala gba ani-e ago. Ani atsia alu siti ulu bhú ká nguwa-o, ani atsia atapa. <sup>26</sup> Ezu-o akø, abhele, atsia aba lílí. Abhomu-o, siti ulu-o atsia akoto di. <sup>27</sup> Okpála na kulu gba bhulu edyi-e ago ayi ani me: <Ngámá, siti ulu inde-e ayie bhú bádha nguwa mo olu nako e bhú 'dyi gba mu-o su?> <sup>28</sup> Do ani pi uo me: <Bhulu yala amene engú bhomu-o ngae.> Abhomu-o, okpála na kulu-o atsia ayi ani me: <Mo okunda me ya nu luko siti ulu ango-o?> <sup>29</sup> Ani agie pi uo me: <Yi alúko de, anga yi luko-o, yi nú lúko siti ulu bhomu-o ne ezu-o bhú dabili bini. <sup>30</sup> Yi 'o me ndundu bhisi hana bhele bhú



dabili bini akólo nedhinga na'e nguwa abhiye-o. Nedhinga na'e nguwa abhiye-e, ma apá pi okpála na'e nguwa-a me u 'e ngaiza siti ulu-o. U gbigbite 'i'i ngubula natsutsulu, amba pipita-a, u 'o nguwa-a bhú ngbokopi gba ma-o.»

*Gbitaku pindji lí mütadi*

*(Tsia bhú Mlk. 4:30-32; di ne bhú Luk. 13:18-19.)*

<sup>31</sup> Yesu akpokpo matá gbitaku koko pi okpála adu adje ani-e pindji lí ndula inde u a'i e me mütadi.\* Ani pi uo me: «Naɯ na abhúlá-a mana lie ne lí mütadi. Kpála bini aha, ani atsia alu abhiye gba e. <sup>32</sup> A ko lí ndula na yeye ane mane bhú ká olí nguwa hana. Engú la bini, i du me a nde akə-o, i né ndu ezu inde abhú 'dyi-e hana ne endjá, i kólo 'ngbé ndula da napa me odhu na abhúlá go nayiki 'ti o bhú oyáyá-o.»

*Gbitaku pindji levile*

*(Tsia bhú Luk. 13:20-21.)*

<sup>33</sup> Yesu akpokpo matá gbitaku koko pi okpála adu adje ani-e me: «Naɯ na abhúlá mana lie ne levile inde li ələ aha e, ani atsia akpədhələ ne bhiti fufú. Abhomu-o, fufú-o hana atsia afuka.»

*Yesu adu akpo 'ngú bhú ogbitaku ka ni?*

*(Tsia bhú Mlk. 4:33-34.)*

<sup>34</sup> Yesu adu akpokpo ndu 'ngú bhomu-o hana pi bhiti okpála bhú ogbitaku. Ani kpo 'ngú pi uo mandí gbitaku belegu de bini. <sup>35</sup> Ani adu amene

\* **13:31** 13:31 Lí mütadi: A ko mboye lí ndula maka lí kändju.

mo-o ngubula me engú inde nani li polofeta akpokpo e-e amene lie, engú inde me:

«Ma akpókpo 'ngú bhú ogbitaku.

Ma akpókpo 'ngú inde awo lie nayie maka u abho nani doto lie-o.†»

*Yesu ambamba ta gbitaku pindji siti ulu*

<sup>36</sup> Abhomu-o, Yesu a'o ká bhiti okpála inde ani adu akpo 'ngú pi o-o, ani atsia agie lie li bili ani adu nadu li e-o. Omakpata gba ani-e adyudyo lio de ani. U atsia apa pi ani me: «Kpokpo nga ta gbitaku pindji siti ulu inde abhiye-e pi ya.»

<sup>37</sup> Yesu atsia agie pi uo me: «Kpála bhende i ngalu bádha nguwa-a, a ko ma Ndili gba kpála-o.

<sup>38</sup> Edyi-e, a ko doto. Bádha nguwa-a, a ko okpála inde i ngaziba nadu sa líli na Nau na abhúlá-o. Siti ulu-o, a ko okpála bhende ngaziba nadu sa líli gba Djabulu-o. <sup>39</sup> Bhulu yala inde alu siti ulu-o, a ko Djabulu. Nedhinga na'e nguwa abhiye-e, a ko ekpi na soso-o. Obhulu na'e nguwa abhiye-e, a ko oandjelu . <sup>40</sup> Maka u akukuo siti ulu lie ngú nabubu bhú djua-a, a adú bhadi li sokpi-e moko.

<sup>41</sup> Ndili gba kpála atíma oandjelu gba e, u tsia kúo ndu obhulu nato okpála bhú nale ne ndu obhulu namene siti 'ngú hana-a ngú napandja uo bhú ká omaha e mapandja. <sup>42</sup> Pipita-a, u tsia bála uo bhú dé djua. Oo, u adú aku 'gbá, u tsia dú di nazu tate o. <sup>43</sup> Abhomu-o, okpála bhe na ngbingbili-e adú nasu má ngbi ngbi ngbi maka ela bhú Nau gba 'Dyi o-o. Yi dje ndjindji, i du me a nde li yi ne djedje-o!»

† 13:35 13:35 Tsia bhú Ets. 78:2.

*Gbitaku pindji tia awo lie di ne pindji léké*

<sup>44</sup> «Nau na abhúlá-a mana lie ne tia inde li kpála awo e abhú 'dyi. Kpála bini akoto tété, ani atsia awo ne toto. Li djali abhøø la ani lie má kusu-o, ani anu atsindji ndu 'he gba e hana, ani atsia ago akala edyi bhomu-o.

<sup>45</sup> Nau na abhúlá-a mana di matá lie ne kpála natsindji 'he inde ngagili nakala babadha léké.

<sup>46</sup> Nedhinga ani au léké bini na kpéke mase lie, ani anu atsindji ndu 'he adu ka e hana. Ani atsia ago akala léké na kpéke mase-o.»

*Gbitaku pindji nado*

<sup>47</sup> «Nau na abhúlá-a mana matá lie ne nado inde u abhike e bhú 'ngu, inde i ngadhe ndu djua osungu hana. <sup>48</sup> Nedhinga abedhe lie, obhulu nagbe sungu-o gbéle lingo 'gø. Pipita-a, u dúlu, u bhá osungu na babadha-a bhú kili, u tsia bála obhende azi-o. <sup>49</sup> A adú bhadi li sokpi-e moko: oandjelu agó, u tsia gbógbo bhusu okpála na ngbingbili-e ne obhende na sisiti-o. <sup>50</sup> U tsia bála okpála na sisiti-e bhú dé djua. Oo, u adú aku 'gbá, u tsia dú di nazu tate o.»

<sup>51</sup> Yesu atsia ayi omukpata gba e me: «Yi akø mboli ndu ongu bhomu-o hana akø?» U agie me: «Heni.» <sup>52</sup> Abhomu-o, ani atsia apa pi uo me: «A moko, yi maka ndu omusuno na líli gba Moidje hana inde aziba engu pindji Nau na abhúlá-o. Yi maka obhulu 'ti. Yi ngalo bhú ká oehe inde bhú 'ti gba yi-e obhe na mbia, yi tsia ló di obhe na didili.»

*Okpála na Nadjaleta ziba Yesu de*

*(Tsia bhú Mlk. 6:1-6; di ne bhú Luk. 4:16-30.)*

<sup>53</sup> Li Yesu andjia nakpokpo ogbitaku bhomu-o lie, ani ayie oo. <sup>54</sup> Ani atsia anu bhú Nadjaleta, kuti inde ani abhele bhú e-o. Ani aholo nasuno bhú 'ti nadjé líli gba Moidje na kuti bhomu. Nasuno gba ani-e atsia adu nangamba okpála naali. Kaka-a, u atsia adu ayi lio me: «Ani asia ngua imbilangu inde-e su? A aha angu pi ani ngu namene ongamba 'ngú inde-e da? <sup>55</sup> A inde-e ndili gba salapaté-e di? A 'li 'hi ani me Malia adi? Djaki, ne Djodjefu , ne Simo la di ne Djude ne ondaise ani ngao adi? <sup>56</sup> Ondaise ani na olisilisi-e, ndu uo hana gba ní sii adi? Ani ayie la ne ndu 'ngú bhomu-o hana su?» <sup>57</sup> Ka u ambila du ani lie ndjindji-e, u tsia kunda nabhuka ani de. Abhomu-o, Yesu atsia apa pi uo me: «U mamanga polofeta ne ndu bili hana, naneke bha bini bhú kuti u azu ani bhú e di ne bhú piga gba ani.» <sup>58</sup> Yesu atsia amene bha mbo oo ongamba 'ngú bedi ka u bhuka ani lie de-o.

## 14

*Elode aha líli me u bhөлө Djaa bhulü nabatisa okpála*

*(Tsia bhú Mlk. 6:14-29; di ne bhú Luk. 9:7-9.)*

<sup>1</sup> Li nedhinga bhomu-o, Elode Atipasi inde adu ngámá na ndu doto na Galilaya adje engú gba Yesu-o. <sup>2</sup> Ani atsia apa pi omaha e me: «Kpála u ngakpo 'ngú gba e bhomu-o, a ko Djaa bhulü nabatisa okpála! Ani azuku bhú ká okpála amu-o bhomu ngae. Kaka-a, angu namene ongamba

'ngú bhú ani.» <sup>3</sup> Elode pa mo-o padhá de. Ani apa mo-o, anga ani aha nani líli me u holo Djaa, u gbigbite ani, amba u bhike ani bhú tikpɛ li 'ngú gba Elodiade, wala Filipino, ndai ani-o. <sup>4</sup> Ani aholo nani Djaa, anga Djaa adɛ apa pi ani me: «A ayo de me mɛ ha Elodiade maka wala mɛ-o de.» <sup>5</sup> Elode adɛ akɛnda nabhɛlɛ Djaa na paká. Engú bini, ani adɛ akpe okpála makpe. Padhá de, anga u adɛ au Djaa maka polofeta .

<sup>6</sup> La-a, li ekpí nakina nazu Elode-e, ndili na ɛɛlɛ gba Elodiade adho 'bi kala okpála u a'i o bhú 'bi-o. Ebi ango-o atsia anga li Elode naali. <sup>7</sup> Kaka-a, ani atsia atɛ silika me ni ahá pi ndili na ɛɛlɛ bhomɛ-o ndɛ 'he hana inde ani ayó e-o. <sup>8</sup> 'Hi ani atsia ato pi ani me ani yo 'ndji Djaa bhulɛ nabatisa okpála. Abhomɛ-o, ndili-e atsia anɛ apa pi ngámá Elode me: «Ha 'ndji Djaa, Bhulɛ nabatisa okpála mɛma mbia inde-e bhú tsakpa saani!» <sup>9</sup> Ngámá adje likabhu li bua e naali. La ka silika ani atɛ e di ne nakpe djila okpála ani a'i o bhú 'bi-e, ani atsia aha líli me u ha 'ndji Djaa pi ani haha. <sup>10</sup> Abhomɛ-o, ani atsia atima kpála bini me ani nɛ kodho ngulɛ Djaa bhú tikpɛ. <sup>11</sup> Kpála ango-o, anɛ. Ani akodho ngulɛ Djaa, ani atsia ago ne di bhú tsakpa saani. Ani atsia aha pi ndili na ɛɛlɛ bhomɛ-o. Abhomɛ-o, ndili na ɛɛlɛ ango-o atsia anɛ ne di pi 'hi e. <sup>12</sup> Omɛkpata gba Djaa anɛ aha kuo ani, u anɛ azi. U atsia anɛ akpokpo engú akodho 'kpí bhomɛ-o pi Yesu.

*Yesu aha 'zɛ pi okpála kutu bhuluvue  
(Tsia bhú Mlk. 6:30-44; ne bhú Luk. 9:10-17;  
di ne bhú Dja. 6:1-14.)*

<sup>13</sup> Li Yesu adje engú li omɔkpata gba Djaa akpokpo e pi ani-e lie, ani agbe lie li bili bhomɔ. Ani a'ɛ ne omɔkpata gba e bhú zabɛ, u atsia anɔ adulu kpi o kpi li bili li kpála nde li e ade. Li okpála ambila lie, u aloko ne ogudhɔ ngangá, u aha 'nú ne 'dhɔ o lingo 'ngu-o ngú nanɔ nakpata ani. <sup>14</sup> Li Yesu akɛ lie bhú zabɛ-o, ani au bhiti okpála-o. Ani adje ndjinga uo, ani atsia akobho okpála na kuo inde adɛ bhú ká uo-o.

<sup>15</sup> A akolo lie tagolo-o, omɔkpata adyudyo lio de ani. U atsia apa pi ani me: «Ngámá, ekpí-e asegele, bili inde-e la di mimili, gie bhiti okpála inde-e, amba u nɔ kala ehe nazɔ mazɔ pi o bhú okuti.» <sup>16</sup> Engú bini, Yesu agie pi uo me: «Tata li nagie lie ka uo ade. Yi ha ezɔ pi uo ngayi makpe.» <sup>17</sup> Abhomɔ-o, omɔkpata apa pi ani me: «A bha ka ya si ne koli mapa bhuluvue ne osungu bhisi má kpikili!» <sup>18</sup> Yesu agie pi uo me: «Yi go mɔma ne di ei.» <sup>19</sup> Pipita-a, ani aha líli pi bhiti okpála bhomɔ-o me u dulɔ kuto pí ulu-o. Ani atsia aha mapa bhuluvue ne osungu bhisi-o. Ani a'e djila e ne abhúlá, ani agie heni pi Ebhe. Pipita-a, ani agugumɔ mapa-o, ani aha pi omɔkpata, omɔkpata-a atsia agapa li bhiti okpála me u zɔzɔ. <sup>20</sup> U azɔ ndɔ o hana, u atsia a'u'u. U alo dudu bhe atigala-o, a atsia abebedhe okíli ndjikpa ne ká bhisi. <sup>21</sup> Okpála hana inde azɔ-o, u adɛ masikpe de okpála kutu bhuluvue mandí natanga olisi ne ongisi.

*Yesu adholo pí 'ngu*

*(Tsia bhú Mlk. 6:45-52; di ne bhú Dja. 6:15-21.)*

<sup>22</sup> Pipita kolo me-e, Yesu akata omukpata gba e me u 'u'u bhú zabu, amba u gulu 'ngu pi ni kalanu bhú nedhinga ni nde nga lie ngaha kpadji pi bhiti okpála-o. <sup>23</sup> Pita ani aha kpadji pi bhiti okpála lie, ani a'u apí 'ta ngú nayo Ebhe. Ekpí abi li ani kpi e kpi me ani nde nga bha oo. <sup>24</sup> Li zabu li omukpata-a adu bhú e akolo lie mbo ne atu 'ngu-o, anvi aholo nape pí 'ngu-o, atsia adu nandi uo ne sidi. Zabu-o atsia adu adimba ka ngbo 'ngu-o.

<sup>25</sup> Bhú 'gbá 'ngu na bini-e, Yesu aholo nago ne li pápá ne apí uo me ani nde ngadholo pí 'ngu. <sup>26</sup> Li omukpata au ani lie ngadhuku pí 'ngu-o, tsulu aholo uo naali. U adu apa me: «A ko igbadyibhe!» U atsia aholo atu 'ue ka tsulu-o. <sup>27</sup> Engú bini, Yesu atsia apa kolo pi uo me: «A ko ma, yi adjé tsulu de. Yi gbite bua yi.»

<sup>28</sup> Abhomu-o, Piele atsia apa pi ani me: «Ngámá, i du me a nde mu na paká-a, ha líli me ma go bhaka mu me ma nde ngadhuku pí 'ngu.» <sup>29</sup> Do Yesu de-e: «Gogo.» Abhomu-o, Piele aké bhú zabu-o, ani aholo 'nú nabhaka Yesu me ani nde ngadholo pí 'ngu. <sup>30</sup> Engú bini, ani au lie me anvi-e ngape kpekpeke-e, ani adje tsulu. Abhomu-o, ani aholo nalinda bhú 'ngu. Ani atsia asula me: «Ngámá, kobho ma!» <sup>31</sup> Ma 'li ma me-e, Yesu ato 'kpa e, ani atsia aholo ani ne napa pi ani me: «Ngamu, kpála li nabhuka gba e nde yeye, mo osia bua na bhisi bhisi ka ni?» <sup>32</sup> Pipita-a, u a'u'u ndu o bhisi hana bhú zabu-o. Anvi

atsia aguo. <sup>33</sup> Abhomu-o, omukpata bhe adu igini bhú zabu-o akikita lipaku o kuto kala Yesu. U atsia apa pi ani me: «A na paká me mu ne Ndili gba Ebhe!»

*Yesu akobho okpála na kuo bhú ndu doto na Genedjaleta*

*(Tsia bhú Mlk. 6:53-56.)*

<sup>34</sup> Pita li Yesu ne omukpata gba e agulu 'ngu-o lie, u akolo bhú ndu doto na Genedjaleta. <sup>35</sup> Okpála na kuti ango-o ambila lie me a ko Yesu-o, u agapa ngali nago ka ani-e bhú ndu doto ango-o libhomu. Okpála atsia ago pi ani ne ndu obhulu kuo hana. <sup>36</sup> U atsia adu akikiliki lio pi ani me ani 'o o me o bu nga bha mbo 'kpa o li 'so bongo gba ani-o. Abhomu-o, ndu obhende hana adu abu 'kpa o tété-e adu akobho.

## 15

*Kpekebho pindji dasundu gba omuFalisai*

*(Tsia bhú Mlk. 7:1-13, 14-23.)*

<sup>1</sup> Abhomu-o, omuFalisai di ne omusuno na líli gba Moidje inde ayie bhú Yelusalema anu abhaka Yesu. U atsia ayi ani me: <sup>2</sup> «Omukpata gba mu-o ngagumu líli li onguo ogbi ya a'o nani e ka ni? Padhá de, anga u ngavulu 'kpa o kala nazu 'he maka lele li líli-e apa lie ade.» <sup>3</sup> Ani atsia agie pi uo me: «Ala yi-e, yi ngagumu líli gba Ebhe-e ne 'li dasundu gba yi-e ka ni? <sup>4</sup> Padhá de, anga Ebhe apa me: «Manga 'dyi mu ne 'hi mu mamanga.» Ani apa di matá me: «Kpála inde agbó nganda 'dyi e, i du di-e 'hi e, a ayo me u bholo ani



mabhèlè.>† <sup>5</sup> Engú bini ngayi-e, yi ngapa me: «Í dũ me kpála bini nde apa pì okpála inde azu ani-e me, tia inde a ayo igini me ni teteke uo ne e, ni a'o pì Ebhe-e, <sup>6</sup> kpála ang-o matá ne engú namene mamene pì uo ade.» Yi ngagumũ líli gba Ebhe-e li ongua okpadji bhomũ ngú nakpata lele odasundũ gba yi-o. <sup>7</sup> Yi ne obhũlũ kali! Polofeta Isaya pa nani li 'ngú gba yi-e tala me Ebhe apa me:

<sup>8</sup> «Opiga inde-e ngadhøgø bha ma ne 'bhø-o, engú bini, bua uo de ma tsutsu.

<sup>9</sup> Mayo u ngayo ma lie, tata tété ade.

Padhá de, anga nasuno inde u ngasuno e, a ko bha ndũ olíli li okpála ngagbe e ngao.†>»

<sup>10</sup> Pípita-a, Yesu a'i bhiti okpála inde adũ oo me u dyudyo lío de ni masikpe, aní atsia apa pì uo me: «Yi djedje nga, amba yi kø di mboli engú inde ma adjì apa e inde: <sup>11</sup> A ko de me oehe inde ngali bhú 'bhø kpála ngamene ngae me aní adú bubu kala Ebhe de-e de. Oehe bhe ngakoto bhú 'bhø kpála mangbo ngamene ngae me aní adú bubu kala Ebhe de.» <sup>12</sup> Abhomũ-o, omũkpata-a adyudyo lío de aní, u atsia apa pì aní me: «Mũsuno, mũ mbila uu me engú mo opa e ake li bua omũFalísai make-e?» <sup>13</sup> Aní agie pì uo me: «Ndũ 'he hana inde li 'Dyi ma inde abhúla-a lu e ngae de-e, u alúko maluko. <sup>14</sup> Yi 'o uo: a ko okpála i u 'kpí de inde aholo 'kpa obi o ngú nasuno kpadji pì uo. La-a, i dũ me kpála i u 'kpí

† 15:4 15:4 Tsia bhú Det. 5:16; ne bhú Eki. 20:12, 21:17; di ne bhú Lev. 20:9. † 15:9 15:8-9 Tsia bhú İsa. 29:13.

de-e nde aholo 'kpa kilí e ngú nasuno kpadji pi ani-e, ndu uo bhisi hana bála bhú 'dú!»

<sup>15</sup> Piele atsia apa pi ani me: «Kpokpo nga ta gbitaku bhomu-o pi ya.» <sup>16</sup> Do Yesu de-e: «Ngayi di-e, imbilangu nga bhú yi adi? <sup>17</sup> Yi mbila de me ndu 'he hana inde ngali bhú 'bhø kpála ngakodho 'kpí abhú 'bu, u tsia bhíke bhú pedu-o di? <sup>18</sup> Engú bini, ndu 'he hana inde ngakoto bhú 'bhø kpála ngayie li bua ani. A la bhomu-o bhende i ngamene me ani adú bubu kala Ebhe de-o. <sup>19</sup> Padhá de, anga bua kpála ngamene ngae me ani du ne mabhundja na sisiti, ani bhøø kpála bhú gandji, ani kunda øø, i du di-e bhoko koko, ani kunda olisi, i du di-e obhosi ngangá, ani zi 'he, ani pa 'ngú li obi e ne eu, ani sobho la di kpála. <sup>20</sup> A bhomu-o ndu ongú inde ngamene me kpála adú bubu kala Ebhe de-o. A ko de me nazu 'he mandi navalu 'kpa o ngamene me kpála adú bubu kala Ebhe de-e de.»

*Yesu akobho ndili na øøø gba igba Kanana  
(Tsia bhú Mlk. 7:24-30.)*

<sup>21</sup> Pipita-a, Yesu ne omukpata gba e ayie li bili bhomu, u atsia anu li pápá na ndu doto li ogudhu na Tile ne Sidona adu bhú e-o. <sup>22</sup> Øø bini du nani nadu bhú ndu doto ango-o. A adu nani igba maYuda de, a ko nani naae igba Kanana. Me-e, ani ago abhaka Yesu ne nasusula me: «Ngámá, ndili gba Davidi, dje nga bha-a mbo ndjinga ma! Siti bua ngato mbolo li ndili na øøø gba ma-naali.» <sup>23</sup> Engú bini, Yesu gie engú pi ani belegu de bini. Omukpata gba ani adyudyo lio de ani, u atsia apa pi ani me: «Musunu, mu ti da namene

engú ani ngayo e ka mɔ-o pɪ ani di, amba ani 'o nakpata ní ne tolo gba e bhomɔ-o?»

<sup>24</sup> Yesu agie pɪ uo me: «Ebhe atima bha ma ngú nagili okpála na Isalaele inde maka okandele inde angita-o.» <sup>25</sup> Engú bini, ɔlɔ ango-o ago atutu lipuku e kuto kala ani ne napa me: «Ngámá, go teteke nga bha mbo ma!» <sup>26</sup> Yesu agie pɪ ani bhú gbitaku me: «A ndjindji ade me u ha ezɔ gba ongisi-e, u bhike pɪ obulu-o de.» <sup>27</sup> Ɔlɔ ango-o agie me: «A ko paká Ngámá, la-a, obulu ngazɔ okulu 'zɔ inde ngabala sa misa gba omakulasi o-o.» <sup>28</sup> Abhomɔ-o, Yesu agie pɪ ani me: «'Hi ma-a, nabhuka gba mɔ-o ngebéngbé! A ayo me Ebhe ha ehe inde mo okunda e pɪ mɔ.» Abhomɔ-o, ndili gba ani-e atsia akobho bha li nedhinga bhomɔ.

*Yesu aha 'zɔ pɪ obhosi kutu badha  
(Tsia bhú Mlk. 8:1-10.)*

<sup>29</sup> Abhomɔ-o, Yesu ayie oo, ani atapa lingo ekpe na Galilaya. Ani a'ɔ apí 'ta, ani atsia adɔ kuto. <sup>30</sup> Okpála bhelé ago abhaka ani. U ago ne okpála adɔ ne eze li 'dhu o, ne okpála li djila o adudu, ne okpála li yá o apɔ, ne obhe i bhɔ 'ngú de, la di ne okpála koko bhelé inde adɔ li o ne kuo. U abu uo bhú li 'dhu Yesu, ani atsia akobho uo. <sup>31</sup> Okpála atsia adɔ angamba naali nedhinga u adɔ au okpála i bhɔ 'ngú de-e lie ngagama 'ngú-o, obhe li yá o apɔ adɔ lie akólo ne angu-o, nedhinga di li obhe adɔ ne eze li 'dhu o adɔ adholo lie ndjindji-o, ne nedhinga li obhe i u 'kpí de-e adɔ lie au 'kpí-o. U atsia aholo nadhege Ebhe gba omaf salaele-o.

<sup>32</sup> Abhomu-o, Yesu a'i omukpata gba e-o. Ani atsia apa pi uo me: «Ma ngadje ndjinga bhiti okpála inde, anga akolo mbia inde-e 'kpí bata u bha ngadu de ma si, ehe nazu mazú la matá di ka uo ade. Ma kunda nagie uo gumu de, anga angu uo ti da nandjia li kpadji.» <sup>33</sup> Omukpata atsia ayi ani me: «Ní ti da nasia mapa na tetele bhú mili bili inde-e su, inde i ti da nale ne bhiti okpála inde-e?» <sup>34</sup> Yesu atsia ayi uo me: «A ka yi ne mapa madho?» U agie pi ani me: «A ka ya ne mapa mananika ne mbo odjedje sungu.» <sup>35</sup> Abhomu-o, Yesu apa pi bhiti okpála me, u dudu kuto. <sup>36</sup> Ani atsia aha mapa mananika ne osungu-o. Pita nagie heni pi Ebhe-e, ani agugumu, ani aha pi omukpata-o, u atsia agapa li bhiti okpála me u zuzu. <sup>37</sup> U azu ndu o hana, u atsia a'u'u. Omukpata apo bhúla dudu-o, atsia abebedhe okili mananika. <sup>38</sup> Okpála hana inde azu-o, adu obhosi kutu badha mandi nako olisi ne ongisi. <sup>39</sup> Pita li Yesu aha kpadji pi bhiti okpála lie, ani a'u bhú zabu, ani atsia atapa bhú ndu doto li gudhu na Magadana adu bhú e-o.

## 16

*Omufalisai ne oSadukai ayo ngamba 'ngú ka Yesu*

*(Tsia bhú Mlk. 8:11-13; di ne bhú Luk. 12:54-56.)*

<sup>1</sup> Abhomu-o, omufalisai ne oSadukai ago abhaka Yesu. U adu akunda nale ani. Kaka-a, u atsia ayo ka ani me ani mene nga bha ngamba 'ngú bini pi o inde asúno me Ebhe atima ani

ngae. <sup>2</sup> Ani agie pi uo me: «Í kolo tagolo-o, yi pá me: <Ekpí-e adú babadha, anga bhúla 'kpí-e akodho má ngbí, oikúpala aze la di bhelé.> <sup>3</sup> Í du di-e kəkpi-e, yi pá me: <Naki-e, ekpí-e adú sisiti, anga bhúla 'kpí-e mbembe, a la di ne biti.> Yi mbila hana me bhúla 'kpí-e du me-e, a akúnda napa pi-ie. La-a, ongú inde ngakodho 'kpí bhú onedhinga inde-e, yi mbila de me akúnda napa pi-ie de! <sup>4</sup> Okpála na naki inde-e sisiti, u bhuka la di Ebhe ne bua o bini de! U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende ani amene nani e li polofeta Djonasi ko.» Pipita-a, Yesu a'o ka uo oo, ani atsia atapa.

*Yesu agbele 'dje omukpata gba e li 'ngú gba omuFalisai ne oSadukai  
(Tsia bhú Mlk. 8:14-21.)*

<sup>5</sup> Li Yesu ne omukpata gba e agulu ekpə na Galilaya lie, omukpata-a a'ili 'to o li naha mapa. <sup>6</sup> Yesu atsia apa pi uo me: «'E-e! Yi lila liyi ka levile gba omuFalisai ne oSadukai-e malila!» <sup>7</sup> Abhomu-o, omukpata aholo napa sunda o me: «Ani ngapa mo-o, anga ní go ne mapa de.» <sup>8</sup> Engú bini, Yesu ambila engú ango-o, ani atsia apa pi uo me: «Nabhuka gba yi-e yeye. Ka ni yi ngapa lie sunda yi me, yi go ne mapa di-e? <sup>9</sup> Yi kə nga mboli engú bini di? Yi a'ili 'to yi li mapa bhuluvue inde ma agapa nako e li okpála kutu bhuluvue a'ili? Yi atsia a'ili la di 'to yi me o obebedhe nako okili madho-ie ne dudu-o?

<sup>10</sup> La di-e, yi a'ili 'to yi li mapa mananika inde ma agapa nako e li okpála kutu badha a'ili? Yi

atsia a'ili la di 'to yi me o obebedhe nako okíli madho-ie ne dudu-o? <sup>11</sup> Ma apa igini lie pi yi me yi lila liyi ka levile gba omuFalisai ne oSadukai malila-a, ma pa igini bhomu-o engú na mapa de. Yi kə mbolimboli de ka ni?» <sup>12</sup> Abhomu-o, omukpata-a atsia akə la mboli 'ngú ango-o me ani pa engú nalila lie ka levile na mapa de, engú bini, a ko nalila lie ka nasuno gba omuFalisai di ne oSadukai ko.

*Piele apa me Yesu ne da-ie*

*(Tsia bhú Mlk. 8:27-30; di ne bhú Luk. 9:18-21.)*

<sup>13</sup> Li Yesu ne omukpata gba e akolo lie bhú ndu doto li gudhu na Sedjale gba Filipo adu bhú e-e, ani ayi uo me: «Okpála ngapa me ngama Ndili gba kpála-a, ma ne da?» <sup>14</sup> U agie pi ani me: «Pi okpála koko-o, mu ne Djaa bhulu nabatisa okpála. Pi okoko-o, mu ne Eliya. Pi okoko matá-a, mu ne Djelemi, i du di-e saka opolofeta koko.» <sup>15</sup> Ani apa pi uo me: «A la yi-e, yi ngapa naayi me ma ne da?» <sup>16</sup> Simo Piele atsia agie pi ani me: «Mu ne Masiya , Ndili gba Ebhe inde uu-o.»

<sup>17</sup> Abhomu-o, Yesu atsia apa pi ani me: «A ko djali pi mu, Simo, ndili gba Djaa , anga ambamba ta engú na kukulu inde-e pi mu ne kpála de, engú bini, ambamba tata pi mu ne 'Dyi ma inde abhúlá ko. <sup>18</sup> Kaka-a, ma apa pi mu me a 'li mu me Piele, mu maka teme. Piga gba ma-a alú pí

teme angu-o.\* Angu kuo kólo tété de. <sup>19</sup> Ma ahá olifungula na Nau na abhúlá-a pi mu. Ne angu inde ma aha e pi mu bhomu-o, ndu 'he hana inde mo ogbíte e píla doto-o, agbíte bhadi lie abhúlá moko. Ndu 'he hana inde mo obhúlu e píla doto-o, abhúlu bhadi lie abhúlá moko.» <sup>20</sup> Abhomu-o, Yesu atsia aha líli pi omukpata-a me u apá belegu pi kpála bini de me ni ne Masiya-a de.

*Yesu akpo 'ngú pindji nakpi ne nazuku ka e (Tsia bhú Mlk. 8:31, 9:1; di ne bhú Luk. 9:22-27.)*

<sup>21</sup> Nayie bhú nedhinga bhomu-o, Yesu aholo nasuno pi omukpata gba e mbámbá me: «A ayo me ma nu bhú Yelusalema. Oo, ma djé likabhu naali sakpa obhelesi okpála, sakpa ongbengbe odimandè gba Ebhe , di ne sakpa omusuno na líli gba Moidje-o . U abhólè ma. La-a, bhú 'kpí na bata-a, ma tsia zúku.» <sup>22</sup> Abhomu-o, Piele agbele aní ne lí ngongo, aní aholo naboyo aní ne napa pi aní me: «Ngámá, a ayo me Ebhe lila mu! A mo-o ade, engú bhomu-o kólo lí mu de!» <sup>23</sup> Engú bini, Yesu adji lie, aní atsia apa pi Piele me: «Yie oo ko, Satana ! Mu ne ndjukudu lí kpadji gba ma-o. Padhá de, anga omabhundja gba mu-o, a ko bhende gba Ebhe-e de, engú bini, a ko bhende gba okpála.»

*A ayo namene ni ngú nakpata Yesu-o?*

---

\* **16:18** 16:18 Piga gba ma-a alú pí teme bhomu: A akunda napa me Piga gba Ebhe-e alu pí 'li Piele inde aní apa e me Yesu ne Masiya, Ndili gba Ebhe inde uu-o. Tsia bhú Mat. 16:16, di ne bhú Efe. 2:20.

24 Abhomu-o, Yesu atsia apa pi omukpata gba e me: «I du me kpála bini nde akunda bha nakpata ma na paká-a, a ayo me ani 'o nabhundja 'ngú gba e makpe. A ayo me ani bi kulusi gba† e-o, amba ani kpata ma. 25 Padhá de, anga i du me kpála nde akunda nalila mukobho gba e, ani kpí. I du la me kpála nde atse 'kpa li mukobho gba e ngubula ma-a, ani sía mukobho na kukulu. 26 La di-e, i du me kpála nde asia ndu 'he hana na doto, engú la bini, ngaani makpe ani kpi-e, ani asía bhúbhú mangua 'he dho? Kpála ti da nakala mukobho gba e ka Ebhe ne mangua 'he dho? 27 Padhá de, anga Ndili gba kpála agó ne oandjelu gba e bhú sangu gba 'Dyi e-o. Abhomu-o, kpála ne kpála tsia sía mbini kulu gba e sakpa ani nakpata lele kulu inde ani amene e-o. 28 Ma apa pi yi na paká me, okpála koko bhú ká obhende inde si-e, mú padhá de, u aú ngaiza nago gba Ndili gba kpála maka 'ngbé ngámá kalanu.»

## 17

### *Zi Ebhe asa Yesu ngbalina*

*(Tsia bhú Mlk. 9:2-13; di ne bhú Luk. 9:28-36.)*

1 Pita ekpí madhia, Yesu aha Piele, ne Djaki ne ndai e Djaa . Ani anu ne uo titi o apí 'ndjá 'ta. 2 Bha si me-e, ani adji lie kala uo kpí. Bhúla ani aholo nasu má ngbi ngbi ngbi maka zi 'ndji 'la! Obongo li kute ani-e, akolo bububu maka zi 'kpí. 3 Kolo me-e, Moidje ne Eliya aze li uo, u atsia aholo agama 'ngú ne ani. 4 Abhomu-o, Piele

† 16:24 16:24 Nabi kulusi gba e: A ko naziba nazu likabhu di ne nakpi kabula Yesu.



atsia apa pi Yesu me: «Ngámá, a ndjindji me ní dũlũ sí. I dũ me mũ nde akũnda-a, ma yíki 'ti ngbangbali bata: bini pi mũ, bini pi Moidje, bini pi Eliya.»

<sup>5</sup> Nedhinga ani adũ nga bha lie nagama 'ngũ-o, ndindi inde adũ li e ne zizi-e ago abuku uo hana. Me-e, eli akoto bhú ndindi ango-o atsia apa pi uo me: «Kpála inde-e ne Ndili gba ma na makũnda. Engú gba ani-e nga li ma naali. Yi dje ani!» <sup>6</sup> Li omũkpata adje lie mo-o, u adje tsulũ naali. Kaka-a, u atuko kuto, u atsia atutũ bhũla o bhú doto. <sup>7</sup> Abhomũ-o Yesu adyudyo lie de uo, ani a'o 'kpa e li kute uo, ani atsia apa me: «Yi yie bhúlá! Yi adjé tsulũ de!» <sup>8</sup> Na'e djila o ka uo me-e, u u kpála bini de, u au bha Yesu kpi e kpi. <sup>9</sup> Nedhinga u adũ nakø eta-a lie, Yesu atsia aha líli inde-e pi uo me: «Yi apá engú inde yi au e pi kpála bini de, nakolo bha li nedhinga li ngama Ndili gba kpála ma azúku lie ko.»

<sup>10</sup> Abhomũ-o, omũkpata ayi ani me: «Ka ni li omũsuno na líli gba Moidje ngapa lie me, a ayo me Eliya go ngaiza kala me Masiya go-o?» <sup>11</sup> Ani agie me: «A moko, Eliya agó mago, ani tsia léke ndũ 'ngú hana ndjindji. <sup>12</sup> Engú la bini, ma apa pi yi me Eliya ago nani ago. Okpála mbila ani de, engú bini, u amene ndũ 'ngú hana li kute ani maka u akũnda lie. A ayo me ngama Ndili gba kpála ma dje bhadi likabhu ka uo moko.» <sup>13</sup> A la bhomũ-o, nambila ka omũkpata-a me ani adũ akpo 'ngú pi o pindji Djaa bhulũ nabatisa okpála.

*Yesu akobho ndili bini na bhobhoko li siti bua*

*adu nadu bhú e*

*(Tsia bhú Mlk. 9:14-29; di ne bhú Luk. 9:37-43a.)*

<sup>14</sup> Yesu ne omukpata gba e bata akø eta-o. U akolo lie de kambì okpála-a, kpála bini adyudyo lie de Yesu. Anì atutu lipaku e kuto kala anì, <sup>15</sup> anì atsia apa pì anì me: «Ngámá, dje nga mbo ndjinga ndilì gba ma na bhobhoko-o. A li anì ne kuo na gbulu magbulu. A ngagbo 'i anì bhú djua, i du di-e bhú 'ngu pìko. Anì ngadje likabhu naali. <sup>16</sup> Ma anu ne anì pì omukpata gba mu-o, la-a, u ti da nakobho anì de.» <sup>17</sup> Do Yesu de-e: «Ngayi-e, nabhuka gba yi-e su? Yi ne okpála na sisiti. Ma adú bhú dabilì bini ne yi akólo bhú mangua nedhinga dho? Ma akíbila yi akólo bhú mangua nedhinga dho? Yi go ne anì muma ei.» <sup>18</sup> U ago pì anì ne ndilì-o. Yesu ambe bhú 'ndjì siti bua-o, siti bua ango-o atsia akoto bhú ndilì-o. Nayie bha li nedhinga bhomu-o, ndilì ango-o atsia akobho.

<sup>19</sup> Abhomu-o, omukpata-a adyudyo lio de Yesu, u atsia ayi anì me u nde ne uo kpi o kpi me: «Musuno, ka ni ngaya makpe ya ti igini da nagbe siti bua bhomu-o lie di-e?» <sup>20</sup> Yesu agie pì uo me: «A ko anga nabhuka gba yi-e mbomboye. Padhá de, anga ma apa pì yi na paká me, i dú me li nabhuka gba yi-e dú nga bha bhú 'ngbé lie maka lí kundju-o, yi de pá pì eta inde-e me: <Yie si, nu aoo>, i tsia nú oo. Kpéke da 'ngú de dú pì yi de. [<sup>21</sup> La di-e, ngua siti bua bhomu-o tí da nakoto bha ka mayo bhú dabilì bini ne natse 'zu ngú nayo Ebhe.»]

*Yesu akpo 'ngú pindjì nakpi ne nazuku ka e*

*bhutsibhutsi na bhisi*

(*Tsia bhú Mlk. 9:30-32; di ne bhú Luk. 9:43b-45.*)

<sup>22</sup> Ekpí bini, Yesu ne omukpata gba e anu apo bhúla o ndu o hana abhú ndu doto na Galilaya. Aní atsia apa pí uo me: «A ayo me u pu ma Ndili gba kpála pí okpála na doto, <sup>23</sup> amba u bhølo ma, engú bini, bhú ekpí na bata-a, ma tsia zúku.» Abhomu-o, bua omukpata atsia asia likabhu naali.

*Yesu akala mandjandja na 'ngbé 'ti Ebhe gba omaYuda-o*

<sup>24</sup> Yesu ne omukpata gba e akolo bhú Kapalanauma. Li u akolo lie oo-o, okpála atsitsindji mandjandja na 'ngbé 'ti Ebhe gba omaYuda-a adyudyo lio de Piele, u atsia ayi aní me: «Musunò gba yi-e kakala naae mandjandja na 'ngbé 'ti Ebhe-e di?» <sup>25</sup> Piele agie me: «A mo ade, aní kala makala.» Li Piele alí la lie abhú 'ti-e, Yesu akpo nagama 'ngú ngae. Aní ayi Piele me: «Simo, mo obhundja pí? A kakala mandjandja, i du di-e otakisi gba ongbengbe ongámási na doto da, ne me a ko ongisi gba uo, ne me a ko okpála koko?» <sup>26</sup> Piele agie me: «A kakala ne okpála koko.» Abhomu-o, Yesu atsia apa pí aní me: «Í du mo-o, ongisi gba ongámási kála naao de, anga uo bhú ngu o. <sup>27</sup> La-a, ngú napa me bua okpála inde-e asíti de-e, nu abhú ekpø. Bhike engbe bhú 'ngu. Sungu na kalanu inde mo ogbé e, bhulu 'bhø aní. Mo obháka oo lí falanga bini. Haha, amba ma ha pí uo, ngubula ní ne ma.»

# 18

*A ngbéngbé bhú Nau na abhúlá-a da?*

*(Tsia bhú Mlk. 9:33-37; di ne bhú Luk. 9:46-48.)*

<sup>1</sup> Bhú nedhinga bhomu-o, omukpata adyudyo lio de Yesu, u atsia ayi aní me: «A nga ngbéngbé bhú Nau na abhúlá-a da?» <sup>2</sup> Yesu a'i mboye ndili bini, aní a'o aní tu uo, <sup>3</sup> aní atsia apa me: «Ma apa pi yi na paká me, i du me yi nde li bua yi de, yi ké liyi ne kuto ngú nakolo maka ongisi na djedjedje de-e, yi lí belegu bhú Nau na abhúlá-a de. <sup>4</sup> Padhá de, anga gagala 'ngú bhú ndili ade. Kaka-a, kpála bhende i ngakø lie ne kuto maka mboye ndili inde-e, kpála angø-o ngbéngbé bhú Nau na abhúlá-a ngæ.»

*Yi ató okpála koko bhú siti 'ngú de*

*(Tsia bhú Mlk. 9:42-48; di ne bhú Luk. 17:1-2.)*

<sup>5</sup> Yesu atsia apa matá pi omukpata gba e me: «Kpála bhende asía nga bha belegu kpála bhende ngakø lie ne kuto maka mboye ndili inde-e ka 'li ma-a, kpála angø-o ngasia bhomu-o ma makpe. <sup>6</sup> Engú bini, li kpála bini to suka ongisi bini inde abhuka ma-a bhú siti 'ngú-o, a ndjindji pi aní me u gbite ngingi tangulá aní, amba u bhike aní bhú 'ngbé 'ngu. <sup>7</sup> A ko likabhu pi okpála na doto, anga a ne ongú bhelé inde ngato uo bhú siti 'ngú! A moko, engú na sisiti néke galikpe 'kpí bini de, engú la bini, a ko likabhu pi kpála inde i ngayie ka e ko!

<sup>8</sup> I du me 'kpa mu, i du di-e 'dhu mu nde ngato mu bhú siti 'ngú-o, mu de kodho, amba mu bhike

de mɛ tsutsu. Padhá de, anga a ndjindji pi mɛ nali bhú mɛkobho na kɛkɛlɛ ne ekpa bini, i dɛ di-e edhɛ bini. Bhobhomɛ-o ane ne bádha me u bhike mɛ ne 'kpa mɛ bhisi, i dɛ di-e ne 'dhɛ mɛ bhisi hana bhú djua na dɛdɛma! <sup>9</sup> I dɛ di me lí djila mɛ bini nde ngato mɛ bhú siti 'ngú-o, mɛ de gbe, amba mɛ bhike de mɛ tsutsu. Padhá de, anga a ndjindji pi mɛ nali ne djila mɛ bini bhú mɛkobho na kɛkɛlɛ. Bhobhomɛ-o ane ne bádha me u bhike mɛ ne djila mɛ bhisi hana bhú djua na dɛdɛma!»

*Gbitaku gba kandøø inde angita  
(Tsia bhú Luk. 15:3-7.)*

<sup>10</sup> Yesu atsia apa matá pi omɛkpata gba e me: «'E-e! Yi aú sɛka okpála inde ngakø lio ne kuto maka ongisi inde-e padhá de, anga ma apa pi yi me abhúlá-a, oandjelu gba uo ngalɛ ndɛ nedhinga hana kala 'Dyi ma. [<sup>11</sup> Padhá de, anga ngama Ndili gba kpála ma ago nani ngú nakobho kpála bhende angita ko.]

<sup>12</sup> Yi ngabhundja pi? Li kpála bini dɛ ne okandøø kámá bini-e, li sɛka uo bini ngita-a, ani 'ó ká obhende ndjikpa odukpabini ne ká odukpabini-e apí 'ta di, ani tsia nú nagili bhende angita-a di? <sup>13</sup> I dɛ la me ani nde au ani au-o, ma apa pi yi na paká me, ani bédhe ne djali bedhe ane djali inde ani nde ne e ngú obhende ndjikpa odukpabini ne ká odukpabini inde i ngita naao de ko. <sup>14</sup> A moko, 'Dyi yi inde abhúlá-a kɛnda de me sɛka okpála inde ngakø lio ne kuto maka ongisi inde-e ngita belegɛ de bini.»

*Naleke 'ngú sùnda o ne ondaise o*

<sup>15</sup> Yesu apa matá pí omùkpata gba e me: «Li ndai mụ mene mụ sisiti-e, mụ de nụ bhaka anị, amba mụ suno siti 'ngú gba anị-e pí anị me yi nde bhisi ka yi ne anị. Anị dje mụ-o, amba mo osia ndai mụ asia. <sup>16</sup> Anị dje mụ de-e, mụ de nụ, mụ ha kpála bini, i dū di-e okpála bhisi, amba <engú ango-o lụ li 'li okpála bhisi, i dū di-e okpála bata†> maka li Bhuku gba Ebhe apa lie ko. <sup>17</sup> Anị dje uo de-e, mụ de pa engú ango-o bhú Piga gba Ebhe. I dū la me anị nde ayala nadje belegu okpála na Piga gba Ebhe-e, a ayo me anị kolo pí mụ maka mụpagano, la di maka ndombi na mandjandja.

<sup>18</sup> Ma apa pí yi na paká me, ndu 'he hana inde yi agbíte e píla doto-o, a agbíte bhadi lie abhúlá moko. Ndu 'he hana la di yi abhúlu e píla doto-o, a abhúlu bhadi lie abhúlá moko.»

*Nayo bhú dabilì bini*

<sup>19</sup> Do Yesu pí omùkpata gba e de-e: «Ma apa matá pí yi me, i dū me píla doto, okpála bhisi bhú ká yi nde adje lio ngú nayo 'he, abana i dū bha mangua 'he dho-ie, 'Dyi ma inde abhúlá-a há ehe ango-o pí uo. <sup>20</sup> Padhá de, anga bilì inde li okpála bhisi, i dū di-e okpála bata apo bhúla o lie ne 'li ma-a, ma bhú ká uo oo.»

*Yi mbu li ondaise yi*

<sup>21</sup> Abhomu-o, Piele adyudyo lie de Yesu, do anị pí anị me: «Ngámá, li ndai ma mene siti 'ngú li pabilì gba ma-a, ma de mbu li anị bhùtsibhùtsi madho? A apise li bhùtsibhùtsi mananika?»

† 18:16 18:16 Tsia bhú Det. 19:15.

22 Yesu agie pi ani me: «Ma pa pi mu de me a apise li bhutsibhutsi mananika-a de, engú bini, a apise li bhutsibhutsi ndjikpa mananika bhutsibhutsi mananika.

23 A bhadi moko, Naɯ na abhúlá-a, a maka tsingɯ gba 'ngbé ngámá bini inde akunda nani naleke 'ngú na tia gba e ne okpála na kulu gba e-o. 24 Kalanɯ-o, u ago pi ani ne bhe bini inde adu ne tia gba ani-e bhelé na kuo kuo. 25 Li tia du la lie ka ani ngú nagigie de-e, ngámá-a atsia aha líli me u tsindji ani, ne wala ani, ne ongisi gba ani, la di ne ndu 'he gba ani-e hana, amba ni sia tia gba ni-e bhúbhú. 26 Abhomɯ-o, kpála na kulu-o ati bhú 'li 'dhu ani, ani atu 'ndji e ne kuto, ani atsia akikiliki lie pi ani me: <Du nga mbo ne 'ndjá bua li pabili gba ma, ma agie ndu tia gba mu-o hana.> 27 Ngámá adje ndjinga ani, ani ambu li ndu bopulu gba ani-e hana. Ani atsia a'o ani me ani nunu.

28 Li kpála na kulu angoo akoto lie, ani aké lie ne saka kilí e na kulu-o bini. Kpála angoo adu ne bopulu gba ani na lí falanga kámá bini má kpikili! Ani ati li ngulu kpála na bopulu gba e bhomu-o má gbu! Ani aholo nafele ngulu ani me ni ngabhelo ani ne napa pi ani me: <Gie falanga gba ma inde ka mu ko.>

29 Kilí ani angoo ati bhú li 'dhu ani, ani aholo nakikiliki lie pi ani me: <Du nga mbo ne 'ndjá bua li pabili gba ma, ma agie pi mu magie.>

30 Engú bini, bhe koko ayala. La matá pépé-e, ani aha ani, ani anu ne ani me u to ani bhú tikpu akólo bha bini li ani agie bopulu gba e lie-o.

<sup>31</sup> Li obi ani koko au lie mo-o, u adje likabhu li bua o naali. Kaka-a, u anu akpokpo ndu 'ngú bhomu-o hana maka a akodho 'kpí lie pí ngámá gba o-o.

<sup>32</sup> Abhomu-o, ngámá gba ani-e atsia apa me u 'i ani. Do ngámá-a pí ani de-e: «Mú ne siti kpála na kulu! Ma ambu li ndu bopulu gba mú inde-e hana, anga mo okikiliki limu muma. <sup>33</sup> Ngamu di-e, a ayo igini de me mú dje di ndjinga kilí mú maka ngama makpe ma adje ndjinga mú lie di?» <sup>34</sup> Bua ngámá-a ake naali. Ani aha ani, ani anu ne ani pí okpekpeke obhosi me u mene ani kpekpeke, ngú nakolo bha bini li 'kpí inde ani agie ndu bopulu gba e lie hana ko.

<sup>35</sup> 'Dyi ma inde abhúlá améne bhadi pí yi moko, i du me kpála ne kpála nde mbu li ndai e ne bua e hana de ko.»

## 19

*Yesu asuno pindji nagbo bhusu o bhú kva  
(Tsia bhú Mlk. 10:1-12.)*

<sup>1</sup> Nedhinga li Yesu andjia nagama ongu bhomu-o lie, u ayie ne omukpata gba e bhú ndu doto na Galilaya. U atsia anu bhú ndu doto na Yudaya inde lingo ngade 'ngu na Djuludani-o. <sup>2</sup> Bhiti okpála akpata ani oo. Abhomu-o, ani atsia akobho okpála na kuo inde adu bhú ká uo-o.

<sup>3</sup> Omufalisai koko adyudyo lio de ani. U atsia ayi ani ngú nale ani me: «Líli gba ní-e aziba pí bhoko uu me ani gie wala e abana i du bha mangua 'ngú dho-ie?» <sup>4</sup> Ani agie me: «Yi tanga nga engú li Bhuku gba Ebhe-e apa e de me



nani li lilita-a, Ebhe abho uo ɛlɛ ne bhoko-o di?†  
<sup>5</sup> Bhuku ango-o atsia apa matá me: ka 'ngú ango-o, bhoko a'ó ká 'dyi e ne 'hi e, ani tsia dhédhe li wala e. Ndu uo bhisi hana tsia kólo koli kpála bini.† <sup>6</sup> Kaka-a, ma apa pi yi me, uo matá bhisi ade. Engú bini, u akolo koli kpála bini. A ayo de me kpála gbo bhusu 'he inde li Ebhe agbite e de!» <sup>7</sup> Abhomu-o, omuFalisai ayi ani me: «Ka ni la li Moidje aha nani líli lie me bhoko ha balua nagbo bhusu e pi wala e nedhinga ani agie ani lie?» <sup>8</sup> Yesu agie me: «Moidje aha nani kpadji pi yi ngú nagie olisi gba yi-e ka kpéke 'ndji gba yi-o. Engú la bini, a li lilita-a, adu nani mo-o de. <sup>9</sup> Ma apa pi yi me: i du me kpála nde agie wala e, a nde de me ɛlɛ ango-o akunda gala bhoko de-e, i du me kpála ango-o nu ha ɛlɛ koko-o, kpála ango-o akunda bhomu-o ɛlɛ koko.»

<sup>10</sup> Omukpata-a apa pi ani me: «I du me líli gba bhoko li pabili gba wala e nde mo-o, tata li naha lio ade.» <sup>11</sup> Ani agie pi uo me: «Ndu okpála hana kɛ mboli engú bhomu-o de, bha bini obhende li Ebhe aka kpadji pi o tété-o. <sup>12</sup> A ne engú bhelé bhelé inde nga'o me kpála dudu bhú lingbangi. Pi okpála koko-o, u azu uo me angu na ɛlɛ nde bhú uo ade. Pi okoko, okpála asiti uo ngao. A la di ne okoko i ha olisi de, ngubula na'o lio kpi ngubula Nau na abhúlá . A ayo me kpála inde ati da nakɛ mboli nasuno inde-e, ani kɛ mbolimboli kɛkɛ.»

---

† 19:4 19:4 Tsia bhú Dje. 1:27, 5:2. † 19:5 19:5 Tsia bhú Dje. 2:24.

*Yesu atuko bisagu pí ongisi*

*(Tsia bhú Mlk. 10:13-16; di ne bhú Luk. 18:15-17.)*

<sup>13</sup> Abhomu-o, okpála ago pí Yesu ne ongisi ngubula me aní 'o 'kpa e pí 'ndji uo, amba aní yo Ebhe pí uo. Engú bini, omukpata aholo nayoko okpála ang-o. <sup>14</sup> Yesu atsia apa pí omukpata-a me: «Yi 'o ongisi bhomu, u go bhaka ma, yi ayóko uo de, anga Nau na abhúlá pí okpála bhende li bua o nde maka ongisi ko.» <sup>15</sup> Aní a'o 'kpa e pí 'ndji uo, pípita-a, aní atsia ayie li bili bhomu-o.

*Bhulu tia bini ayi 'ngú pindji mukobho na duduma*

*(Tsia bhú Mlk. 10:17-31; di ne bhú Luk. 18:18-30.)*

<sup>16</sup> Abhomu-o, makombi bini adyudyo lie de Yesu. Aní atsia ayi aní me: «Musuno, a ayo me ma mene mangua bádha 'ngú dho ngú nasia mukobho na duduma-a?» <sup>17</sup> Yesu agie pí aní me: «Mu ngayi ma pindji bádha 'ngú ka ní? Koli bádha kpála bha bini. I du me mu nde akunda nali bhú mukobho na duduma-a, lila olíli-e malila.» <sup>18</sup> Makombi ang-o ayi Yesu me: «Olíli bhedho?» Yesu agie pí aní me: «Mo obhéle kpála de, mo okúnda øle, i du di-e bhoko koko de, mo ozi 'he de, mo opá 'ngú li kilí mu bhú djila okpála ne eu de. <sup>19</sup> Manga 'dyi mu ne 'hi mu mamanga. Kunda kilí mu maka mo okunda limu lie ngamu makpe-o.†» <sup>20</sup> Makombi-e apa pí aní me: «Ndu 'he bhomu-o hana, ma amene. A

† 19:19 19:18-19 Tsia bhú Eki. 20:12-16; ne bhú Det. 5:16-20; di ne bhú Lev. 19:18.

aneke matá ma ne bhedho?» <sup>21</sup> Yesu apa pi ani me: «Í dũ me mũ nde akũnda nadũ ngingbili-e , nũ tsindji ndũ 'he inde ka mũ-o hana, amba mũ ha tia ango-o pi obhũlu ndibhili. Abhomũ-o, mũ tsia sía tia abhũlá. Pipita-a go kpata ma!» <sup>22</sup> Li makombi bhomũ-o adje 'ngũ bhomũ-o lie, ani agie lie ne likabhu naali, anga tia adũ nani ka ani na mũgwe mũgwe.

<sup>23</sup> Abhomũ-o, Yesu atsia apa pi omũkpata gba e me: «Ma apa pi yi na paká me, da nali ka bhũlu tia bhũ Nau na abhũlá-a kpekpeke. <sup>24</sup> Ma amata apa pi yi ne toto me da nali ka enũ maka eya li gudho mũsana kpekpeke. La-a, da nali ka bhũlu tia bhũ Nau gba Ebhe-e ane la matá ne kpéke.» <sup>25</sup> Li omũkpata adje eli bhomũ-o lie, u angamba na kuo kuo. U adũ apa me: «Í dũ mo-o, a ati la ibili da nakobho da?» <sup>26</sup> Yesu atsia uo, ani atsia apa pi uo me: «Pi okpála-a, a tí da namene lie de, engũ bini, pi Ebhe-e, a tí da namene lie.»

<sup>27</sup> Abhomũ-o, Piele atsia ayi ani me: «Mũsuno, djedje nga. Ngaya-a, ya a'o ká ndũ 'he hana ngũ nakpata mũ. Engũ bhe gba ya-a adũ lele e pi?» <sup>28</sup> Yesu agie pi omũkpata-a me: «Ma apa pi yi na paká me, nedhinga li doto adjí lie lie na mbia-a, Ndili gba kpála adũ pí kiti na asasaua gba e-o. Ngayi obhe akpata ma-a, yi tsía dú di pí okiti na ngámá ndjikpa ne ká bhisi ngũ nakodho 'ngũ gba opiga ndjikpa ne ká bhisi gba omafsalaele ko. <sup>29</sup> La di-e, kpála ne kpála inde a'o ká oeti gba e, i dũ di-e ondaise e na obhosibhosi ne obhe na olisilisi, i dũ di-e 'dyi e ne 'hi e, i dũ di-e ongisi gba e, i dũ di-e edyi gba e ngabula

'li ma-a, aní asía matá koko bhelé. Aní tsia sía di mukobho na duduṃa. <sup>30</sup> Yi mbíla ndjindji me, bhelé na obhende mbia inde-e ne okpála na kalanu-o, akólo okpála na asidi, li obhende mbia inde asidi-e, tsia kólo okpála na kalanu.»

## 20

*Gbitaku gba bhulu 'dyi vino ne okpála na kulu gba e*

<sup>1</sup> Abhomu-o, Yesu atsia apa matá me: «Yi gbo nga 'dje yi. Naṃ na abhúlá mana lie ne tsingṃ gba bhulu 'dyi bini. Bhulu 'dyi ango-o akoto agba e kəkpi má bhó ngubula naha okpála ngú kulu na edyi na vino gba e-o. <sup>2</sup> Aní au uo lie, u adje lio ne uo me ni ahá kuo 'kpa pi uo li lele kulu na ekpi bini. Aní atsia atima uo ngú nanu amene kulu abhiye na vino gba e-o. <sup>3</sup> Aní akoto matá bhú saa na odukpabini na kəkpi. Aní au okpála inde alulu li bili bini bhomu-o mandí kulu. <sup>4</sup> Aní pi uo me: <Ngayi di-e, yi nu abhiye gba ma-o. Kuo 'kpa ma ahá e pi yi-e, adú li lelele.> <sup>5</sup> Abhomu-o, u atsia agbida oo. Bhulu 'dyi-e akoto matá tulukpe. Pipita-a, aní akoto matá bhú saa na bata pita tulukpe. Ndu nedhinga aní adu akoto lie hana, aní adu abhaka okpála koko alulu li bili bini bhomu. U adje lio ne uo, aní atsia apa pi uo me u nu abhiye gba ni ko.

<sup>6</sup> Nakolo matá bhú saa na bhuluvue pita tulukpe-e, aní akoto. Aní abhaka okpála koko alulu oo. Aní atsia ayi uo me: <Yi alulu si ngbolo 'kpi libhomu mandí kulu ka ni?> <sup>7</sup> Do uo pi aní de-e: <A ko anga kpála bini ha ya bhú kulu

de.> Aní pí uo me: <Ngayi di-e, yi nũ mene kulu abhiye na vino gba ma-o.>

<sup>8</sup> Lí ekpí akolo lie tagolo-o, bhũlu 'dyi-e apa pí kapita gba e me: <'Í okpála na kulu-o, amba mũ ha kuo 'kpa gba kpála ne kpála pí e, nayie lí obhe ago sidi ngú nabu soso lí obhe ago igini kalanũ-o.> <sup>9</sup> Obhe akpo igini lita kulu bhú saa na bhuluvue pita tulukpe-e ago. Kpála ne kpála atsia asia kuo 'kpa maka u adje igini lío ne uo lie-o. <sup>10</sup> Lí obhe ago igini kalanũ-o ago lie, u abhundja naao me o osía tia bhelé nane obhe ago igini sidi-o. Engú bini, ngauo di-e, kpála ne kpála asia kuo 'kpa aviti bini ne obhe ago igini sidi-o. <sup>11</sup> U adũ asisia lie, u aholo adi mũtokono lí bhũlu 'dyi-o. <sup>12</sup> U adũ apa me: <Okpála inde e ago sidi. U amene kulu bha koli saa bini má kpíkíli, la-a, mũ ngaha uo aviti bini ne ya, ngaya okpála inde andala ne kulu ngbolo 'kpí libhomu bhú ke ku 'la!>

<sup>13</sup> Engú bini, bhũlu 'dyi-e agie pí sũka uo me: <Olia ma, mũ tí da nadi mũtokono de. Ma aha tia gba mũ-o pí mũ maka ní adje igini liní ne mũ lie-o. <sup>14</sup> Ha tia gba mũ-o, tatapa. Ma tí da naha pí obhende ago sidi-e bha maka ma aha pí mũ lie-o. <sup>15</sup> Mũ mbila de me ma tí da namene ne tia gba ma-a maka ma akũnda lie dí? Ne me mũ ngatsia ma ne ndje djila ka ma amene okpála bhe ago sidi-e lie ndjĩndji-e!>» <sup>16</sup> Yesu atsia abu tata-a me: «Okpála inde asidi-e akólo okpála na akalanũ, lí okpála na kalanũ-o tsia kólo okpála na asidi.»

*Yesu apa matá bhũtsibhũtsi na bata engú nakpi*

*ne nazuku ka e*

*(Tsia bhú Mlk. 10:32-34; di ne bhú Luk. 18:31-34.)*

<sup>17</sup> Li Yesu adu lie nanu bhú Yelusalema-a, ani a'i omukpata gba e de e titi o. Ani atsia apa pi uo me: <sup>18</sup> «Yi djedje nga! Ní adji bhú Yelusalema, bili inde u apú ma Ndili gba kpála lie pi ongbengbe odimandø di ne omusuno na líli gba Moidje-o . U akódho 'ngú gba ma-a me ma kpi bha makpi. <sup>19</sup> U apú ma pi okpála inde ne omaYuda ade ngubula me u mu ma. U abhí ma ne fimbo, u tsia gí ma li kulusi. La-a, ekpí na bata-a, ma tsia zúku.»

*Mayo gba wala Djebedayo*

*(Tsia bhú Mlk. 10:35-45.)*

<sup>20</sup> Abhomu-o, wala Djebedayo adyudyo lie de Yesu bhú dabili bini ne ongisi gba e bhisi na obhosibhosi, Djaki ne uo ne Djaa , inde adu nani omukpata gba Yesu-o. Ani atu 'ndji e ne kuto kala Yesu ngú nayo 'he ka ani. <sup>21</sup> Yesu ayi ani me: «Mo okunda me ma mene pi mu ni?» Ani agie pi Yesu me: «Tsia nga ongisi gba ma bhisi inde. Ha líli me u dudu bhú Nau gba mu-o: bhe bini li pá 'kpa mu na kokpa, bhe koko li pá 'kpa mu na gali.» <sup>22</sup> Do Yesu de-e: «Yi mbila ehe inde yi ngayo e de. Yi ti da nazu likabhu inde ma azú e uu?» U agie me: «Ya ti da nazuzu.» <sup>23</sup> Yesu atsia apa pi uo me: «A moko, likabhu ma azú e, yi azú mazú. La-a, ngú nadu ka yi li pá 'kpa ma na kokpa ne bhe na gali-e, a ko 'ngú ka ma nakodho 'ngú tété de. Obili bhomu-o pi okpála inde li 'Dyi ma aleke pi o ko.»

<sup>24</sup> Li omukpata bhe ndjikpa adje 'ngú bhomu-o lie, u ake 'ngú lio pi omukpata bhe bhisi bhomu-o. <sup>25</sup> Abhomu-o, Yesu a'i ndu omukpata hana me u go de ni. Aní atsia apa pi uo me: «Yi mbila ndjindji me ongámási na doto a'o omaha o pi o ma'o, ongbengbe okpála adele omaha o sa 'dhu o. <sup>26</sup> A ayo de me a du bhú ká yi mo-o de. A ayo mangbo me i du me kpála nde akunda nadu 'ngbé kpála bhú ká yi-e, aní de du kpála na kulu gba yi. <sup>27</sup> La di-e, li kpála bini kunda nadu kpála na bini bhú ká yi-e, aní de du bali gba yi-o. <sup>28</sup> A bhadi moko, ngama Ndili gba kpála ma go ngú napa de me okpála mene kulu lio pi ma-a de. Engú bini, ma ago mangbo ngabula namene kulu lima pi okpála, amba ma ha di mukobho gba ma-a maka tia ngú nagbegbe okpála bhelé bhú siti 'ngú gba o-o.»

*Yesu akobho okpála bhisi inde i u 'kpí de*  
(*Tsia bhú Mlk. 10:46-52; di ne bhú Luk. 18:35-43.*)

<sup>29</sup> Nedhinga li Yesu ne omukpata gba e adu akoto lie bhú gudhu na Djeliko-o, bhiti okpála atsia akpata aní. <sup>30</sup> Abhaka me okpála bhisi inde i u 'kpí de-e nde adulu lingo kpadji oo. U adje me Yesu ngakodho 'kpí bhomu-o ngae. Abhomu-o, u aholo nasusula me: «Ngámá, ndili gba Davidi, dje ndjinga ya!» <sup>31</sup> Bhiti okpála bhomu-o adu ambembe bhú 'ndji uo ngabula me u ndjili má bulu! Engú bini, u aholo matá nasusula kpekpeke me: «Ngámá, ndili gba Davidi, dje ndjinga ya!» <sup>32</sup> Abhomu-o, Yesu alu. Aní a'i uo. Aní atsia ayi uo me: «Yi akunda me ma mene

pi yi mangua 'ngú dho?»<sup>33</sup> Do uo pi ani de-e: «Ngámá, mene me djila ya u 'kpí.»<sup>34</sup> Yesu adje ndjinga uo, ani abu 'kpa e li djila uo. Ma gala kolo me-e, u aholo nau 'kpí. Abhomɔ-o, u atsia akpata ani.

## 21

*Yesu ali bhú Yeluselema*  
(*Tsia bhú Mlk. 11:1-11; ne bhú Luk. 19:28-40; di ne bhú Dja. 12:12-19.*)

<sup>1</sup> Yesu ne omɔkpata gba e akolo masikpe de Yeluselema. U adu ibili de kuti na Betefadje, li ngba 'ta na ondula na Olive. Abhomɔ-o, Yesu atsia atima omɔkpata bhisi bhú ká omɔkpata gba e-o. <sup>2</sup> Ani apa pi uo me: «Yi nu bhú kuti inde kala yi aoo. Yi akólo lie oo, yi abháka kolo me u nde agbite punda na ølø bini, la di ne ndili punda bini bhú dabili bini ne ani. Yi bhulu uo, amba yi go ne uo muma. <sup>3</sup> Li kpála bini yi yi me yi adji ne uo su-oie, yi de gie me: «Ngámá ne gumu uo.» Abhomɔ-o, ani 'ó bha kolo me yi nu ne uo nunu.» <sup>4</sup> Engú bhomɔ-o améne lie mo-o ngubula me engú inde li polofeta apa nani e, amene lie. Polofeta apa nani me:

<sup>5</sup> «Yi pa pi okpála na Siona me:

«Yi tsitsia nga, 'ngbé ngámá gba yi-e ngago agba yi.

Ani akø lie ne kuto.

Kaka-a, ani adu pí 'ngbu ndili punda.†»

<sup>6</sup> Omɔkpata-a anu, u atsia amene maka li Yesu apa pi uo lie-o. <sup>7</sup> U ago ne ndili punda ne 'hi e.

† 21:5 21:5 Tsia bhú Djk. 9:9.



U aha okoti gba o-o, u abu pí 'ngbu uo. Abhomu-o, Yesu atsia adu pí 'ngbu ndili punda-o. <sup>8</sup> Bhati okpála na bhibhiti apa okoti gba o kuto li kpadji. Okoko adu atsolo 'kpá ngulu, u atsia adu napapa li kpadji. <sup>9</sup> Bhati okpála inde adu adholo kala ani di ne obhende adu nakpata ani-e adu asusula me:

«Odjana\* pi ndili gba Davidi!

A ayo me bisagu du pí kpála inde ngago ne 'li Ngámá-o!

Odjana pi Ebhe inde abhúlá-o!†»

<sup>10</sup> Li Yesu ali lie bhú Yelusalema-a, gudhu-o adimba madimba. Okpála adu ayi me: «A ko da?» <sup>11</sup> Bhati okpála atsia adu agie me: «A ko polofeta Yesu, kpála na Nadjaleta bhú ndu doto na Galilaya.»

*Yesu apandja okpála natsindji 'he bhú 'ngbé 'ti Ebhe gba omaYuda*

*(Tsia bhú Mlk. 11:15-19; ne bhú Luk. 19:45-48; di ne bhú Dja. 2:13-22.)*

<sup>12</sup> Pipita-a, Yesu ali bhú 'ngbé 'ti Ebhe gba omaYuda-o. Ani apandja ndu okpála hana inde adu natsindji onu di ne odhu inde u adu aha o pi Ebhe, a la di-e obhende adu akakala kilidjo. Ani abala omisa gba okpála nayipa falanga, di ne odabili gba okpála natsindji opidjo-o kuto. <sup>13</sup> Abhomu-o, ani atsia apa pi uo me: «U aye bhú Bhuku gba Ebhe-e me, Ebhe apa me, <u a'í eti gba

---

\* **21:9** 21:9 Odjana: A akunda napa bhú eli gba oebele me «Sangu .» Tsia bhú Ets. 118:25-26. † **21:9** 21:9 Tsia bhú Ets. 118:25-26.

ma-a me a ko eti na mayo.> La ngayi-e, yi adji, a tsia akolo bili gba obhulu 'zi!†»

<sup>14</sup> Abhomu-o, okpála inde i u 'kpí de ne obhende na eze-e adyudyo lio de ani bhú 'ngbé 'ti Ebhe gba omaYuda, ani atsia akobho uo. <sup>15</sup> Li ongbengbe odimandø gba Ebhe , di ne omusuno na líli gba Moidje au ongamba 'ngú inde ani amene e lie, la di ne ongisi inde adu asusula bhú 'ngbé 'ti Ebhe gba omaYuda me: «Odjana pi ndili gba Davidi-e», u asia siti bua . <sup>16</sup> Abhomu-o, u atsia ayi Yesu me: «Mu ngadje engú inde li ongisi bhomu-o ngapa e uu?» Yesu atsia agie pi uo me: «Heni, ma ngadjedje hana. Yi tanga nga engú inde li Davidi apa nani e bhú Bhuku gba Ebhe-e belegu de bini? Davidi apa nani me, Ebhe amene me belegu ongisi na djedjedje ne obhende ngandji 'ka toko ni.†» <sup>17</sup> Pipita-a, ani a'o ká ongbengbe odimandø di ne omusuno na líli gba Moidje-e bhú gudhu oo. Ani atapa bhú kuti na Betania, ani atsia asi oo ko.

*Yesu atu pødjø li 'lá figi inde i li líli de  
(Tsia bhú Mlk. 11:12-14, 20-24.)*

<sup>18</sup> Køkpi li ekpi aseke lie, li Yesu aholo nagie matá lie lie abhú gudhu-o, ani aholo nadge gumu. <sup>19</sup> Abhomu-o, ani au 'lá figi deno 'hi-kpadji. Ani adyudyo lie dede masikpe, engú bini, ani bhaka 'he bhúbhú belegu de bini, bha bini ndu mbulu kpákpá padhá. Ani atsia apa pi ndula na figi-e me: «Mu lí matá líli belegu de bini!» Kolo me-e, 'lá figi a'ulu hana má kekele! <sup>20</sup> Li omakpata au

† **21:13** 21:13 Tsia bhú Isa. 56:7; di ne bhú Djlm. 7:11. † **21:16** 21:16 Tsia bhú Ets. 8:3.

lie mo-o, u angamba naali, u atsia ayi Yesu me: «Lele pí li 'lá figi-e a'ulu bha lie ma 'li mu-o?»  
<sup>21</sup> Do Yesu pí uo me: «Ma apa pí yi na paká me, i du me yi nde ne nabhuka , yi du ne bua na bhisi bhisi de-e, yi méne bha bini engú inde ma amene e li kute 'lá figi-e de. Engú bini, yi ti da napa belegu pí eta inde-e me: <Yie oo, amba mu nu ti bhú ngade 'ngu>, i tsia méne lie moko. <sup>22</sup> I du me yi nde ne nabhuka-a, ndu 'he hana inde yi ayó e bhú mayo-o, yi asía masia.»

*A ngaha angu pí Yesu da?*

*(Tsia bhú Mlk. 11:27-33; di ne bhú Luk. 20:1-8.)*

<sup>23</sup> Yesu akolo lie bhú gudhu-o, ani ali matá bhú 'ngbé 'ti Ebhe gba omaYuda-o. Ani atsia aholo nasuno pí okpála. Abhomu-o, ongbengbe odimandø gba Ebhe, ne obhelesi okpála adyudyo lio de ani. U atsia ayi ani me: «A aha kpadji pí mu ngú namene ongú inde-e da? A aha la di angu ango-o pí mu ngánga da?» <sup>24</sup> Yesu agie pí uo me: «Ngama di-e, ma ayí yi li koli engú bini. I du me yi nde agie 'ngú muma tété-e, ma tsia pá di pí yi me ma ngamene ehe inde-e ne mangua angu dho-ie.

<sup>25</sup> Ma ngayi yi me: <A aha nani kpadji pí Dja ngú nabatisa okpála da? Ne me aha nani kpadji pí ani ne okpála, ne me aha kpadji pí ani ne Ebhe?>» U atsia aholo natoto bua o sunda o me: «I du me ní nde apa me: <A aha kpadji pí ani ne Ebhe-e>, ani yí ní me: <Ka ni la yi bhuka nani ani lie de-e?> <sup>26</sup> I du la di me ní nde apa me: <A aha kpadji pí ani ne okpála-a>, ní de tsia 'kpí liní

ka okpála-a ndjindji, anga ndu okpála hana du nani nau Djaa me a ko polofeta.» <sup>27</sup> Abhomu-o, u atsia agie pi Yesu me: «Ya mbila de me aha nani kpadji pi ani da-ie de.» Ngaani di-e, ani atsia apa pi uo me: «Ngama-a, ma pá di pi yi de me aha angu muma ngu namene ongu inde-e da-ie de.»

*Gbitaku pindji ongisi bhisi*

<sup>28</sup> Yesu atsia ayi matá me: «Yi apa nga naayi li 'ngu inde-e pi? Kpála bini adu nani ne ongisi gba e bhisi. Ani anu abhaka bhe na kalanu-o, ani atsia apa pi ani me: <Ndika ma, naki-e, nu mene kulu abhiye na vino.> <sup>29</sup> Ndili agie me: <Ma nu de.> Pipita-a, ani adji bua e, ani atsia anu abhiye-o. <sup>30</sup> 'Dyi uo anu apa di pi bhe na bhisi-e me ani nu abhiye na vino-o. Bhobhomu-o agie pi ani me: <Ma adji, 'dyi ma.> La-a, ani tsia nu de. <sup>31</sup> Bhú ká ongisi bhisi bhomu-o, a amene engu inde li 'dyi uo adu akunda e da?» U agie me: «Bhende na kalanu-o.» Yesu atsia apa pi uo me: «Ma apa pi yi na paká me, ondombi na mandjandja, di ne obambakuya ali pi yi kalanu bhú Nau gba Ebhe-o . <sup>32</sup> Padhá de, anga Djaa ago agba yi ne nasuno pi yi kpadji na ngbili 'ngu , yi tsia bhuka ani de. Engu bini, ondombi na mandjandja di ne obambakuya atsia abhuka ani. Abana yi au ndu 'ngu bhomu-o hana lie ne djila yi-e, ngayi-e, yi bhuka ani de.»

*Gbitaku pindji osisiti okpála na kulu*

*(Tsia bhú Mlk. 12:1-12; di ne bhú Luk. 20:9-19.)*

<sup>33</sup> Yesu atsia apa matá me: «Yi dje nga matá gbitaku koko inde. Bhu lu bili bini alu nani ngu

vino, ani asa ngongo-o hana ne aga. Ani adji edú ngú napi olíí-e bhúbhú, ani atsia ayiki 'ndjá 'ti abhúlá bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Abhomu-o, ani atsia atapa dhuku. <sup>34</sup> A akolo lie li nedhinga nako líí-e, ani atima okpála na kulu gba e agba okpála inde ngamene kulu bhú 'dyi vino me u ha nguwa bhe gba ni-e pi ni haha.

<sup>35</sup> Engú bini, okpála namene kulu bhú 'dyi vino azumu bha okpála ango-o hana. Bhe bini-e, u abhi ani má kpu! Bhe koko-o, u abhelo ani, bhe na bata-a, u atutulú ani ne teme. <sup>36</sup> Abhomu-o, bhulu 'dyi-e atima matá okpála na kulu koko bhelé nane obhende na kalanu-o mane. U amene bhadi uo moko. <sup>37</sup> Ali soso-o, ani atima ndili gba e agba okpála ango-o ne nabhundja me: «U amanga ndili gba ma-a mamanga.» <sup>38</sup> Engú bini, li okpála namene kulu bhú 'dyi vino au ndili-e lie, u apa sunda o me: «Kukulú kpála inde atigala la ndju ne edyi-e ngae inde. Yi gogo, ní bhelo ani, amba ní tigala ibili ne edyi-e nganí!» <sup>39</sup> Abhomu-o, u ati pi ani má kii! U aha ani, u agbe ani bhú 'dyi na vino-o, u atsia abhelo ani.

<sup>40</sup> Mbia inde-e, nedhinga li bhulu 'dyi vino agó lie, ani améne ngú okpála na kulu bhomu-o pi?»

<sup>41</sup> U agie pi ani me: «Ani abhili omabhobhelo kpála bhomu-o hana, ani djé ndjinga uo de. Pipita-a, ani há 'dyi vino pi okpála koko ngú namene kulu bhúbhú, obhende ahá nguwa pi ani bhú nedhinga u adje lio ne uo li e-o.»

<sup>42</sup> Yesu atsia apa pi uo me yi ngagama 'ngú

mugito me yi tanga nga engú inde li Bhuku gba Ebhe-e apa e belegu de bini. Bhuku gba Ebhe-e apa li 'ngú gba Masiya me:

«Teme inde li okpála nayiki eti-e au me a ne tata ade-e,

a akolo teme inde abi eti-e libhomu-o ngae.

Ebhe Ngámá amene mo-o ngae.

Bhú djila ní-e, a ko 'ngú na ngangamba!†»

<sup>43-44</sup> Kpála bhende atí pí teme ang-o, ani gúgumu. Kpála bhende la di li teme ang-o atí pí e, teme ang-o bá mbu ani má mbu! Ka yi au teme li Bhuku gba Ebhe-e apa 'ngú e lie padhá-a, ma apa pí yi me, ngayi-e, Ebhe aní 'bhø bhoti na Nau gba e pí yi mani, ani tsia bhúlu pí okpála bhende ngamene engú inde ani akúnda e-o.

<sup>45</sup> Li ongbengbe odimandø di ne omuFalisai adje gbitaku ang-o lie, u atsia akø mbolimboli me ani de ngagama 'ngú bhomu-o pindji o. <sup>46</sup> U aholo agili kpadji ngú naholo ani, engú bini, u adu ne tsulu ka okpála, anga okpála adu au me a ko polofeta.

## 22

*Gbitaku pindji 'ngbé anokomia na kúva*

*(Tsia bhú Luk. 14:15-24.)*

<sup>1</sup> Abhomu-o, Yesu apa matá gbitaku pí okpála ani adu akpo 'ngú pí o-o me: <sup>2</sup> «Yi tsia nga engú inde li Nau na abhúlá akpo 'ndji e ne e-o: A maka tsingu gba 'ngbé ngámá bini inde amene anokomia na kúva pí ndili gba e na bhobhoko.

† **21:42** 21:42 Tsia bhú Ets. 118:22-23.

Ani atsia a'i okpála bhú anokomia ang-o. <sup>3</sup> Ekpí na anokomia ale lie, ani atima okpála na kulu gba e na'i okpála inde ani a'i o me u go bhú anokomia ang-o. Engú bini, u ziba nago li e'i ang-o de.

<sup>4</sup> Ani atima matá okpála na kulu koko. Ani aha líli pi uo me u nũ pa pi okpála ani a'i o-o me: <Mbia inde-e, ma alũ ezũ gba ma-a alũ. Ma abhili obagala gba ma ne onũ na tsikpa abhili, ndũndũ hana ibili bedhe. Yi go bhú anokomia ang-o gogo!> <sup>5</sup> Engú bini, ngauo-o, u adje bha ne 'dje o. U atsia agbida bhú ongú gba o. Bhe bini aholo ne enú abhú 'dyi gba e, koko bhú natsindji mase gba e. <sup>6</sup> Okoko aholo okpála na kulu inde u atima o-o, u amene uo kpekpeke, u atsia abhili uo. <sup>7</sup> Li 'ngbé ngámá-a adje lie, ani abi 'gú naali. Abhomũ, ani atsia atima osudha gba e me u bhili omabhøbhøle kpála bhomũ, amba u to di djua li gũdhũ gba uo-o.

<sup>8</sup> Pipita-a, ani atsia apa pi okpála na kulu gba e me: <Anokomia na kũva-a bedhe. Engú bini, okpála ma a'i o-o ti matá da nago bhúbhú de. <sup>9</sup> Kaka-a, yi nũ li odi kpadji, yi 'i ndũ okpála inde yi abháka o hana, amba u go zũ 'he-o.> <sup>10</sup> Okpála na kulu bhomũ-o aze li okpadji. U atsia apo bhúla okpála bhende u adũ abhaka o-o hana, obabadha okpála di ne osisiti okpála. U anũ ne uo bhú 'ti na anokomia-o. Abhomũ-o, tina 'ti na anokomia atsia abedhe ne uo bedhe.

<sup>11</sup> Abhomũ-o, 'ngbé ngámá-a ali bhú 'ti na anokomia ngubula natsia okpála inde ani a'i o-o. Ani au kpála bini inde i dyi bongo na anokomia

de. <sup>12</sup> Ani ayi kpála angoo me: <Wai, mo oli ei lele pi me ma nde dyi bongo na anokomia di-e?> Kpála angoo andjili bha má bulu! <sup>13</sup> Abhomu-o, 'ngbé ngámá-a apa pi okpála na kulu-o me: <Yi gbigbite 'kpa ani ne 'dhu ani, amba yi bhike ani bhú biti akilidjo. Oo-o, ani adú aku 'gbá ne nazu tate e.>>

<sup>14</sup> Yesu atsia abu tata-a me: «A moko, Ebhe a'i okpála bhelé, engú la bini, obhende ani alo o-o, uo bhelé ade.»

*Omufalisai ato Yesu pindji nakala mandjandja gba 'ngbé ngámá Kaisala*

*(Tsia bhú Mlk. 12:13-17; di ne bhú Luk. 20:20-26.)*

<sup>15</sup> Abhomu-o, omufalisai anu nadi bula ngubula nagili kpadji ngu nateke Yesu li 'li e. <sup>16</sup> U atsia atima té omukpata gba o bhú dabili bini ne okpála gba Elode ngubula napa pi Yesu me: «Musuno, ya mbila ndjindji me ma ngapa ngbili 'ngú . Ma ngasuno bhadi kpadji gba Ebhe-e ngbingbili. Tsulu kpála belegu li ma ade bini, anga ma tsia di engbé gba kpála de. <sup>17</sup> Ma ngabundja naamu pi? A ayo me ya kala mandjandja gba 'ngbé ngámá Kaisala ne me ya kala de. Pa nga pi ya.» <sup>18</sup> Engú bini, li Yesu ambila siti kali gba uo-o lie, ani atsia apa pi uo me: «Obhulu kali inde-e, ka ni yi ngato ma lie? <sup>19</sup> Yi suno nga falanga inde u akakala mandjandja ne e muma.» U atsia ago pi ani ne li falanga bini. <sup>20</sup> Yesu atsia ayi uo me: «Kulu kpála, ne balua inde pi li falanga inde-e, a ko naa da?» <sup>21</sup> U atsia agie pi ani me: «A ko naa Kaisala.»



Abhomu-o, ani atsia apa pi uo me: «Yi ha oehe bhende li Kaisala ngayo e pi Kaisala, amba oehe bhende li Ebhe ngayo e, yi ha pi Ebhe.» <sup>22</sup> U adje lie mo-o, u angamba naali. U a'o ká ani, u atsia agbida.

*OSadukai ayi 'ngú pindji nazuku ka okpála*  
(*Tsia bhú Mlk. 12:18-27; di ne bhú Luk. 20:27-40.*)

<sup>23</sup> Bha li 'kpí bhomu-o, oSadukai ago abhaka Yesu. (Ngauo-o, u ngapa naao me okpála inde amu-o zúku de.) U atsia ayi Yesu me: <sup>24</sup> «Musunu, Moidje apa nani me: «I du me bhoko bini kpi me ani nde zu ongisi de-e, ndai ani na bhobhoko-o bhe akə pita ani-e de ha ekə ani ngubula nazu ongisi pi ndai e inde akpi-o.» <sup>25</sup> Gbo nga la 'dje mu. Obhosi mananika adu nani agba ya. A adu nani ondaise. Bhebhele-e aha elə, ani atsia akpi me ani nde zu de. Bhende akə pita ani-e atsia aha ekə ani-o. <sup>26</sup> Bhende na bhisi bhomu-o akpi bhadi moko, ani nde zu de. A akə li bhende na bata, nakolo makolo li bhende na mananika-o. Ndu uo hana amu me u nde zu de. <sup>27</sup> Pita namu ka ndu uo hana-a, elə-o atsia akpi di. <sup>28</sup> Li 'kpí li okpála inde amu-o azúku lie, bhú ká obhosi mananika bhomu-o, elə bhomu-o adú naa da? Padhá de, anga ndu uo hana aha nani ani.»

<sup>29</sup> Yesu atsia agie pi uo me: «Yi angita, anga yi kə mboli engú li Bhuku gba Ebhe-e ngapa e de. Yi mbila di angu gba Ebhe-e de. <sup>30</sup> Padhá de, anga li okpála inde amu-o azúku lie, olisi ne obhosi há lio de. Engú bini, u adú ibili maka oandjelu

abhúlá. <sup>31</sup> Pindji 'ngú bhende atsia nazuku ka okpála inde amu-o, yi tanga nga eli gba Ebhe-e di? Ebhe apa nani pi yi me: <sup>32</sup> <Ngama-a, ma ne Ebhe inde li onguo ogbi yi Abalahama, Isaka, ne Yakobho ngamene kulu lio pi e ko.> Ebhe-e, a ko Ebhe gba okpála bhende amu-o ade. Engú bini, a ko Ebhe gba okpála inde ɹɹ ko.»† <sup>33</sup> Nɹɹ okpála hana inde adje engú bhomɹ-o angamba naali li nasuno gba ani-o.

*Nasuno pindji líli inde ane ne engbé*

*(Tsia bhú Mlk. 12:28-34; di ne bhú Luk. 10:25-28.)*

<sup>34</sup> Abhomɹ-o, Yesu atsia agbite 'bhø oSadukai ne engú ani agie e pi uo-o. Li omɹFalisai adje lie mo-o, u anɹ apo bhúla o de ani. <sup>35</sup> Saka uo adɹ mɹsuno na líli gba Moidje . Ani adɹ akunda nato Yesu. Kaka-a, ani atsia ayi ani me: <sup>36</sup> «Mɹsuno, bhú ká olíli-e, bhende ane ne engbé-e ngae dho?» <sup>37</sup> Yesu atsia agie pi ani me: «<A ayo me kunda Ebhe, Ngámá gba mɹ-o ne bua mɹ hana, ne məkobho gba mɹ-o hana, di ne mabhundja gba mɹ-o hana.†> <sup>38</sup> A bhomɹ-o líli inde ane ne engbé, inde di líli na kalanɹ-o. <sup>39</sup> Bhende pipita, inde bhadi ngbéngbé maka bhe na kalanɹ-o ngae inde: <A ayo me kunda kilí mɹ maka mo okunda limɹ lie ngamɹ makpe-o.†> <sup>40</sup> Engú li u aye e bhú líli gba Moidje ne bhende li opolofeta aye e hana alɹ pí olíli bhisí bhomɹ.»

† **22:32** 22:32 Tsia bhú Eki. 3:6. † **22:37** 22:37 Tsia bhú Det. 6:5. † **22:39** 22:39 Tsia bhú Lev. 19:18.

*Masiya ne Ngámá gba Davidi*

*(Tsia bhú Mlk. 12:35-37; di ne bhú Luk. 20:41-44.)*

<sup>41</sup> OmɔFalisai adɔ nga bha nagama 'ngú ne Yesu. Aní atsia ayi uo me: <sup>42</sup> «Yi ngabhundja pindji Masiya pi? A ko ndili ka da?» U atsia agie pi aní me: «A ko ndili ka Davidi.» <sup>43</sup> Yesu atsia ayi uo me: «Í dɔ mo-o, lele pi li Davidi, bhú angu gba Bu Bhobua-a nga'i Masiya lie me Ngámá gba ni-e? Padhá de, anga Davidi apa nani me:

<sup>44</sup> <Ebhe Ngámá apa pi Ngámá gba ma-a me:  
go dɔ li pá 'kpa ma na kokpa,  
amba ma mene me mɔ ha angu  
obhulɔ yala gba mɔ-o.†>

<sup>45</sup> Í dɔ la me Davidi nde nga'i Masiya me <Ngámá gba ni-e>, lele pi li Masiya ti da nadɔ lie ndili ka aní-e?» <sup>46</sup> Abhomɔ-o, kpála bini tsia dɔ ne eli nagigie pi aní li 'ngú aní ayi e de. Nayie li 'kpí bhomɔ-o, kpála bini tsia le matá nayi aní li 'ngú belegɔ de bini.

## 23

*Yesu apa me yi améne 'ngú maka omɔsuno na líli gba Moidje di ne omɔFalisai-e de*

*(Tsia bhú Mlk. 12:38-39; di ne bhú Luk. 11:43, 46, 20:45-46.)*

<sup>1</sup> Abhomɔ-o, Yesu apa pi bhiti okpála di ne omɔkpata gba e me: <sup>2</sup> «Kulu gba omɔsuno na líli gba Moidje di ne omɔFalisai-e , a ko nambamba ta olíli gba Moidje pi okpála. <sup>3</sup> Kaka-a, yi mene ndɔ 'ngú hana inde u apá e pi yi-o, amba yi tsia

† **22:44** 22:44 Tsia bhú Ets. 110:1.

lila di ndjindji. Engú la bini, yi akpáta kulu gba uo-o de, anga engú u ngapa e, u mene maka u ngapapa lie de. <sup>4</sup> U ngagbite titili 'he na titili, u nga'o'o de-ngulɔ okpála. La-a, ngauo makpe, u ngayala na'o nga bha tété ndjili 'kpa o ngú nateteke okpála li tili 'he inde u a'o e de-ngulɔ uo-o. <sup>5</sup> Ndu 'ngú gba uo hana, u ngamemene me okpála u o mau. Kaka-a, u ngaye 'li Ebhe ne baba djila balua, u ngagbigbite pidi o ne li 'kpa o. U la di ngadu 'so kandju gba o ndjandjandja ane mane. <sup>6</sup> U ngakunda nadulu bhú dá oanokomia li bili gba ongbengbe okpála, u kunda di nadulu bhú oti nadjé líli gba Moidje li bili inde li okpála adú au o lie mau. <sup>7</sup> U kakunda me u du nayi o bhú odaposo, di ne me okpála du a'i o me <Musunu.>

<sup>8</sup> Pi yi-e, yi améne de me okpála du a'i yi me <Musunu-o> de. Padhá de, anga yi bha ne koli Musuno bini, yi la bhadi ndu yi hana ne ondaise . <sup>9</sup> Yi a'í kpála bini pála doto de me <'Dyi yi-e> de, anga koli 'dyi yi bha bini ngae inde abhúlá ko. <sup>10</sup> Yi améne di de me okpála du a'i yi me <Ngámá-a> de, anga koli Ngámá gba yi-e bha bini ne Kilisito . <sup>11</sup> A ayo me kpála inde ane ne engbé bhú ká yi-e du kpála na kulu gba yi ko. <sup>12</sup> Kpála bhende a'ó lie ngae makpe ne abhúlá-a, u aké ani ne akuto. Kpála bhende a'ó la lie ngae makpe ne akuto-o, u a'é'e ani ne abhúlá.»

*Yesu ambamba ta kali gba omusunu na líli gba Moidje*

*di ne omuFalisai-o*

*(Tsia bhú Mlk. 12:40; di ne bhú Luk. 11:39-52, 20:45-47.)*

<sup>13</sup> Yesu apa matá me: «A ko likabhu pi yi, omusuno na líli, di ne omuFalisai. Yi ne obhulú kali! Padhá de, anga yi ngani 'bhø bhoti na Nau gba Ebhe-e pi okpála. La ngayi-e, yi li oo de, yi ka la di kpadji pi obhende akunda nali-e de. [ <sup>14</sup> \*]

<sup>15</sup> A ko likabhu pi yi, omusuno na líli di ne omuFalisai. Yi ne obhulú kali! Padhá de, anga yi ngadhólo ne ndu bili hana pála doto ne pí 'ngbé 'ngu ngubula me gandji kpála bini bhuka líli gba Moidje-o. I du la me ani nde abhuka-a, yi ngamene me ani kolo kpála na djua na duduana nane yi bhutsibhutsi bhisi.

<sup>16</sup> A ko likabhu pi yi, djila yi adudu. Yi la ngale me yi suno kpadji pi okpála! Yi ngapa me: «I du me kpála nde atu silika ne 'li 'ngbé 'ti Ebhe gba omaYuda-a, engú tété ade. Engú la bini, i du me kpála nde atu silika ne 'li olo na 'ngbé 'ti Ebhe gba omaYuda-a, a ayo me kpála angoo mene engú inde ani atu silika ngu e-o.» <sup>17</sup> Ngayi-e, yi ne ongingi, djila yi adudu! A ane ne engbé ne bhedho? Ne me a ko olo, ne me a ko 'ngbé 'ti Ebhe inde ngamene me olo-o kolo bubu kala Ebhe-e? <sup>18</sup> Yi ngapa matá me: «I du me kpála

---

\* **23:14** 23:14 Lukuluku inde-e, a bhú obhuku koko na didili u aye e bhú eli na giliki ade. [A ko likabhu pi yi, omusuno na líli di ne omuFalisai. Yi ne obhulú kali! Padhá de, anga yi ngabha ndu 'he inde ka oøkøsi-e hana. Yi la di ngayo Ebhe ngengele bhú djila okpála, amba u u me yi ne obabadha okpála. Kaka-a, u akódho 'ngú gba yi-e kpekpeke naali!] Tsia bhú Mlk. 12:40.

nde atɔ silika ne 'li bili natsulu enɔ pi Ebhe-e, engú tété ade. Engú la bini, i dɔ me kpála nde atɔ silika ne 'li enɔ inde u ngatsulu e pépé-e, a ayo me kpála ango-o mene engú inde anɔ atɔ silika ngú e-o.> <sup>19</sup> Ngayi-e, djila yi adɔdɔ! A ane ne engbé ne bhedho? Ne me a ko enɔ inde u ngatsulu e pi Ebhe, ne me a ko bili inde ngamene me enɔ ango-o kolo bubu kala Ebhe-e? Ndɔndɔ hana viti bini.

<sup>20</sup> Kaka-a, kpála bhende ngatɔ silika ne 'li bili natsulu enɔ-o, anɔ bhomɔ-o ngatɔtɔ ne 'li bili natsulu enɔ, la di ne 'li ndɔ 'he hana inde pépé-o. <sup>21</sup> La di-e, kpála bhende ngatɔ silika ne 'li 'ngbé 'ti Ebhe, anɔ bhomɔ-o ngatɔtɔ ne 'li 'ngbé 'ti Ebhe, di ne 'li Ebhe inde ngadɔ bhúbhú ko. <sup>22</sup> Kpála bhende ngatɔ la di silika ne 'li kokpí-e, anɔ bhomɔ-o ngatɔtɔ ne 'li kiti na ngámá gba Ebhe, la di ne 'li Ebhe inde ngadɔ pépé-o.

<sup>23</sup> A ko likabhu pi yi omɔsuno na líli di ne omɔFalisai. Yi ne obhulɔ kali! Padhá de, anga yi ngaha belegɔ bini bhú ká ndjikpa na oulu na babadha sese. La-a, ongbengbe 'ngú inde li líli-e ngasuno e píndji nakodho 'ngú li lelele bhú dabilɔ bini ne bua na ndjinga, a la di-e namene engú inde li Ebhe akɔnda e, yi ngauu padhá. A la bhomɔ-o engú inde a ayo me yi de amene e, me yi nde 'ili di 'to yi li okoko de ko. <sup>24</sup> Ngayi-e, djila yi adɔdɔ, Yi la ngale me o suno kpadji pi okpála! Yi ngapandja ondjindji bhú 'he nandji mandji gba yi-o. La-a, yi ngabhi enɔ maka eya libhomu bhú 'bu yi má ngbi!

<sup>25</sup> A ko likabhu pi yi omɔsuno na líli di ne

omɔFalisai. Yi ne obhulɔ kali! Padhá de, anga yi ngavulɔ kute okópo ne osaani gba yi-e má ngbi, la-a, ohe inde yi nga'o e bhúbhú-o, a ko ohe inde yi asia e li kpadji na ezi bhú dabili bini ne kundɔ 'he inde bhú yi-o. <sup>26</sup> Ngayi omɔFalisai-e, yi u 'kpí de! Yi vulɔ ngaiza bhú kópo-o ngubula me kukute kolo di babadha.

<sup>27</sup> A ko likabhu pi yi omɔsuno na líli di ne omɔFalisai. Yi ne obhulɔ kali! Padhá de, anga yi maka olata inde u apulu embú pí e, inde i ngau lie akilidjo babadha. Engú bini, abhúbhú abedhe ne tsagala biki okpála bhende amu di ne ondɔ 'he na sisiti hana. <sup>28</sup> A bhadi pi yi moko. Bhú djila okpála-a, yi ngau liyi me yi ne okpála na ngbingbili . La abhú yi-e, yi abedhe ne kali di ne ongú na sisiti bedhe.

<sup>29</sup> A ko likabhu pi yi omɔsuno na líli di ne omɔFalisai. Yi ne obhulɔ kali! Padhá de, anga yi ngaleke olata opolofeta ndjindji, yi di ngaye obabadha tele li olata okpála na ngbingbili-o.

<sup>30</sup> Yi la ngapa me: <Ya dú nani bhú 'kpí odyi ya u-o, ya de kpɔtsɔ 'kpa ya ne uo ngú nabhili opolofeta de.> <sup>31</sup> Kaka-a, yi ngakpokpo bhomɔ-o engú gba yi makpe, me yi ne ongisi gba okpála inde abhili opolofeta-o! <sup>32</sup> Atóú! Yi bedhe 'bhɛ engú li odyi yi akpo nani lita e bebedhe! <sup>33</sup> Yi ne okpɔlɔ, yi ne piga ombuma! Yi anéke mangimbo nanɔ bhú djua na duduma lele pi?

<sup>34</sup> Kaka-a, yi djedje nga: ma ngatima opolofeta ne obhulɔ imbilangɔ, la di ne okukulɔ omɔsuno na líli pi yi. Yi abhili okoko bhú ká uo, yi gí okoko li kulusi. Yi abhí okoko ne fimbo bhú oeti

nadje líli gba yi-o, yi tsia nú ne nato mbolo li okoko bhú gúdhú bini ne bini. <sup>35</sup> Yi améne mo-o ngubula me ngute ndú okpála na ngbingbili hana inde yi abhili nani o píla doto libhomu-o tuko pí 'ndji yi. Padhá de, anga yi abhili nani okpála na ngbingbili bhelé, nayie li Abele, nakolo li Djakalia, ndili gba Balasi-o. Yi abhelo nani Djakalia bhú mbadhasú na 'ngbé 'ti Ebhe, sùnda bili natsulu enú pí Ebhe ne titina na bubu-o. <sup>36</sup> A moko, ma apa pí yi me ndú 'ngú bhomú-o hana atúko pí 'ndji okpála na naki inde.»

*Yesu aku 'gbá ngú okpála na Yelusalema  
(Tsia bhú Luk. 13:34-35.)*

<sup>37</sup> Yesu apa matá me: «Ngayi okpála na Yelusalema, ngayi okpála na Yelusalema, ngayi-e, yi ngabhili opolofeta, yi la di ngabhili okpála inde li Ebhe atima o pí yi-e ne teme! A ko bhútsibhútsi madho, ma akúnda napo bhúla ongisi gba yi-e lie maka li 'hi 'ngu apopo bhúla ongisi gba e lie sa mbudha e? La-a, yi tsia kúnda de! <sup>38</sup> Kaka-a, kuti gba yi-e atígala padhá. <sup>39</sup> Padhá de, anga ma apa pí yi me nayie pí mbia inde-e, yi ú matá ma belegu de bini akólo li 'kpí inde yi apá lie me: <A ayo me Ebhe tuko bisagu pí kpála inde ngago ne 'li ani-o!†>»

## 24

*Yesu apa me u agúgumú 'ngbé 'ti Ebhe  
gba omaYuda-a kuto  
(Tsia bhú Mlk. 13:1-2; di ne bhú Luk. 21:5-6.)*

† 23:39 23:39 Tsia bhú Ets. 118:26.



<sup>1</sup> Abhomu-o, Yesu akoto bhú 'ngbé 'ti Ebhe gba omaYuda-o. Li ani aholo ne 'nú lie, omukpata gba ani atsia adyudyo lio de ani ngú napana pi ani maka li 'ngbé 'ti Ebhe gba omaYuda-a ayiki lie lie-o. <sup>2</sup> Yesu atsia apa pi uo me: «Yi ngau ndu 'he bhomu-o hana? Ma apa pi yi na paká me, ekpí bini akólo makolo, u agúgumú 'ngbé 'ti Ebhe-e hana kuto. Teme bini tígala pí kili e de.»

*Engú inde akólo kala sokpí-o*

*(Tsia bhú Mlk. 13:3-13; di ne bhú Luk. 21:7-19.)*

<sup>3</sup> Abhomu-o, Yesu anu adu kuto pí 'ta na ondula na Olive. Omukpata gba ani-e adyudyo lio de ani, u atsia ayi ani me u nde ne uo kpi o kpi me: «Musuno, pa nga pi ya, engú mu de ngapa e bhomu-o améne lie nadho? Ehe inde asúno nago ka mu-o ne ni? Ehe inde asúno la di me sokpí-e akolo ne ni?» <sup>4</sup> Yesu agie pi uo me: «'E-e! Yi lila liyi me kpála bini apíte yi de. <sup>5</sup> Padhá de, anga okpála bhelé agó ne 'li ma. U adú abhi 'kpa o pí mbulu o me o ne Masiya , u tsia píte okpála bhelé naali. <sup>6</sup> Yi adjé tolo egú ne ngali 'ngú na egú. 'E-e! Yi adjé tsalu de, anga a ayo me ndu 'ngú bhomu-o hana mene lie. Engú bini, a nga bhomu-o sokpí-e de. <sup>7</sup> Padhá de, anga okpála na kuti bini ahá 'gú pi okpála na kuti koko, li ngámá na kuti bini há 'gú pi ngámá na kuti koko. Adyindi adú li obili ngangá, li adjigidjo dyíki doto li obili ngangá. <sup>8</sup> Ndu 'ngú bhomu-o adú maka likabhu inde adúdu kala nazu ka eho.

<sup>9</sup> Abhomu-o, ndu okpála hana ayála yi ka 'li ma, u apú yi me u mene yi sisiti. U tsia bhíli yi.

10 Li okpála bhelé bhú ká yi 'ó ká nabhuka gba o. U apú ngbángá o sùnda o, u tsia yála di lio sùnda o. 11 Opolofeta na eu azé bhibhiti naali, u tsia píte di okpála bhelé. 12 Siti 'ngú abé ndu e naali, li mukunda gba okpála bhelé tsia bí zini. 13 La-a, kpála bhende alú kpekpeke bhú nabhuka nakolo makolo alì soso-o, kpála ango-o tsia kóbho. 14 U akpókpo Bádha NgaliNaṁ na abhúlá inde-e pílá doto libhomu, amba ndu opiga hana mbila 'ngú tété ndjindji. Pipita-a, li sokpi-e tsia kólo.»

*Okpála azú likabhu naali kala sokpí-o*

*(Tsia bhú Mlk. 13:14-23; di ne bhú Luk. 21:20-24.)*

15 Yesu atsia apa matá pi omukpata gba e me: «Yi aú kpála u a'i e me <'Ngbé Siti bhulṁ nabhelo kuti>, inde li polofeta Danyelee apa nani engú gba e adu bhú tina 'ti na bubu inde bhú 'ngbé 'ti Ebhe gba omaYuda-o. A ayo me kpála inde atánga engú nani li Danyelee aye e bhomu-o kò mbolimboli ndjindji!† 16 Abhomu-o, obhende abháka o abhú Yudaya-a, a ayo me u kpe apí oeta. 17 Kpála bhende abháka e kilidjo-o, a ayo de me aní djidji matá lie ngú nanu nabha oehe inde abhú 'ti gba e de. 18 Kpála bhende abháka e abhiye-e, a ayo de me aní gie matá lie asidi ngú naha koti gba e de. 19 A ko la mangua likabhu dho pi olisi inde adú ne ebhi di ne obhende adú a'o 'ka bhú 'bhè ongisi li 'kpí ango-o!

20 Yi yo Ebhe me ekpí nakpe ka yi-e adú bhú nedhinga na zini di ne li 'kpí nago gba

† 24:15 24:15 Tsia bhú Dan. 9:27, 11:31, 12:11.

omaYuda-a de. <sup>21</sup> Padhá de, anga a adú 'ngbé likabhu na ngbéngbé, inde li okpála u nga e de, nayie maka li Ebhe abho nani kokpí ne doto lie, nakolo pi mbia inde. Okpála ú la matá di galikpe ngua likabhu ang-o belegu de bini. <sup>22</sup> Ebhe amene me oekpí ang-o adú ngengele de. I dú me Ebhe gbétөлө oekpí ang-o de-e, kpála bini de kóbho de. La-a, ani agbétөлө oekpí ang-o kabula okpála bhende ani alo o-o. <sup>23</sup> Li nedhinga bhomu-o, li kpála bini pa pi yi me: <Yi tsitsia nga, Masiya si-i>, i du di-e me: <Ani abhe-e>, yi abhúka ani de. <sup>24</sup> Padhá de, anga omasiya na eu di ne opolofeta na eu azé bhelé. U améne ongu na ngbengbengbe di ongu na ngangamba ngubula napite okpála. Li angu uo kólo makolo-o, u de píte belegu okpála inde li Ebhe alo o ko. <sup>25</sup> Kaka-a, ma apa engú ang-o pi yi kalanu.

<sup>26</sup> A moko, i du me u nde apa pi yi me: <Yi tsitsia nga, Masiya abhú mili bili-e>, yi anú oo de. U pa di pi yi-e me: <Yi tsitsia, ani awo lie ki>, yi abhúka de. <sup>27</sup> Padhá de, anga maka li ekpí andjendjengene lie nayie andjongu nakolo akati-e, nago ka ma Ndili gba kpála-a adú bhadi moko. Ndu okpála hana au ne djila o. <sup>28</sup> A viti bini maka bili li kuo 'he nde lie me okpála nde mbila de-e, okpála ambíla ka odhu inde azuzu kuo apékəbhə bhadi bhúla o lie dede-o.»

*Yesu akpokpo lele nago ka e-o*

*(Tsia bhú Mlk. 13:24-27; di ne bhú Luk. 21:25-28.)*

<sup>29</sup> Yesu atsia apa matá me: «Pita likabhu na oekpí bhomu-o, ma 'li ma me-e,

biti abúku bhúla ela libhomu,  
 epe sù matá-a de,  
 oikupala abála kuto,

li oangu na abhúlá tsia dyíki má djigi djigi!†  
<sup>30</sup> Abhomu-o, ehe bini inde asúno me ngama Ndili gba kpála ma ngago-o akóto abhúlá. Ndu okpála hana pílá doto libhomu adú bhú 'gbá. U tsia ú ma, ngama Ndili gba kpála me ma nde ngago pí ndindi abhúlá, ma nde abedhe ne angu la di ne sangu bedhe. <sup>31</sup> U adjé gili toti na kpekpeke nga. Ngama, Ndili gba kpála-a, ma tsia tíma oandjelu gba ma me u nu po bhúla okpála bhende li Ebhe alo o ne ndu 'dje doto badha hana, nayie li pápá bini, akólo makolo li pápá koko.»

*Kpála bini mbíla nedhinga nago ka Ndili gba kpála-a de*

*(Tsia bhú Mlk. 13:28-31; di ne bhú Luk. 21:29-33.)*

<sup>32</sup> Yesu akpokpo matá gbitaku koko me: «Nago ka ma, Ndili gba kpála-a, adú maka engú inde asuno lie pí yi li ndula na figi-o . Yi kə mbolimboli ndjindji. Padhá de, anga nedhinga li 'ndji 'ndji aholo asú lie, li okpákpá holo nake-o, yi mbíla me gbokokpi akolo masikpe. <sup>33</sup> Kaka-a, nedhinga yi aú ndu ongú inde ma akpokpo e pí yi bhomu-o lie hana-a, yi mbíla ndjindji me nago ka ma, Ndili gba kpála akolo masikpe, me ma bha ibili li obhe bhoti gba yi-o. <sup>34</sup> Ma apa pí yi na paká me, ndu 'ngú inde ma akpokpo e pí

† 24:29 24:29 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10.

yi pindji nago ka ma, Ndili gba kpála-a akódho 'kpí me okpála na naki inde-e nde mu nga ndu o hana de. <sup>35</sup> Kokpí ne doto akódho 'kpí makodho, engú bini, 'li ma kódho 'kpí belegu de bini.

<sup>36</sup> La-a, kpála bini mbíla ekpí di ne nedhinga nago ka ma Ndili gba kpála-a de, abana bha oandjelu inde abhúlá, u mbíla de, abana bha ma Ndili-o, ma mbíla de. Kpála bini mbíla de, ambíla bha bini ne 'Dyi ma kpi e kpi. <sup>37</sup> Maka engú inde akodho nani 'kpí bhú nedhinga gba Nua-a, nago ka ma Ndili gba kpála adú bhadi moko. <sup>38</sup> Padhá de, anga bhú nedhinga bhomu-o, kala me engu-o si na eu eu-o, okpála adu mugito me engú ade. U adu nazu 'he, u atsia adu di nandji pandi. Obhosi ne olisi adu naha lio, u atsia adu di amba ongisi gba o na olisilisi bhú kuva, akolo li 'kpí inde li Nua ali lie bhú 'ngbé zabu-o. <sup>39</sup> 'To uo du 'to 'ngú bini de, akolo li nedhinga inde li engu asi lie, a atsia abha ndu uo hana má kpəkəbhə! Nago ka ma, Ndili gba kpála-a adú bhadi moko.

<sup>40</sup> Abhomu-o, i bhaka okpála bhisi abhiye-e, oandjelu gba Ebhe-e ahá bini, u tsia 'ó ká bhe koko-o. <sup>41</sup> I bhaka olisi bhisi ngatu mapunga-a, oandjelu gba Ebhe-e ahá bini, u tsia 'ó ká bhe koko-o. <sup>42</sup> Yi lila liyi ndjindji, anga yi mbíla ekpí inde li Ngámá gba yi-e agó lie de. <sup>43</sup> A ayo me yi mbíla ndjindji me, i dú me bhulu 'ti-e mbíla nedhinga inde li bhulu 'zi agó lie sukpe uu-o, ani de dú bha bini li zuku. Ani de 'ó de me bhulu 'zi gumu eti gba ni-e de. <sup>44</sup> Kaka-a, ngayi di-e, yi du bedhe, anga nedhinga yi nde lie bhú 'ili 'to-o, a la bhomu-o nedhinga inde li ngama Ndili gba

kpála ma agó lie-o.»

*Kpála na kulu inde ngbingbili inde di na imbilangụ*

*(Tsia bhú Luk. 12:41-48.)*

<sup>45</sup> Yesu atsia apa matá me: «Kpála na kulu inde ngbingbili inde di na imbilangụ-o ngae dho? Yi tsitsia nga, a ko ngua kpála na kulu inde li ngámá gba e a'o e pí 'ndji okpála na eti gba e me ani dụ naha ezụ pí uo li nedhinga ayo lie-o. <sup>46</sup> A ko djali pí kpála na kulu bhomụ i dụ me ngámá gba ani-e nde ago, ani bhaka me ani nde ngamemene mo-o. <sup>47</sup> Ma apa pí yi na paká me, ngámá a'ó ani pí 'ndji ndụ 'he gba e hana. <sup>48</sup> Engú bini, i dụ me a nde kpála na kulu na sisiti-e, ani pá li bua e me: <Ha-a, ngámá gba ma nga bha ngabhue.> <sup>49</sup> Abhomụ-o, ani hólo nabhi obi e koko na kulu-o, ani hólo nazụ 'he, ani hólo nandji pandi ne omulangba. <sup>50</sup> Li ngámá gba kpála na kulu angogo go li 'kpí ani djeke ani lie de, di li nedhinga inde ani mbila e de-e, <sup>51</sup> ani 'é ani bhú kulu, ani tsia méne ani kpekpeke maka li Ebhe améne galikpe obhulụ kali lie li bili ani abú uo lie-o. Oo-o, u adú aku 'gbá, u tsia dú di nazụ tate e-o.»

## 25

*Gbitaku pindji otsalisi ndjikpa na kụva*

<sup>1</sup> Abhomụ-o, Yesu apa matá me: «Ekpí li ngama Ndili gba kpála ma agó lie, engú inde akódho 'kpí bhú Naụ na abhúlá adú maka gbitaku inde: a adụ nani otsalisi ndjikpa inde aha otala gba o ngú nanụ nakè lio ne bhoko

inde adu akunda naha eḷe. <sup>2</sup> Bhú ká uo, obhe bhuluvue adu ongingi, obhe bhuluvue koko adu obhulu imbilangũ. <sup>3</sup> Otsalisi bhe na ngingi-e aha otala gba o-o, la-a, 'to uo a'ili li naha otsupa 'mũ koko dede. <sup>4</sup> Engú bini, obhe na imbilangũ-o aha otala gba o bhú dabili bini ne otsupa 'mũ koko dede. <sup>5</sup> Li bhoko-o go lie má gala de-e, ela aholo ndu uo hana, u atsia atuko ne ela.

<sup>6</sup> Tutu sukpe-e, tolo 'ue akoto: <Bhoko-o ki-e! Yi ze ngú naké liyi ne uo.> <sup>7</sup> Abhomũ-o, ndu otsalisi-e hana azukũ. U atsia aholo naleke otala gba o-o. <sup>8</sup> Otsalisi bhe na ngingi-e apa pi obhende na imbilangũ-o me: <Yi ha mbo té emũ gba yi-e pi ya, anga otala gba ya-a ngabulu.> <sup>9</sup> Obhe na imbilangũ-o agie pi uo me: <A mo-o ade, anga bhe ka ya-a bhelé da nale li lele ní ne yi ade. Yi nu bhaka mangbo okpála i ngatsitsindji, amba yi kala pi yi ka uo.> <sup>10</sup> Obhe na ngingi-e anũ nakala emũ-o. Engú bini, nedhinga u adu anũ lie nakakala-a, bhoko-o akolo. Otsalisi bhuluvue inde adu bedhe ali ne anĩ bhú 'ti na anokomia-o. U atsia adula bhoti-o. <sup>11</sup> A abhue bedi, otsalisi bhe koko akolo. U atsia aholo nasusula me: <Ngámá, ngámá, bhulu bhoti-e pi ya!> <sup>12</sup> Engú bini, bhoko-o agie pi uo me: <Ma apa pi yi na paká me, ma mbila yi de.>>

<sup>13</sup> Yesu atsia abu tata-a me: «Yi lila liyi, anga yi mbila ekpí li ngama Ndili gba kpála ma agó lie de, yi mbila la di nedhinga ango-o de.»

*Gbitaku pindji okpála na kulu bata  
(Tsia bhú Luk. 19:11-27.)*

14 Yesu apa matá me: «Ekpí lí ngama Ndili gba kpála ma agó lie, engú inde akódho 'kpí bhú Nau na abhúlá adú maka gbitaku inde: a adu nani bhoko bini inde adu akunda nanu dhuku. Kala nanu ka ani-e, ani a'i okpála na kulu gba e-o. Ani atsia a'o tia gba e sakpa uo. 15 Ani aha pi bhe bini-e lí falanga kámá bhuluvue. Ani aha pi bhe koko lí falanga kámá bhisi. Ani atsia aha pi bhe koko lí falanga kámá bini. Ani aha pi kpála ne kpála lí lele angu gba e. Pipita-a, ani atsia atapa. 16 Kpála na kulu bhe asia kámá bhuluvue-e, anu kolo nabe ndundu. Ani atsia asia di lí falanga koko pépé kámá bhuluvue. 17 Bhende asia kámá bhisi-e amene bhadi moko. Ani atsia asia di lí falanga koko pépé kámá bhisi. 18 Engú bini, bhende asia kámá bini-e anu bha naae nadi edú bhú doto. Ani atsia awo tia gba ngámá gba e bhúbhú.

19 Pipita abhue naali, ngámá na kulu gba okpála bhomu-o ago. Ani atsia aholo nagama 'ngú ne uo pindji lele maka u amene kulu ne tia gba ni-e lie-o. 20 Bhe asia nako lí falanga kámá bhuluvue adyudyo lie. Ani agbe lí falanga kámá bhuluvue koko-o ne napa me: «Ngámá, mo oha nako mu ma lí falanga kámá bhuluvue. A inde-e lí falanga kámá bhuluvue koko inde ma asia e pépé ko.» 21 Do ngámá gba ani pi ani me: «So! Mu ne bádha kpála na kulu, mu la di ngbingbili. Mo omene nako ngbili 'ngú bhú ongú inde djedjedje, ma a'ó ibili mu me mu du atsia 'kpí lí ongú na ngbengbengbe. Go kpi djali bhú dabili bini ne ma.»

22 Kpála na kulu bhende asia nako lí falanga



kámá bhisi-e adyudyo di lie. Aní pí ngámá-a me: <Ngámá, mo oha nako muma lí falanga kámá bhisi. A inde-e lí falanga kámá bhisi koko inde ma asia e pépé ko.> <sup>23</sup> Do ngámá gba aní pí aní me: <So! Mụ ne bádha kpála na kulu. Mụ la di ngbingbili. Mo omene nako ngbili 'ngú bhú ongú inde djedjedje, ma a'ó ibili mụ me mụ dụ atsia 'kpí lí ongú na ngbengbengbe. Go kpi djali bhú dabili bini ne ma.>

<sup>24</sup> Lí soso-o, kpála bhende asia nako lí falanga kámá bini-e ago di. Aní pí ngámá-a me: <Ngámá, ma adụ nako ambila ndjindji me mụ ne kpála na gúgú. Mụ ngaha 'zụ lí bilí inde mụ lu 'zụ lí e de. Mụ ngazụ 'he lí kulu inde lí okpála koko andala lie ngao. <sup>25</sup> Ma adje tsulụ mụ. Ma atsia anụ awo tia gba mụ-o bhú doto. A la bhadi ii. Tia gba mụ-o ki.> <sup>26</sup> Engú bini, ngámá gba aní agie pí aní me: <Mụ ne siti kpála na kulu! Mụ di ne bhulụ ipio! Ka ní mo odu nako ambila lie ndjindji me ma ngaha 'zụ lí bilí inde ma alu 'zụ lie de, me ma ngazụ 'he lí kulu inde lí okpála koko andala lie ngao, <sup>27</sup> mụ tsia 'o nako tia gba ma-a bhú baki de ka ní, amba ma agó lie, ma de bhaka me a nde abe ndụ e abe-e?>

<sup>28</sup> Yaka! Yí gbụlụ lí falanga kámá bini bhomụ-o ka aní, amba yí ha pí kpála inde ka e kutu bini ko.> <sup>29</sup> Ngámá bhomụ-o apa mo-o, anga kpála inde ka e ne ehe, u ahá matá koko pí aní pépé. Aní tsia dú bhú mụndeyi. Engú bini, kpála lí ehe nde ka e belegu ade bini-e, u agbúlu belegu dhegu bhende i ti da nadụ ka aní-o. <sup>30</sup> Ngámá-a atsia abu 'so 'ngú gba siti kpála na kulu bhomụ-o

ne napa me, u bhike ani bhú biti akilidjo li bili inde li okpála nde lie bhú 'gbá di ne nazu Tate O-O.»

*Yesu akpokpo lele maka ani akódho 'ngú gba okpála lie-o*

<sup>31</sup> Yesu atsia apa matá me: «Ekpí li ngama Ndili gba kpála ma agó lie bhú sangu gba ma bhú dabili bini ne oandjelu hana-a, ma adú pí kiti na ngámá gba ma na sangu-o. <sup>32</sup> Ndu okpála na píla doto hana apó bhúla o kala ma. Ma tsia gbógbo bhusu uo maka li mulila agbogbo bhusu okandele lie ne omeme-o. <sup>33</sup> Ma a'ó okandele li pá 'kpa ma na kokpa, ma tsia ó omeme-e li pá 'kpa ma na gali.

<sup>34</sup> Abhomu-o, ma tsia pá pi obhende adú li pá 'kpa ma na kokpa-a me: <Yi gógo, ngayi okpála asia bisagu ka 'Dyi ma-o. Yi go sia ngámá inde li ani aleke nani e pi yi nayie li nedhinga ani abho kokpi ne doto lie ko. <sup>35</sup> Padhá de, anga ma adje gumu, yi atsia aha ezú muu. Ma adu adje gumu 'ngu, yi atsia aha engu nandji mandji muu. Ma adu ne gomago, yi atsia asia ma agba yi. <sup>36</sup> Ma adu ndumbu, yi atsia ato bongo li ma. A adu li ma ne kuo, yi atsia ateteke ma. Ma adu bhú tikpu, yi atsia ago natsia ma.>

<sup>37</sup> Abhomu-o, obhende amene mukunda gba Ebhe-e tsia yi ma me: <Ngámá, ya au mu ne gumu nadho, ya atsia aha 'zu pi mu-o? Ya au mu ne gumu 'ngu nadho, ya atsia aha engu nandji mandji pi mu-o? <sup>38</sup> Ya au mu me mu nde ne gomago nadho, ya atsia asia mu agba ya-a? Ya

au m̄ ndumbu nadho, ya atsia ato bongo li m̄-o? <sup>39</sup> Ya au m̄ ne kuo, i d̄ di-e me m̄ nde bhú tikp̄ nadho, ya atsia an̄ ateteke m̄-o?> <sup>40</sup> Ma tsia gíe p̄i uo me: <Ma apa p̄i yi na paká me, nd̄ nedhinga hana inde yi amene bádha 'ngú lie p̄i s̄ka ondaise ma inde li okpála ngau o padhá inde-e, yi amene bhom̄-o m̄ma.>

<sup>41</sup> Abhom̄-o, ma tsia pá di p̄i obhende adú li pá 'kpa ma na gali-e me: <Yi yie s̄i yiyie, yi gbida de ma tsutsu, ngayi okpála li Ebhe at̄ p̄d̄j̄e li-o! Yi n̄ bhú djua na d̄d̄ma inde li Ebhe aleke nani e p̄i djabul̄ ne omaha e-o! <sup>42</sup> Padhá de, anga ma ad̄ adje gum̄, yi tsia ha 'zu m̄ma de. Ma ad̄ adje gum̄ 'ngu, yi tsia ha engu nandji mandji m̄ma de. <sup>43</sup> Ma ad̄ ne gomago, yi tsia sia ma agba yi de. Ma ad̄ ndumbu, yi tsia to bongo li ma de. Ma ad̄ ne kuo di ne bhú tikp̄, yi tsia go nateteke ma de.>

<sup>44</sup> Abhom̄-o, u tsia yí di ma me: <Ngámá, ya au m̄ nadho me m̄ nde ne gum̄, i d̄ di-e gum̄ 'ngu-o? Ya au m̄ nadho me m̄ nde ne gomago, m̄ nde ndumbu, i d̄ di-e me m̄ nde ne kuo, i d̄ di-e me m̄ nde bhú tikp̄-o, ya tsia n̄ teteke m̄ di-e?> <sup>45</sup> Ma tsia gíe p̄i uo me: <Ma apa p̄i yi na paká me, nd̄ nedhinga hana yi mene bádha 'ngú lie p̄i s̄ka ondaise ma inde li okpála ngau o padhá inde-e de-e, yi mbila me yi aneke di namemene bhom̄-o m̄ma.> <sup>46</sup> Abhom̄-o, obhende i mene mukunda gba Ebhe-e de-e, gbida naz̄ likabhu na d̄d̄ma. Engú bini, obhende amene mukunda gba Ebhe-e, tsia gbida naao bhú mukobho na d̄d̄ma.»

## 26

*Ongámási gba omaYuda agili kpadji ngú nabhøø Yesu*

*(Tsia bhú Mlk. 14:1-2; ne bhú Luk. 22:1-2; di ne bhú Dja. 11:45-53.)*

<sup>1</sup> Li Yesu andjia nakpo ongú bhomu-o lie hana-a, ani atsia apa pi omukpata gba e me: <sup>2</sup> «Yi mbila hana me pita 'kpí bhisi-e, adú anokomia na Pasika . Li 'kpí angoo, u apú ma Ndili gba kpála ngubula me u gi ma li kulusi.»

<sup>3</sup> Yesu adu akpo 'ngú bhomu-o pi omukpata gba e lie, abhaka me ongbengbe odimandø ne obhelesi okpála gba omaYuda nde apo bhúla o agba bhele kpála gba odimandø , u a'i e me Kaifa.

<sup>4</sup> U atsia aziba lio ngubula naholo Yesu bhú pepe, amba o bhøø ani. <sup>5</sup> Engú bini, u adu apa me: «A ayo de me ní holo ani bhú nedhinga na anokomia de, anga li okpála gbe tolo.»

*Ølø bini atuko mungotsi pí 'ndji Yesu*

*(Tsia bhú Mlk. 14:3-9; di ne bhú Dja. 12:1-8.)*

<sup>6</sup> Ekpí bini, Yesu ne omukpata gba e adu bhú kuti na Betania, abhú 'ti gba Simo nani li kába amene e-o. <sup>7</sup> Nedhinga u adu azu 'he lie, ølø bini ago de ani ne gili inde u abho e li alabatele.\* Gili angoo adu me a nde abedhe ne mungotsi na kpéke mase bedhe. Ani atsia atuko mungotsi angoo pí 'ndji Yesu. <sup>8</sup> Li omukpata gba ani-e au lie mo-o, u ake 'ngú lio, u atsia apa me: «Ta nasiti mungotsi inde-e padhá me-e ne ni? <sup>9</sup> U ti igini da

\* **26:7** 26:7 Alabatele: A ko teme na mase naali inde u abhobho øhe maka gili lie ko.

natsitsindji bhú kpéke mase, u tsia há tia angoo pi obhulu ndibhili.» <sup>10</sup> Li Yesu ambila engú u adu apa e lie, ani atsia apa pi uo me: «Yi ngato mbolo li elee inde-e ka ni? Engú inde ani amene e li pabili gba ma-a, a ko bádha 'ngú. <sup>11</sup> Padhá de, anga obhulu ndibhili-e, yi adú ne uo ndu nedhinga hana. Engú bini, ngama-a, ní dú ne yi ndu 'kpí hana de. <sup>12</sup> Ani atuko mungotsi inde li kute ma, ngubula naleleke ngú ekpí inde u azí ma lie ko. <sup>13</sup> Ma apa pi yi na paká me, píla doto libhomu, ndu bili hana inde u akpókpo Bádha Ngali gba Ebhe-e lie, u akpókpo di engú inde li elee inde-e amene e ngú nabhundja ani.»

*Yuda adje lie ne ongámási gba omaYuda ngú napu  
Yesu pi uo*

*(Tsia bhú Mlk. 14:10-11; di ne bhú Luk. 22:3-6.)*

<sup>14</sup> Abhomu-o, suka omukpata ndjikpa ne ká bhisi anu nabhaka ongbengbe odimandé. A adu 'li mukpata angoo me Yuda Isikaliole. <sup>15</sup> Ani atsia apa pi uo me: «Yi akunda naha muma ni, amba ma pu Yesu pi yi-e?» Abhomu-o, u adje lio ne uo li mase-o. Ongbengbe odimandé atanga lí falanga ndjikpa bata,<sup>†</sup> u atsia aha pi ani. <sup>16</sup> Nayie bhú nedhinga bhomu-o, Yuda adu nagili nedhinga na ndjindji ngubula napu Yesu pi uo me u bhole ani.

<sup>†</sup> **26:15** 26:15 Lí falanga ndjikpa bata: A ko nani tia bhelé de, ati di nani da nakala bali bini de. Tsia bhú Eki. 21:32, di ne bhú Dkl. 11:12.

*Yesu atima omukpata gba e naleke da anokomia na Pasika*

*(Tsia bhú Mlk. 14:12-21; ne bhú Luk. 22:7-14, 21-23; di ne bhú Dja. 13:21-30.)*

<sup>17</sup> Li 'kpí na kalanu na anokomia nazu mapa inde li levile nde bhú e ade-e , omukpata gba Yesu ago nayi ani me: «Mo okunda me ya leke dá Pasika pi mu su?» <sup>18</sup> Yesu agie pi uo me: «Yi nu abhú gudhu, agba kpála bini me, amba yi pa pi ani me: «Musuno apa me, nedhinga gba ni-e akolo masikpe. Ngani ne omukpata gba ni-e, o ozú anokomia agba mu.» <sup>19</sup> Omukpata amene maka Yesu apa lie pi uo-o. Abhomu-o, u atsia anu aleke da anokomia-o.

*Yesu apa me suka omukpata gba ni bini apú ni*

<sup>20</sup> Li akolo lie tagolo-o, Yesu ne omukpata gba e ndjikpa ne ká bhisi-e aholo nazu 'he. <sup>21</sup> Nedhinga uo adu azu 'he lie, do Yesu de-e: «Ma apa pi yi na paká me, suka yi bini apú ma.» <sup>22</sup> Omukpata-a asia likabhu naali. Abhomu-o, kpála ne kpála aholo nayi ani me: «Ngámá, a adú bha ndju ma?» <sup>23</sup> Ani agie pi uo me: «Kpála inde ya ngato 'kpa ya ne e bhú saani bini-e, kpála ango-o apú ma ngae. <sup>24</sup> Ngama Ndili gba kpála, ma adjí akpí maka u aye 'ngú gba ma lie-o. Engú bini, a ko likabhu pi kpála inde ngapu ma-o! A nani pi kpála ango-o ndjindji me u azú ani de!» <sup>25</sup> Abhomu-o, Yuda, kpála inde apú ani atsia ayi me: «Musuno, a adú bha ndju ma?» Yesu atsia agie pi ani me: «Mo opa ngamu!»

*Yesu agapa mapa ne vino li omukpata gba e ndjikpa ne ka bhisi-o*

*(Tsia bhú Mlk. 14:22-26; ne bhú Luk. 22:14-20; di ne bhú 1 Kol. 11:23-25.)*

<sup>26</sup> Nedhinga u adu azu 'he lie, Yesu aha mapa-o. Ani agie heni pi Ebhe, ani agumu bhusu bhusu, ani atsia aha pi omukpata gba e ne napa me: «Yi zuzu, a inde-e kute ma.» <sup>27</sup> Pipita-a, ani aha kopo na vino-o, ani agie heni pi Ebhe, ani atsia aha pi uo ne napa me: «Yi ndji ndu yi hana, <sup>28</sup> anga a inde-e ngute ma. A ko ngute inde ngasuno me Ebhe akodho gandja ne okpala-o. Ngute angoo atuko ngu na'e osisiti 'ngu gba okpala bhelé. <sup>29</sup> Ma apa pi yi me: Nayie pi mbia inde-e, ma ndji mata vino belegu de bini, akolo li 'kpi inde ma andji lie ne toto bhú dabili bini ne yi bhú Nau gba 'Dyi ma-o.» <sup>30</sup> Pipita-a, u ali etsi na anokomia-o. U aze, u atsia agbida api eta na ondula na Olive.

*Yesu apa me Piele apa me ni mbila ni de*

*(Tsia bhú Mlk. 14:27-31; ne bhú Luk. 22:31-34; di ne bhú Dja. 13:36-38.)*

<sup>31</sup> Abhomu-o, Yesu atsia apa pi omukpata gba e me: «Sukpe na naki inde-e, ndu yi hana a'ó ka ma. Padha de, anga Ebhe apa bhú Bhuku gba e me:

«Ma abholo mulila gba okandelo-o,

li okandelo-o tsambala ne bili ngangá.†»

<sup>32</sup> Engu bini, ngama-a, ekpi ma azuku lie, ma anu adjeke yi abhu Galilaya.» <sup>33</sup> Piele atsia apa pi ani me: «Abana li ndu okpala hana 'o ka mu-o, ngama-a, ma 'ó ka mu belegu de bini.»

† **26:31** 26:31 Tsia bhú Dja. 13:7.

<sup>34</sup> Abhomu-o, Yesu atsia agie pi ani me: «Ma apa pi mu na paká me, sukpe na naki inde-e, kala me engu ku 'gbá-a, mo opá bhutsibhutsi bata me ni mbila ma de.» <sup>35</sup> Piele atsia apa matá pi ani me: «Abana i du bha me a nde ayo me ní kpi bhú dabili bini ne mu-o, ma 'ó ká mu de.» Abhomu-o, ndu omukpata koko hana atsia apa bhadi moko.

*Yesu ayo Ebhe bhú Getesemani*

*(Tsia bhú Mlk. 14:32-42; di ne bhú Luk. 22:39-46.)*

<sup>36</sup> Abhomu-o, Yesu akolo ne omukpata gba e li bili bini inde u a'i e me Getesemani. Ani atsia apa pi uo me: «Yi dudu si nedhinga ma adji lie nayo Ebhe aoo ko.» <sup>37</sup> Ani aha Piele ne ongisi bhisi gba Djebedayo-o. Ani anu ne uo bhú dabili bini. Tsulu aholo ani, likabhu atsia abedhe di li bua ani bedhe. <sup>38</sup> Abhomu-o, ani atsia apa pi uo me: «Bua ma abedhe ne likabhu bedhe ka ma adji akpi lie-o. Yi dudu si, yi du la di ne ma li zuku bhú dabili bini.»

<sup>39</sup> Pipita-a, ani adyudyo mbo lie tsutsu bedi. Ani atutu lipuku e kuto, ani atu bhula e pi doto, ani atsia ayo Ebhe me: «'Dyi ma, i du ndjindji-e, mu de dyudyo likabhu inde-e de ma tsutsu! Engu la bini, mo omene maka ma akunda lie de, mene mangbo maka mo okunda lie ko!» <sup>40</sup> Ani agie lie li bili li omukpata bata adu lie-o. Ani abhaka me u nde atuko ne 'la má dhululu! Do ani pi Piele de-e: «Yi ti igini da nadu li zuku ngabha ne ma ngubula saa bini di? <sup>41</sup> Yi du li zuku, yi yo Ebhe, amba yi alí bhú nale de. Bua kpála bedhe ndu 'kpi hana ngu namene badha 'ngu, engu bini, kute ani bhubhuku.»



<sup>42</sup> Matá bhùtsibhùtsi na bhisi-e, ani adyudyo lie de omùkpata bata-a tsutsu. Ani atsia ayo Ebhe me: «'Dyi ma, i dũ me likabhu inde-e nde ti da naneke ma de-e, a nde ayo bha me a kolo li ma-a, a ayo me engú mo okũnda e mene lie ngae!» <sup>43</sup> Abhomũ-o, Yesu agie matá lie li bili li omùkpata-a adũ lie-o. Ani abhaka me u nde tila. Padhá de, anga djila uo adũ me a nde ne ela má yìkpokpo! <sup>44</sup> Ani a'o ká uo, ani adyudyo matá lie de uo tsutsu. Ani atsia ayo Ebhe bhùtsibhùtsi na bata ne napa bha oeli bini bhomũ-o.

<sup>45</sup> Abhomũ-o, ani ago abhaka omùkpata gba e bata-o, ani atsia apa pi uo me: «A ndjindji! Yi la nga lala, amba yi guo! La-a, nedhinga akolo, nedhinga inde u apú ma, Ndili gba kpála lie pi osisiti okpála-o. <sup>46</sup> Yi tsitsia nga, kpála inde apú ma akolo. Yi yie bhúlá, ní nũ bhaka uo!»

*U aholo Yesu  
(Tsia bhú Mlk. 14:43-50; ne bhú Luk. 22:47-53;  
di ne bhú Dja. 18:3-12.)*

<sup>47</sup> Bha li nedhinga li Yesu adũ agama 'ngú lie, me-e, Yuda, sũka omùkpata ndjikpa ne ká bhisi-e akolo. Ani ago nani ne bhiti okpála inde adũ sa 'kpa o ne ombotia di ne ondula. A atima nani uo ne ongbengbe odimandø di ne obhelesi okpála gba omaYuda. <sup>48</sup> Yuda adje nani lie ne uo kalanũ me: «Kpála inde ma akáma e, a ko ani. Yi holo ani!» <sup>49</sup> Me-e, ani adyudyo lie de Yesu, ani atsia ayi ani me: «Mũsuno, mũ oo!» Ani atsia akama ani. <sup>50</sup> Yesu atsia apa pi ani me: «Olia ma, engú inde mo ogo namene e, memene!» Abhomũ-o, okpála koko inde ago bhú dabili bini ne Yuda-a,

adyudyo lio de Yesu, u abu 'kpa o li ani, u atsia aholo ani.

<sup>51</sup> Kolo me-e, sũka okpála inde adũ bhú dabili bini ne Yesu-o agbe mbotia gba e, ani asũ kpála na kulu gba bhele kpála gba odimandẽ-o ne nakodho 'dje ani má tse! <sup>52</sup> Yesu atsia apa pi ani me: «Gie mbotia gba mũ-o bhú 'ti e. Padhá de, anga ndũ okpála hana inde ngagũ 'gũ ne mbotia-a, amú bhadi li mbotia. <sup>53</sup> Mũ mbila de me ma ti igini da nayo ka 'Dyi ma me ani go teteke ma-a di? Ma yo ka ani-e, ani kolo tíma libi oandjelu mũma nane ndjikpa ne ká bhisi mane. <sup>54</sup> I dũ la mo-o, engú inde u aye e bhú Bhuku gba Ebhe-e améne lie lele pi? Padhá de, anga Bhuku gba Ebhe-e apa me, a ayo me engú inde ngamene lie inde-e, amene lie moko.»

<sup>55</sup> Abhomũ-o, Yesu atsia apa pi kambĩ okpála bhomũ-o me: «Ndũ 'kpí hana ma adũ nako nadũ bhú 'ngbé 'ti Ebhe gba omaYuda ngú nasuno. La-a, yi holo nako ma de. Ka ni yi ngago lie ngú ma ne ombotia di ne ondula sa 'kpa yi mũgito me ma ne siti bhũlũ 'zi-e? <sup>56</sup> Engú bini, ndũ 'ngú bhomũ-o hana amene lie ngũbula me engú inde li opolofeta aye e amene lie.» Abhomũ-o, ndũ omũkpata hana atsambala de ani má mũe, u atsia agbida!

*U anũ ne Yesu kala Libi okpála natsia 'kpí li 'ngú gba omaYuda*

*(Tsia bhú Mlk. 14:53-65; ne bhú Luk. 22:54-55, 63-71; di ne bhú Dja. 18:13-14, 19-24.)*

<sup>57</sup> Abhomu-o, okpála inde u atima nani o ngú naholo Yesu-o anu ne ani kala Kaifa, bhele kpála gba odimandø-o, li bili inde li omusuno na líli gba Moidje ne obhelesi okpála apøkøbhø bhúla o lie-o. <sup>58</sup> Piele atsia adu naae nakpata Yesu mbo tsutsu, nakolo makolo bhú mbadhasu gba bhele kpála gba odimandø-o. Ani ali bhú mbadhasu-o, ani atsia adu kuto bhú ká okpála na kulu ngubula natsia me engú angø-o abú 'ta e lele pi-ie.

<sup>59</sup> Abhomu-o, ongbengbe odimandø bhú dabili bini ne ndu okpála koko na Libi okpála natsia 'kpí li 'ngú gba omaYuda libhomu adu agili kpála inde agó napa 'ngú li Yesu sisiti, abana i du eu, amba o kodho 'ngú gba ani-e me ani kpi bha makpi. <sup>60</sup> Engú bini, belegu li bhiti okpála adu apa 'ngú li Yesu lie ne eu-o, u u kpála bini de inde apa engú inde u ti da nabhøle ani ka e. Li soso-o, okpála bhisi adyudyo lio masikpe. <sup>61</sup> U atsia apa me: «Bhoko inde-e apa nako me, <ni ti da nabhøle 'ngbé 'ti Ebhe gba omaYuda-o, ni tsia yiki matá ne toto sunda ekpí bata.>»

<sup>62</sup> Abhomu-o, 'ngbé dimandø-o ayie bhúlá, ani atsia ayi Yesu me: «Mu gie 'ngú li 'ngú inde li okpála inde-e ngapa e li kute mu-o belegu de bini?» <sup>63</sup> Engú bini, Yesu andjili bha má bulu! Abhomu-o, bhele kpála gba odimandø-o atsia ayi matá ani me: «Ma ngayi mu ne 'li Ebhe inde uu-o me pa nga pi ya: ngamu-o, mu ne Masiya , Ndili gba Ebhe-e?» <sup>64</sup> Yesu agie pi ani me: «Mo opa ngamu. Mbila la me, nayie pi mbia inde-e, yi aú Ndili gba kpála adu li pápá na kokpa gba Angbamili me ani nde ngago pí ndindi na

abhúlá.†»

<sup>65</sup> Engú bhomu-o ake li bua bhele kpála gba odimandø-o naali. Abhomu-o, ani asidha bongo li e má tsue! Ani atsia apa me: «Ani asobho Ebhe, anga kpála-kuti ti da nakpo 'ndji e ne Ebhe de! Ní matá ne gumu okpála koko ngú nakpokpo 'ngú gba ani-e ade! Yi adje sobho ani asobho Ebhe ne e ne 'dje yi makpe. <sup>66</sup> Yi abhundja naayi me ní mene ngú ani pi?» U agie me: «A ayo me u bhøø ani mabhøø.» <sup>67</sup> Abhomu-o, u aholo akuku ngusu bhúla ani, u adu asu ani, u atsia adu di abhi bhúla ani. <sup>68</sup> U atsia adu apa pi ani me: «I du me mu nde bha ndju ne Masiya na paká-a, pa nga pi ya me asu mu da?»

*Piele apa me ni mbila Yesu de*

*(Tsia bhú Mlk. 14:66-72; ne bhú Luk. 22:56-62; di ne bhú Dja. 18:15-18, 25-27.)*

<sup>69</sup> Nedhinga u adu ato mbolo li Yesu lie, abhaka me Piele nde adu kilidjo tu mbadhasu gba bhele kpála gba odimandø-o. Kpála bini na kulu na øøø adyudyo lie de ani. Ani atsia apa pi ani me: «Ngamu di-e, mo odu nako bhú dabili bini ne Yesu, kpála na Galilaya-o.» <sup>70</sup> Engú bini, Piele ayala kala ndu okpála hana me: «Ma mbila engú inde mu ngakunda napa e de.» <sup>71</sup> Abhomu-o, Piele adyudyo lie de 'bhø aga-o. Kpála na kulu koko bini na øøø au ani. Ani atsia apa pi okpála inde adu oo me: «Kpála inde-e adu nako bhú dabili bini ne Yesu, kpála na Nadjaleta-o.» <sup>72</sup> Piele ayala matá, ani atsia apa me: «Ne 'li

† **26:64** 26:64 Tsia bhú Ets. 110:1; di ne bhú Dan. 7:13.

Ebhe, ma mbila kpála inde yi ngapa 'ngú gba e bhomu-o de!»

<sup>73</sup> Pipita kolo me-e, okpála inde adu oo adyudyo lio, u atsia apa pi Piele me: «A ko kukulu 'ngú. Ngamu di-e, ma bha ne saka uo, anga nagama 'ngú gba mu-o ngambamba ta mu ngae.» <sup>74</sup> Abhomu-o, Piele aholo natu silika ne nasima me: «Ne 'li Ebhe, ma mbila kpála bhomu-o de!» Bha li nedhinga bhomu-o, engu atsia aku 'gbá. <sup>75</sup> Abhomu-o, Piele abhundja eli inde li Yesu apa igini e pi ani me: «Kala me engu ku 'gbá-a, mo opa bhutsibhutsi bata me ni mbila ma de.» Ani akoto kilidjo, ani atsia abhøle kuo e ne egbá má kusu!

## 27

*U anu ne Yesu kala Pilato*

*(Tsia bhú Mlk. 15:1; ne bhú Luk. 23:1-2; di ne bhú Dja. 18:28-32.)*

<sup>1</sup> Kèkpi má bhø, ndu ongbengbe odimandø hana di ne obhelesi okpála gba omaYuda adje lio me o méne lele pi me o bhøle Yesu-o. <sup>2</sup> U agbigbite ani, u anu ne ani, u atsia aha ani pi guvelenele Pilato.

*Yuda agi ngulu e*

*(Tsia bhú Kul. 1:18-19.)*

<sup>3</sup> Abhomu-o, Yuda, kpála inde apu Yesu-o au lie me u akodho 'ngú gba ani-e me ani kpi bha makpi-e, ani adje likabhu li bua e naali. Ani atsia anu nagie lí falanga ndjikpa bata-a pi ongbengbe odimandø di ne obhelesi okpála. <sup>4</sup> Do ani pi uo de-e: «Ma amene siti 'ngú, anga ma apu kpála

inde i tu 'ngú de-e pi yi me u bhøle ani!» Engú bini, u agie pi ani me: «Naaya bhúbhú ne ní? A ko naamú 'ngú!» <sup>5</sup> Abhomú-o, Yuda abala lí falanga kuto bhú 'ngbé 'ti Ebhe gba omaYuda ne nakoto bini. Aní atsia anu nagi ngulu e. <sup>6</sup> Ongbengbe odimandø-o aha tia-o. U atsia apa me: «Líli gba ní-e ziba de me ní 'o tia inde-e bhú ká tia na 'ngbé 'ti Ebhe gba omaYuda-a de, anga a ko tia inde u asia e li ngute kpála.» <sup>7</sup> Pita u adje lio lie, u atsia akala ne tia bhomú-o edyi gba kpála bini inde apopo lusa ngubula me u du azi ogomago bhúbhú. <sup>8</sup> Kaka-a, u nga'i 'li edyi angoo nakolo pi naki me: «Edyi inde u akala e ne tia na ngute kpála.» <sup>9</sup> Abhomú-o, engú nani li polofeta Djelemi apa e atsia amene lie. Aní apa nani me:

«U aha lí falanga ndjikpa bata-o.

A bhomú-o mase inde li omafsalaele ato e li ani-o. †

<sup>10</sup> U atsia akala ne di edyi gba bhulu napo lusa.

A bhomú-o engú inde li Ebhe Ngámá aha nani

líli múma me ma pa e pi uo-o.»

*U akodho 'ngú gba Yesu-o me ani kpi bha makpi*

*(Tsia bhú Mlk. 15:2-5; ne bhú Luk. 23:3-5; di ne bhú Dja. 18:33-38.)*

<sup>11</sup> Nedhinga u akolo ne Yesu lie kala guvelenele Pilatø-o, ani ayi ani me: «Ngamú-o, mú ne 'ngbé ngámá gba omaYuda-a?» Yesu agie me: «Mo opa ngamú.» <sup>12</sup> Abhomú-o, ongbengbe odimandø di

† **27:9** 27:9 Tsia bhú Djk. 11:12-13.

ne obhelesi okpála gba omaYuda adu apa 'ngú li aní sisiti. La-a, aní gie 'ngú tété de. <sup>13</sup> Pilatø atsia ayi aní me: «Mú dje engú inde u ngapa e li kute mú bhomu-o dí?» <sup>14</sup> Engú bini, Yesu gie engú bini pí aní tété de. Abhomu-o, Pilatø atsia angamba naali.

<sup>15</sup> Bhú ndu Pasika hana, guvelenele du nani natse 'kpa li bhulu 'kpú bini, bhende li bhiti okpála adu akunda me aní tse 'kpa lie-o. <sup>16</sup> A abhaka me 'ngbé bhulu 'kpú bini inde adu 'li e me Balabasi nde bhú tikpu. <sup>17</sup> Pilatø atsia ayi bhiti okpála inde apo bhúla o me: «Yi akunda me ma tse 'kpa li da pí yi-e? Ne me ma tse 'kpa li Yesu Balabasi, ne me ma tse 'kpa li Yesu inde u a'i e me Masiya-a?» <sup>18</sup> Pilatø yi mo-o padhá de. Aní ayi mo-o, anga aní adu ambila ndjindji me u apu Yesu pí ní anga u adu adje siti bua li aní.

<sup>19</sup> Nedhinga li Pilatø adu lie pí kiti nakodho 'ngú-o, wala aní atima kpála bini pí aní ne tobhila me: «Mo olí bhú 'ngú gba ngbili kpála bhomu-o de, anga sukpe na naki inde-e, ma aloto siti loto li 'ngú gba aní-o.»

<sup>20</sup> Ongbengbe odimandø, di ne obhelesi okpála gba omaYuda ato bhú 'ndji bhiti okpála me u yo ka Pilatø me aní tse 'kpa li Balabasi, amba aní ka kpadji me u bhøø Yesu. Okpála atsia amene bhadi moko. <sup>21</sup> Pilatø atsia apa pí uo me: «Ma atsé 'kpa li bhulu 'kpú bini pí yi matse. Bhú ká Yesu ne Balabasi-e, yi akunda me ma tse 'kpa li da pí yi-e?» U agie me: «Balabasi!» <sup>22</sup> Pilatø ayi uo me: «Ma mene la ngú Yesu inde u a'i e me Masiya pí?» Do uo de-e: «Gi aní li kulusi!»

<sup>23</sup> Pilatè atsia ayi uo me: «Ani amene la mangua siti 'ngú dho?» Engú bini, u atsia adu asusula matá kpekpeke me: «Gi ani li kulusi!» <sup>24</sup> Li Pilatè au lie me angu ni kolo de-e, di ne me tolo ngakolo kpekpeke-e, ani aha engu, ani atsia avulu 'kpa e kala bhiti okpála ne napa me: «Ngama-a, ma bhú ta nakpi gba kpála inde-e ade! A ko naayi 'ngú.» <sup>25</sup> Ndu okpála hana agie me: «A ayo me ngute ani tuko pí 'ndji ya ne ongisi gba ya-o!» <sup>26</sup> Abhomu-o, ani atse 'kpa li Balabasi pi uo. Ani aha líli me u bhi Yesu ne fimbo. Ani atsia aha ani pi uo me u gi ani li kulusi.

*Osudha amu Yesu*

*(Tsia bhú Mlk. 15:16-20; di ne bhú Dja. 19:2-3.)*

<sup>27</sup> Abhomu-o, osudha gba guvelenele anu ne Yesu bhú mbadhasu gba o dengo 'ti gba guvelenele-o. Ndu osudha hana atsia apo bhúla o de ani. <sup>28</sup> U agbe bongo li ani, u atsia ato koti na mbembe li ani mugito me a ko ngámá. <sup>29</sup> U agala 'he na kilikili li kute yá ndula na eti, u atsia ato bhú 'ndji ani. U ato mbamba sa 'kpa ani na kokpa, u atsia atutu lipuku o kuto kala ani. U adu amu ani ne napa me: «'Ngbé ngámá gba omaYuda, mu oo!» <sup>30</sup> U adu aku ngusu li ani, u aha mbamba-a, u atsia adu asu 'ndji ani ne di. <sup>31</sup> U andjia namu ani lie, u agbe koti u de ato e li ani-o, u atsia ato matá bongo gba ani-e li ani. Pipita-a, u atsia anu ne ani ngú nagi ani li kulusi.

*Osudha agi Yesu li kulusi*

*(Tsia bhú Mlk. 15:21-32; ne bhú Luk. 23:26-43; di ne bhú Dja. 19:17-27.)*



<sup>32</sup> Osudha akoto ne Yesu bhú gũdhũ-o. U adũ akoto lie, u akẽ lio ne kpála bini na kuti na Silene, adũ 'li ani me Simo. Osudha aholo ani ne kpéke me ani bi kulusi gba Yesu-o. <sup>33</sup> Li u akolo lie li bili inde u a'i e me Gologota-a, inde akũnda napa me «Bili na pelege 'ndji-e», <sup>34</sup> osudha aha vino inde u amata e ne 'he na sũsũ-o pi ani. Ani ale lie, ani tsia kũnda nandjindji de.

<sup>35</sup> Osudha-a agi Yesu li kulusi. Pita u agi ani lie li kulusi-e, u agũ gbanda ngũ obongo gba ani-o. U atsia agbogbo bhũsũ o tété.† <sup>36</sup> Pipita-a, u atsia adũlũ kuto oo ngũ nalila ani. <sup>37</sup> U a'o nani abhũlã pí 'ndji ani balũa inde asuno ta nagi ani li kulusi-o. U aye nani balũa ang-o me: «A INDE-E YESU, 'NGBÉ NGÁMÁ GBA OMA YUDA-O.» <sup>38</sup> U atsia agi osisiti obhũlũ 'zi bhisi li okulusi de ani: bini li kulusi gba e li pá 'kpa ani na kokpa, koko li kulusi gba e li pá 'kpa ani na gali.

<sup>39</sup> Okpála inde adũ akodho 'kpí-e, adũ asobho Yesu ne nako 'ndji o. <sup>40</sup> U adũ apa pi ani me: «Ngamũ, bhũlũ nagugũmũ 'ngbé 'ti Ebhe gba oma Yuda ne nayiyiki bhú 'kpí bata-a, kobho limũ ngamũ makpe! I dũ me mũ nde ne ndili gba Ebhe-e, kũ li kulusi-e kuto.»

<sup>41</sup> Ongbengbe odimandẽ, omũsuno na líli gba Moidje bhú dabilĩ bini ne obhelesi okpála, adũ bhadi amũ ani moko. U adũ apa me: <sup>42</sup> «Ani akobho okpála koko. Ka ni ani ti da nakobho lie lie ngae makpe di-e, ngaani inde 'ngbé ngámá gba omafsalaele-e? Ani kũ nga kuto li kulusi mbia inde, amba ya bhuka ani! <sup>43</sup> Ani a'o

† 27:35 27:35 Tsia bhú Ets. 22:19.

nabhuka gba e bhú Ebhe. A ayo me Ebhe kobho ani mbia inde, i du me Ebhe nde akunda ani na paká-o, anga ani apa me ni ne Ndili gba Ebhe!»  
<sup>44</sup> Abana osisiti obhulu 'zi inde u agi o li kulusi lingo Yesu-o, u adu bhadi asobho ani moko.

*Yesu andala 'kpa li bua e*

*(Tsia bhú Mlk. 15:33-41; ne bhú Luk. 23:44-49; di ne bhú Dja. 19:28-30.)*

<sup>45</sup> Abhomu-o, nayie tulukpe akolo bhú saa na bata pita tulukpe-e, biti agba pila doto libhomu.  
<sup>46</sup> Bhú saa na bata pita tulukpe-e, Yesu asula kpekpeke me: «Eli, Eli, lema sabakatani?» A akunda napa me: «Ebhe gba ma, Ebhe gba ma, mo o'o ka ma ka ni?»† <sup>47</sup> Bini bini bhú ká okpála inde adu oo adje ani lie, u atsia adu apa me: «Ani nga'i Eliya!» <sup>48</sup> Ma 'li ma-e, suka osudha-a agu holo. Ani anu aha epondje, ani ato bhú kpongadha pandi. Ani atsia ato li 'ndji mbamba, ani aha pi Yesu me ani ndjindji. <sup>49</sup> Engú bini, okoko apa pi ani me: «Djedjeke, ní u nga ne me Eliya ngago nakobho ani!»

<sup>50</sup> Yesu atsia asula matá kpekpeke, ani atsia andala 'kpa li bua e. <sup>51</sup> Me-e, 'ngbé 'kpá bongo inde adu abuku 'bhø tina 'ti na bubu bhú 'ngbé 'ti Ebhe gba omaYuda-a asidha bhusu e bhisi má tsue nayie abhúlá, akolo akuto. Doto adyiki, ongbengbe teme atsia aupa. <sup>52</sup> Abhomu-o, olata-a ada bhusu o, bhiti omabhuka inde amu nani-e atsia azuku. <sup>53</sup> U aze bhú olata gba o-o. Pita li Yesu azuku lie, u atsia agbida bhú

† **27:46** 27:46 Tsia bhú Ets. 22:2.

Yelusalema, gũdhũ na bubu-o. Okpála bhelé atsia au uo.

<sup>54</sup> Ngámá gba osũdha na Loma bhú dabili ne osũdha gba e inde adũ alila Yesu nedhinga ani adũ lie li kulusi-e au engú inde akodho 'kpí ne nadyiki ka doto-o. Abhomũ-o, u adje tsulũ naali. U atsia apa me: «Kpála inde-e bha ndjũ nako ne Ndili gba Ebhe na paká!» <sup>55</sup> Olisi bhelé adũ li bili bhomũ-o. U adũ atsia 'ngú bhomũ-o mbo tsutsu. Olisi ango-o ayie nani ne Yesu bhú Galilaya, nakolo makolo bhú Yelusalema ngú nateteke ani. <sup>56</sup> Bhú ká uo, a adũ nani Malia , kpála na gũdhũ na Magadala, Malia 'hi Djaki ne Djodjefũ , a la di-e 'hi ongisi gba Djebedayo-o.

*Djodjefũ azi Yesu*

*(Tsia bhú Mlk. 15:42-47; ne bhú Luk. 23:50-56; di ne bhú Dja. 19:38-42.)*

<sup>57</sup> A akolo lie tagolo-o, bhũlũ tia bini ago. A adũ kpála na gũdhũ na Alimatayo. A adũ 'li ani me Djodjefũ . Kpála ango-o dũ di nani mukpata gba Yesu. <sup>58</sup> Ani anũ abhaka guvelenele Pilatø, ani atsia ayo kuo Yesu ka ani. Pilatø atsia aha líli me u ha pi ani haha. <sup>59</sup> Abhomũ-o, Djodjefũ aha kuo Yesu, ani agagala ne daladeli na mbia inde ani akala e bhú kpéke mase. <sup>60</sup> Ani anũ ato bhú lata na mbia inde ani aleke nani e pi e makpe bhú teme-o. Pipita-a, ani awawala 'ngbé teme bini li bhøbhø ngú nanini, ani atsia atapa. <sup>61</sup> Nedhinga bhomũ-o, Malia, kpála na gũdhũ na Magadala ne Malia bhe koko adũlũ kuto bhúla lata-o.

*U abu osũdha ngú nalila lata Yesu*

<sup>62</sup> Li ekpí aseke lie, a akunda napa me bhú ekpí nago gba omaYuda-a , ongbengbe odimandø di ne omuFalisai anu bhú dabili bini agba Pilatø. <sup>63</sup> U atsia apa pi ani me: «Ngámá, 'ndji ya ago mbia inde-e li engú li bhulu eu bhomu-o apa nako e nedhinga ani adu lie uu-o me pita 'kpí bata ni zúku-o. <sup>64</sup> Kaka-a, a ayo me ha líli me u lila lata ani nakolo bhú 'kpí na bata. Padhá de, anga i du mo-o de, omukpata gba ani-e ti da nago nazi kuo ani. U tsia pá pi okpála me ani azuku. Li okpála dje la ibili mo-o, eu bhende-e né la ibili da bhende ani apa nako e kalanu-o mane.» <sup>65</sup> Pilatø atsia apa pi uo me: «Yi ha osudha-a haha. Yi nu ne uo, amba u lila lata-a maka yi au lie ndjindji-o.» <sup>66</sup> U atsia anu naleke lele nalila lata-o. U ayele bhøbhø ne teme, u atsia a'o osudha ngú nalilila.

## 28

*Yesu azuku*

*(Tsia bhú Mlk. 16:1-10; ne bhú Luk. 24:1-12; di ne bhú Dja. 20:1-10.)*

<sup>1</sup> Pita ekpí nago gba omaYuda-a , bhú 'kpí yinga kèkpí má bhé-o, Malia , kpála na gudhu na Magadala ne Malia koko-o, agbida ngú natsia lata-o. <sup>2</sup> Me-e, doto adyiki ne adjigidjo na ngbéngbé, anga andjelu bini gba Ngámá-a ayie abhúlá, ani ago awawala teme inde adu li 'bhø lata-o, ani atsia adu pépé. <sup>3</sup> Kute ani adu asu má ngbí ngbí ngbí! La di-e, bongo gba ani-e avu má tuu! <sup>4</sup> Li osudha inde adu alila lata-a au lie mo-o, u aholo naguku ka tsulu má kpi kpi kpi, u atsia abala kuto mugito me a ko okpála inde amu.

<sup>5</sup> Engú bini, andjelu-o apa pi olisi-e me: «Yi akpé-e de, anga ma ambila me yi ngagili Yesu inde u agi nako e li kulusi-o. <sup>6</sup> Aní sii ade. Aní azuku maka aní apa nako lie-o. Yi go tsia bili inde u aseke nako aní lie-o. <sup>7</sup> Yi nũ pa kolo pi omakpata gba aní-e má gala me, aní azuku. Aní adji kala yi bhú Galilaya bhomu. Yi aú aní oo. A bhomu-o ngali ma de ago napa e pi yi-o.» <sup>8</sup> Abhomu-o, olisi-e ayie bha kolo bhú lata-a má gala me u nde abedhe ne tsulu di ne djali bedhe. U anũ ne holo, u atsia anũ ngú napa ngali angoo pi omakpata gba Yesu-o. <sup>9</sup> Ma 'li ma me-e, Yesu ago akè lie ne olisi angoo. Aní atsia ayi uo me: «Yi oo!» Abhomu-o, u adyudyo lio de aní, u atuko kuto bhú li 'dhũ aní, u atsia adhøgø aní. <sup>10</sup> Pipita-a, Yesu atsia apa pi uo me: «Yi akpé-e de. Yi nũ pa pi ondaise ma me u nũ abhú Galilaya, u aú ma oo ko.»

*Ongámási gba omaYuda ato kali me u bubuku engú nazuku gba Yesu-o*

<sup>11</sup> Li olisi-e adũ nga bha lie li kpadji-e, okpála koko bhú ká osudha inde adũ nalila lata-a anũ abhú gudhu. U atsia akpokpo ndũ 'ngú hana inde akodho 'kpí abhú lata-a pi ongbengbe odimandø gba Ebhe-o. <sup>12</sup> Abhomu-o, ongbengbe odimandø apo bhúla o ne obhelesi okpála gba omaYuda-o, u atsia adje lio me o méne pi-ie. Pita nadje lie ka uo-o, u aha tia bhelé pi osudha-a me u apá kukulu 'ngú inde akodho 'kpí-e de. <sup>13</sup> U atsia apa pi uo me: «I dũ me kpála bini nde ayi yi-e, yi de pa me: <Nedhinga ya adũ lie tila-a, omakpata gba aní-e ago, u atsia azi kuo aní li

ya.» <sup>14</sup> La di-e, i dũ me guvelenele nde adje-e, ya ambĩla lele ya akpókpo pĩ anĩ lie ngaya, amba yi asĩa mangimbo de.» <sup>15</sup> Osudha abha tia-o, u atsia amene bha maka u apa lie pĩ uo-o. Abhomũ-o, ngali ango-o ayangba bha sũnda omaYuda moko nakolo pĩ naki.

*Eli na soso gba Yesu pĩ omũkpata gba e-o  
(Tsia bhũ Mlk. 16:14-18; ne bhũ Luk. 24:36-49;  
ne bhũ Dja. 20:19-23; di ne bhũ Kul. 1:6-8.)*

<sup>16</sup> Abhomũ-o, omũkpata ndjikpa ne ká bini-e anũ bhũ Galilaya, pĩ eta inde li Yesu apana nani e pĩ uo me ni aké lini ne uo pĩ e-o. <sup>17</sup> U akolo lie oo, Yesu akoto li uo. U au anĩ lie, u atuko kuto bhũ li 'dhu anĩ, u atsia adhөгө anĩ. Engũ bini, okoko bhũ ká uo adũ ne bua na bhisi bhisi. <sup>18</sup> Abhomũ-o, Yesu adyudyo lie de uo, anĩ atsia apa pĩ uo me: «Ebhe aha ndũ angu na abhũlá ne bhe na pĩla doto hana mũma. <sup>19</sup> Kaka-a, yi nũ bhũ ndũ opiga hana. Yi mene me u kolo omũkpata gba ma. Yi batisa uo ne 'li 'Dyi ní, ne 'li Ndĩli, la di ne 'li Bu Bhobua . <sup>20</sup> Yi suno pĩ uo me u lila ndũ líli inde ma aha e pĩ yi-e hana. Yi mbĩla la me ngama-a, ní ne yi bhũ dabili bini ndũ 'kpĩ hana akólo bha bini makolo ali sokpĩ.»

CXXXV

**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

6b4904fb-f8ce-5931-8218-7cee8914232c